

清代中
興三傑
曾左胡合集

馮玉祥題



清 代 中 興 三 傑

曾 左 胡 合 集

四

上海图书馆藏书



A541 212 0014 9270B

左文襄公集下冊目錄

正文


書牘

詩

文

聯語

家書



一·四七

一·二一

一·三四

一·一八

一·七九

目錄

書牘

上徐熙庵先生

都門敬送。月紀兩更。瞻企之忱。日月與積。敬維葆華。霽道。俎朱豆張。世仰儒宗。播榮葉語。小子何幸。迺託門牆。請謁之餘。備聞至道。諄諄昭認。不替有加。雖洪壑不棄纖鱗。曠塹不遺效莽。而含宏之施。亦可謂勤矣。宗棠蚤歲孤貧。失時廢學。章句末技。且尠所窺。每觀古今蓄道。德能文章。卓然爲時不可少之人。天地不數生之才者。卽其英妙之年。類皆能堅自植立。不爲流俗所轉移。其始亦未嘗不爲世詬病也。及其功成事就。而天下翕然歸之。如賈誼、諸葛亮、陳亮輩。可指數乎。夫人生無百年之身。大業非百年可就。小時喜弄跳梁。不能遽責以學問之事。老而龍鍾衰憊。非復可用之人。求其可用。其惟壯時乎。而又以妻子室家科舉徵逐。故阻其來修。迺至割其餘景。以爲讀書求道之日。其何可成乎。比者春榜旣放。檢點南歸。觀時務艱棘。莫如荒政及鹽河漕諸務。將求其書。與其掌故。講明而切究之。求副國家養士之

意與吾夫子平生期許之殷。十餘年外。或者其稍有所得手。然其成與不成。則仍非今日所能自必者也。敢附孔氏各言爾志之義。敬陳所懷。小子狂簡。吾夫子其何以益之。麈尾蔽明。山川阻修。東望爲勞。末緣請業。倚裝作字。箋啓失莊。敬維霽鑒。不宣。

上賀蔗農先生丙申

奉別後。月紀兩更矣。敬維德業日盛。起居安樂。祇以爲慰。爾惟春飴。風日晴美。南城杖履。山仁水智。固衆芳之所在。惟君子能得朋。雍雍經堂。粲粲門子。晨彝夕訓。步步趨趨。顧而樂之。樂可知矣。宗棠頑劣不足算。事先生二年於茲。請益徒殷。末由苦卓。猶且開蒙發凡。寸詣有進。矧諸狂簡。亦越中行。其能傳文章。通性道。以無漸吾師之弟子者。當更何量耶。宗棠見假館隱山。鍵居西樓。肇事方輿家言。爰披圖乘。竊意古今談地里者。索象於圖。索理於書。兩言盡之矣。然而陵谷之變遷。河渠之決塞。支原之遠近。疆索之沿革。代不侔也。又土宇有分合。則城治有興廢。於是疆域雜錯。攻守勢殊。故有古爲重險。今爲散地。彼爲邊處。此爲腹裏者。如此。則應不能盡紀也。廣輪之度。山川所著也。山川脈絡。標望所生也。於是方邪迂直高下。均於是乎憑之。然而一言東。則東南東也。東北東也。果何據以爲此郡此縣之東乎。旣辨其

爲東南矣。又或以東兼南，以南兼東，或東南各半。始以毫釐，終以千里。果何據而得其東南之數乎？既得其東南之數矣，或自某省量至某府，某府量至某縣，又自所界之府州縣治忖之。或饒或減，歧出不定。果何從而折衷至是乎？如此，則書亦不能盡告也，亦不能盡信也。竊自思維，欲知往古形似，當先據目前可考之圖籍，先成一圖，然後辨今之某地，卽先朝之某地。又溯而上之，以至經史言地之始，亦猶歷家推步之法，必先取近年節令氣候，逆而數之，乃爲有據。故千歲日至，可坐而定也。欲知方位之實，當先知道里之數，欲知道里之數，當先審水道經由之鄉。凡夫行旅輿程之記，村驛關口之名，山岡起伏之迹，參伍錯綜以審之，直曲圍徑以標之，以志繩史，以史印志，卽未必盡得其實，其失實也亦寡矣。古書流傳絕少，賈圖李志，恆不多見。諸書引注，除蔡沈、王伯厚、胡身之數家外，類多牽鑿，而外間所行諸圖，位置乖舛，尤無足觀。大率先畫疆域大界，稍依各書填載，方向展轉增竄，不求其安，譬猶鑿趾以適其屨，誠不知其不可也。辰下左圖右書，以日以夜，擬先作皇輿一圖，計程畫方，方以百里，別之以色，色以五物，縱橫九尺，稍有頭緒。俟其有成，分圖各省，又析爲府，各爲之說，再由明而元而宋，上至禹貢九州，以此圖爲之本，以諸史爲之證，程功浩蕩，未卜何如。竊有志焉。

不知當否。伏乞夫子不以爲不可教誨而卒訓之。辨疑解惑。加以督課。小子不敏。未或敢怠。

答胡潤之己酉

得執事歲杪急步所遞手書。敬悉一切。少穆宮保愛士之盛心。執事推薦之雅誼。非復尋常所有。天下士粗識道理者。類知敬慕宮保。僕久蟄狹鄉。頗厭聲聞。宮保固無從知僕。然自十數年來。聞諸師友所稱述。竊觀宮保與陶文毅往復書疏。與文毅私所紀載數事。僕則實有以知公之深。海上用兵以後。行河出關入關之役。僕之心如在公左右也。爾來公行踪所至。而東南而西北。而西南。計程且數萬里。海波沙磧。旌節弓刀。客之能從公游者。知復幾人。烏知心神依倚。惘惘相隨者。尙有山林枯槁。未著客籍之一士哉。來書謂宮保愛君心赤。憂國形癯。鉅鈿一手。勤瘁備至。望僕有以分其勞。陳義至大。所以敦勉而追促之者甚切。僕之才之學。固未足以堪此。雖然。爲僕本懷。豈不亟思稍出所長。以佐萬一者哉。歐陽公辭范文正記室之辟。有曰。古人所以成事者。必有國士共之。非惟在上者以知人爲難。士雖貧賤。以身許人。固亦未易。僕誠無似。然得府主如宮保者。從容陪侍。日觀其設施措注之迹。與夫蒞官御事之心。當有深於昔之所聞所見者。縱不能有當於公之意。然其有益於僕。則決可知。

矣。尙何所疑而待執事之敦促也。顧事固未能如我意者。孤姪年已十七。家嫂急欲爲之授室。期在今年。又陶壻去冬書來。預訂讀書長沙之約。僕以小女故。未能愬然。且此子從學八年。資識尙正。冀有所就。以延文毅之澤。坐此羈累。致乖夙心。西望滇池。孤懷悵結。耿耿此心。云何能已。安順之治。開水利。興學校。劾貪汙。治巨盜。旌節烈。結宿案。綱舉目張。民懷吏畏。論者服執事之才之勇。僕則謂執事誠心愛民之不可及也。樂園先生嘗云。世之言吏事者。動言才情。不知才生於情。情苟不至。才於何有。僕每服爲確論。今世守令如執事之明敏有執者。未必遂無其人。然細察其意念所向。精神所注。大抵在上而不在下。其聰明才力。用之於揣摩迎合。承奉竿牘之間。而實意之及於民者益鮮。卽有時勉自振作。奮欲有爲。亦動於近名干譽之心。非其隱微所不得已之故。不旋踵而卽索然矣。交執事有年。信安順之治之異於世俗之所爲者。以此。願益勉之。頗聞揭參之舉。有議其不護鄉曲者。人心之不同如此。然充彼人之心。不遂使執事不爲好官而已。而執事所以爲執事者自若。不直以此寘胸臆。中年時飽歷憂虞。微有所得。嘗集古人忍過事堪喜。憂多道轉親。二語。書爲楹帖。每一靜對。輒復怡然。亦願執事常誦之。

答胡潤之

保甲團練冊論。一一閱訖。大段簡易可行。法止此法。惟潤之真能行之。故其效臻此。久久不倦。黎平治矣。合一郡之人。皆有捕盜之責。皆爲捕盜之人。盜將安往。從至纖至細起。結成大局。不特內訌不作。卽外侮亦自息矣。黎平羣盜淵藪。素號難治。乘此時軍興防堵。文法稍寬。併力整理。徐爲之謀。生聚教訓。則數十年不霑王化之民。庶有望乎。粵西用兵以來。譚時務者。皆知團練保甲之利。然團練之法。粵西行之。未覩其效者。蓋治小盜。則團練固不易之法。若當劇賊。縱橫防剿併急之日。則用團練。斷宜參用礪堡。夫團練云者。取其自相團結。免爲賊所擄掠裹脅而已。自扞鄉里。人有固志。熟於地形。便於設險。愚者亦能出奇。怯者亦能自奮。此其利也。若使與猾賊驅逐於數十里外。彼鄉民者。不習行陳。不知紀律。不走則死耳。烏覩所謂利哉。且無事之日。竭民之財力以奉兵。有事之日。復以其身命代兵冒險而赴敵。卒之訓練未嫻。十戰十北。糜爛其民。以求一日之僥倖而不可得。仁者之所不爲也。三省教匪之事。亦有調團丁赴勦立功者。一州一縣之間。倉卒遇警。兵不時至。不得已而爲此。教匪滋事。首尾七年。山民皆見逆賊伎倆。時相訓練。又其牧令能撫循其民。故民亦樂爲之用。然樂

園先生嘗言。凡賊過境。鄉民憑險固守。偵賊大隊已過。始截其落後數隊。處處如此。賊必日有損傷。又云。偵賊安營之處。附近堡寨。每夜遙以過山鳥槍轟之。俾賊不能酣臥。久之精力自疲。又云。鄉民習藝。只習銃石遠攻之具。至刀矛決命須臾之間。可不必學。諸所望於鄉民者止此。非知其難與劇寇爭鋒。而重惜其徒死與。團練原制賊要著。所以未覩其利者。正坐不用礮堡之失耳。有堡以安其老弱婦女米糧器具。有事移置其中。則人心自固。堡四隅各建一礮。礮居壯丁弩銃礮石。各守具預貯其中。兩礮相距遠近。總以礮石相及爲度。層留銃眼。不限多少。外環深濠。暗設機穽。計堡之大者。周不過一里。可藏數千人。一礮四夫。壯丁乘礮禦賊者。常不過百數十人。須人既少。可以更番疊戰。晝夜不懈。儲峙薪汲。先時籌辦。守具一切。預行安設。有警入堡。坐須其來。此不必知勇過人者。而後可爲之也。如近賊之處。無地不團練。無團練非礮堡。聲勢聯絡。及數百里。官兵擇要駐守。其營壘亦如礮堡之式。爲諸堡聲援。逆賊外援隔絕。間諜難通。釜魚几肉。何難撲滅。聞粵西之寇。狡悍異衆。兵勇屢次失利。賊居巢穴。若無所事。師疲餉乏。大將束手。論者不得其要。輒謂賊勇而我怯也。賊詐而我拙也。亦知賊常爲主。我常爲客乎。賊先據羅淥洞。官兵圍之數月。賊未嘗輕犯官兵也。官兵數

進。則數失利。旋據新圩。亦未嘗輕犯官兵也。官兵數進。則又失利。今分據永安州亦然。官兵之失利。又屢矣。豈兵勇之竟不足用。將領之全不足恃。與賊常爲主。而我常爲客。故賊暇而我忙。賊逸而我勞。賊設伏設險。以待我。而我輒中其計。兵法曰。謀定而後戰。又曰。善用兵者。致人而不致於人。賊知之。而我不悟。此勝敗利鈍之機所由分也。果於附近賊巢之處。令鄉民盡爲礪堡。官給費以倡之。險要之地。官兵營之。亦如礪堡之式。以步步爲營之法。同時漸進。逼近賊巢。賊知我將合圍。必併力來撲。則賊爲客而我爲主矣。凡立營之處。須溝深壘固。不獨我有憑藉。膽氣自壯。兼令賊之籐牌火罐。俱失其長。又兵弁之所以遇賊輒潰者。以東伍之令不嚴。故賞罰不能行。所以屢致敗衄者。將領不曉分合奇正之術。勉務浪戰以求勝。又不善用間諜。致屢陷伏中。賊旣廣用間諜。我又不能變易視聽以誤之。故至此也。時事方殷。需才孔亟。如老兄者。或不能無借重之日。勉思奇策。以副倚寄。山中散人蕭閒之筆。未必有當。惟教其不逮。則幸甚耳。

與胡澗之

連接初一初二兩次教函。備悉龍陽大潰之狀。鳳之肉。不足食也。李相堂謹愿。能戰而無識。

弟固嘗憂之。三面濱水之地。無水師接應。豈可紮營。使稍稍爭之。鳳山安敢固強。且老兄已相距不遠。自宜據實稟商。聽候卓酌。何乃聽人牽引。毫無主張至此。武官輕視文官。非有星使督撫之權。不肯俯受約束。所以奏明者。預慮此輩之驕蹇不用命耳。老兄試思。援勦西路。大事也。豈可無一主持之人。既以兄任其事矣。豈可不奏。若泛泛與周李等。又安能令其俯受鈴束。老兄已爲帝心簡在之人。萬不能卽退。且我輩此時已拋此七尺。性命在所不計。則樞氣受苦腦。又其小者矣。事到無可如何時。不必計較成敗利鈍。與己之堪此與否。且索性做去爲宜。在事一日。且做一日。除正事外。不必多做一想。多起一念。轉安靜也。潰勇收輯若干。可留者留之。可汰者汰之。何如。鳳相營俱無軍器。此一事頗難處。(帳房更難)已語滌公。解送尊營。聽候發給。所以必由兄發給者。亦一事權之說也。前日滌公會遣周岐山(鳳山胞弟)帶所募道勇五百來。并解鳳餉六千。中丞以尊營缺餉。搭解二千。想此信到時。已可接得。岐山可卽留之。麾下否。楚勇視諸勇爲佳。然挑選百長。最爲緊要。相堂毫不知人。恐不免受累。自粵西接仗以來。此勇未曾受大挫。以營盤好。靠定營盤。可打穩仗也。然其不能打勝仗。亦卽在此。與此賊戰。須取勢用奇。苦戰然後可得大勝。三者視乎將。不在勇也。中丞星使

得報後。憂老兄兵太單。適羅山羅澤南。昨自衡州調來。其一軍千勇。擬卽遣佐老兄。羅山固儒者。屢平土匪。在江西亦曾與此賊周旋。頃與語及之。伊亦欣然。惟須領餉而後成行也。李太守鶴人。已遣戈什哈來。聞三數日亦可到。滌公擬遣褚夏彭楊四營爲前隊。已與李鶴人爲中隊。陳鎮軍爲後隊。次第開行。李鶴人之勇到後。點驗演試。數日卽可成行。此君年不及三十。膽氣尙好。今日見嚴仙舫信。言其勇在潯梧招者六百人。多係劇盜一類。如能駕馭之。或可收效。在桂林招者四百。則不知何如。自帶扒船八隻。聞亦合用。大約水師總較陸路爲優。船礮本勝於賊也。賊踞常德。(在岳州者不多。林紹璋在彼)聞其遣人往澧州桃源。均不過數百人。其蓄謀總在省城。水師分三起去。亦是穩著。褚夏楊彭共戰船五十餘隻。(三板不計)勇共一千五六百。若肯見賊卽打。自是勝著。制賊於水易。勦賊於陸難也。褚雖猾。而水戰情形頗明白。彭楊則眞忠勇矣。夜擬一札。查龍陽失利事。意在警鳳以折其驕悍之氣。使其有求於老兄。或可漸就羈勒耳。老兄任大責重。桑梓所繫。以安危者。慎之慎之。援勦固急。然經此大挫之後。又須養之時日。加以經理。其氣漸固。始可用之。黔勇膽氣。未必人人皆強。亦未必皆怯。使強者先而怯者繼之。則怯者亦強。且人之膽氣。亦必臨事始見。苟非先事

預辦一走之人。臨時又無人牽引。卽怯者亦未必盡走。祇要臨時有一點畏王法。願主將之心。則可不潰矣。然平日工夫甚多。談何容易。老兄屢次書來。總言黔勇不可恃。其實天下無可恃之兵勇。而有可恃之將。楊忠武所部多精兵。他人之疲乏者。一入其營。不久卽成精銳。卽如塔三兄之撫標。尋常除嫚罵以外無一長。而此次相潭之捷。因主將偶爾不見。卽相與痛哭尋覓。入羣賊中若無人者。亦可想其心之固結矣。黔勇因賞耗鼓譟。未致大決裂。不可因此而灰其愛士之心。亦不可因此而疑人之與我者。皆非誠也。我不疑人。人自不疑我矣。海陽誠篤勤懇如昔可知也。其精神亦如昔。則實出意外。昨龍陽陷時。其家無恙否。太夫人尚健在否。念之。水師大約旬日後方可成行。（屢催不應。令人氣煞。又卻不敢勉強之。）先數日常有信來。水陸總須聯絡。庶可應手。褚旣爲四營總統。不可不與之通氣也。陸軍似宜爲預備數日乾糧方妙。

與王璞山觀察

憲川之賊。未知近作何狀。暫能不爲江永之患否。老兄若到鄙茶攸一路。此間何人可資控馭。辛翁欲呼黃輔鼎往會勦。中丞以其勇而少謀。且勇力甚單。不忍拋之也。傳聞潯州巨股。

尙未了事。大有由斗河來南之意。然則廣西之禍。無已時也。湘潭湘鄉滋鬧。各勇曾發示查辦。陣亡賞卹一項。魏崇德甯鄉敗仗後。各勇要挾求卹。曾奉嚴批不准。人數過多。難以徧及。且大潰之餘。亦歷無辦過樣子。石潭聞殺賊不多。求保恐亦難事。功牌或尙可耳。吾輩作事。須與泛常員弁不同。此等處皆非僕所能爲力。僕以爲閣下此時圖贖前愆。當轟轟烈烈。殫竭心力爲之。庶可不失本色。如料勢有不行。亦不必勉強從事。湘潭土匪。聞已斂戢。熊君與柏帶勇在彼緝拏。地方可資鎮壓。閣下行止。亦無難自決耳。塔將軍統領各軍。初三日啓行。滌公如故。水軍已付之陳鎮軍輝龍矣。湖南境內。見已無賊。傳聞宜昌失事。未知確否。

答蔣蕪泉

連接兩函。具悉。初九十六兩挫。殊爲焦悶。此股廣碼賊兇。聞連州之匪。亦往會合。人數自必不少。閣下以新集之卒當之。自難爲力。勝敗兵家常事。局勢迫促之時。總要和氣平心。從容以待。俟有機會。再起圖之。斷不可急於求戰。反誤事機。凡勇丁強而不固者。多一兩次挫折。人心便有動搖之勢。非慎固安重。將士氣養回穩。打幾次勝仗。不可言大戰也。初九之挫。由於輕進。十六之挫。由於衆寡不敵。以見在局勢言之。惟深溝高壘。日加訓練爲宜。俟所調各

營及新募之勇到齊。再移營進紮。屆時湖南防軍。亦當越境會勦。中丞慮閣下新挫之後。士氣不固。札飭宋蔣左三君帶所部五百餘赴茶庵大營。幫同守禦。蓋廣賊兇燄方張。必有撲營之舉。不可不預爲之防。又飭李守備金陽（卽沖天礮也有血性善衝鋒熟悉楚粵邊界情形故遣其來此子要善駕馭以之衝鋒恐太輕以之打接應則無不勝矣）帶所部老勇一百。令加募二百前來。擬再察看。俟連州局勢稍鬆。卽速調駐武之余參將一軍。與楊參將一軍。由江華會勦。此次所以不遽令楊參將前來者。以此君未曾獨當一面。不甚放心也。十月餉已委解。劈山礮當俟續解。不能二十尊也。劉培元已保至總兵。不能來粵。黃開亮（勇而明白）黃開甲來。勝張德志十倍也。迪庵入皖。連克太湖潛山桐城舒城。軍威甚振。乃不幸衆寡不敵。爲賊（四眼狗也）所乘。致有前月十一月之敗。聞其全軍盡覆。實爲可痛之至。貴州賊衆。至少亦有七八十萬。幸田興恕黎平兩捷。田宗蕃思州一捷。斃賊頗多。尙足支持。李文茂爲田興恕所敗。遁回古州。聞有回竄粵西之意。弟因黔鄂軍務繁劇。手畫口答。幾無暇晷。以致作答頗遲。亮蒙原鑒。李金陽到營後。須善馭之。寬斷不可。過嚴亦不可。戴事後卽速遣回銷差。弟亦另有用法也。

與胡潤之庚申

數年已來。所辦皆公家之事。所言皆公家之言。蓋幕之職。原以助官爲理。旣爲人役。自不得不殫精竭慮爲之。唐之馬周。以徒步而致卿相。本朝之王文端、陳文恭、林文忠。皆以幕客起家。就中端人正士。本極不乏。無如利其食者多。其途近雜。則亦有指爲口實者。僕當咸豐二年。賊偏長沙之時。從前并未一聞時議。中秋後方挈幼累入山避寇。親知多從之游。甫十餘日。忽枉張石卿中丞之招。欲不出應。而江岷樵自長沙以書來。勸其速行。郭筠仙、昆仲及吾仲氏同住山中。亦謂公卿不下士久矣。張公此舉。宜有以成其美。而僕於林文忠公處聞公言。滇之張石卿。黔之胡潤之、黃惺齋。乃吾左右手。因詢石公所長。則固開爽敏幹。不易得見者。遂欲一往參焉。比見石公於圍城中。握手如舊。予以數策。立見施行。自此留置幕中。長沙解圍兩月餘。石公奉權督湖廣之命。強僕赴鄂。是爲三年正月十二日。逮九月十三日。石公赴山左。中丞三遣使幣入山。敦促再出。時逆賊披猖。已陷岳州而南。距長沙七十里耳。不得已勉爲一行。四年三月初八日入署。至九年臘月二十日出署。中間事變多端。皆公與滌公所聞見者。亦張駱二公疏稿中所備具者。前後捌年。猶堪覆按。此後世能忘我。固爲意外之

幸儻復強納諸世網之中。真不知稅駕何所。無已則舍帷幄而事戎軒。少仲草莽報國之誼。蓋數年襄畫軍事。卒未一履行間。上年寶慶之役。以將領進止。未能畫一。亟請於駱籥公。願疾馳軍前。一爲籌度。希庵回湘視師。亦力勸其行。中丞堅以左右無人。不令遠去。致使微願不遂。每以爲歉。今後如不能卑栖巖壑。卒爲外人物色及之。則請以數百人營官自處。披堅執銳。以從事焉。幸而濟。則殺賊之素志可償。不幸而敗。則免冑陷陳。就吾死所。不敢妄希統領者。以軍旅之事。非可以未親閱歷之人嘗試之。營官隨大隊接仗。數十戰之後。歷練必多。部下人才優劣亦審。方期漸有把握。否則貿然任重。顛蹶堪虞。不但誤國。兼以自誤。殊非所取。必不得已而出。則學戰爲宜。若從容坐嘯。乖其素願矣。

與曾漈帥

自二套口登舟後。節節阻風。行十六日。始抵長沙。已聞節下新拜總制兩江之命。并奉前月二十八日賜書。見示寄潤公書稿。敬仰籌慮之精。以見今時勢言之。下手之方。無以踰此。惟公處兵數太單。鄂軍未能多調。自不能不速爲選募。以資分撥。正與意城玉班人樹諸君子商議。聞適中丞處接到部文。奉隨同襄辦之命。昨日巳刻。復奉大咨行知。并商辦九條。當一

一遵行。惟玉班見紮城上。中丞時以邊事見詢。未必肯令其遠去耳。凱章之軍。見駐郴州。中丞前接大咨後。卽令楊栗甫(安臣)募四千人往代。意欲俟栗甫至郴而後。以凱軍來。宗棠歸時。卽請催凱軍先發。比接尊處初五日咨。又已飛札催之矣。陳俊臣所部桂勇。素稱能戰。惟紀律尙須講求。其才固不止千人。然營哨頗難其選。如以千人或千五百人應命。自是一枝勁旅。藍山獠勇強而民勇弱。楊廣文籍隸芷江。或募於芷爲宜。固產勇也。尊處咨開所需槍礮子藥鍋帳。湘中自能照付。次青口糧。爲數無多。中丞亦當應之。比接大咨。令募練五千。或親統來皖。或請霞仙統領前來。則人數頗多。局面亦覺小異。凡爲統將者。必親募人數。多於增附人數。然後運掉易而呼應靈。若選募者一人。而統領者一人。或本部少而增附者多。則驟難浹洽。動形阻迂。不可不慮也。昨已飛致霞仙。請其自募二千五百人。而宗棠開幕時。擬卽并列霞仙台銜。俾衆共知。庶以後分帶合帶。均無不宜也。至此軍軍資行資。已託意城轉達中丞。飭局應付。當無齟齬。請釋薰懷。蘇州之失。爲公計者。如杭郡未失。宜先以偏師保越。爲圖吳之地。庶將來山內山外兩路進兵。可免旁趨岐出之慮。而餉地可保。否則賊勢蔓及於越。而賊巢穩踞金陵。大軍直指蘇臺。如擊長蛇之腰。防其首尾俱應。且吳中封疆大帥。

或殉或逃。枝郡旁縣。多已淪覆。下河下海。誰與圖存。如越中有一軍爲公宣布威德。則三吳人士。均有所繫屬。而簞壺之東。尙有可圖。否則形勢中阻。不但餉源易斷。音耗難通。亦孤吳中士民望歲之心。而貽中朝士大夫以口實矣。公督兩江。江西乃其兼轄。此邦於軍事素無條理。平時養勇數萬。臨事未能得一割之效。欠餉最多。糜餉最甚。公之所知。釐金一節。聞亦雜亂無章。所取於商者煩。所歸於公者約。公欲分而有之。自宜大加整理。爲今之計。似須將江西兵事餉事。先爲之經畫。令所司將兵數釐數。一一開呈。逐爲區處。兵精而餉節。釐旺則餉饒。似亦當務之急也。三省合辦之局。此間亦頗議及。惟見在大兵盡扼南路及靖州一帶。月費近二十萬。不但合辦無此兵。亦無此餉。宗棠歸時。始商之中丞意城。東自藍山臨武。西迄永明江華。徧築礮牆。以省兵力。已委馬春皋觀察及王人樹前往經畫。大約三四月始可蒞事。此工若成。東西兩路。每路三千人。卽數守禦。可抽撥七八千人應敵矣。

答曾滌帥

江軍敗於平望。蕭軍敗於湖州。兩湖危而江西皖南皆有漸及之勢。尊意大軍由東流。逡駐祁門。凱軍由茶陵取道撫州聽調。高瞻遠矚。全算在胸。敬佩敬佩。現鎮江尙存。而湖州寧國

曾 左 胡 合 集

有賊。是賊之不北竄而南趨。可想。與賊爲難者。獨楚軍逆之。詭謀必將乘湘鄂之倉皇而逞其毒。是制此賊。必取遠勢。而不能圖速效。可知。前書欲麾下以偏師守杭城者。蓋欲以固浙省。而通吳中之氣。且慮朝廷以吳越爲急。不察事勢可行與否。輒加催督也。但尊軍太單。恐偏師亦無可撥。或賊蹤飄忽。援杭亦緩不及事耳。弟奉到大咨。屬募勇五千。卽已開募。擬立四營。(二千)兩總哨。(六百)而留半以待霞。仙自募。霞仙覆書。尙未概允。當再剴切言之。而弟處再先募兩總哨。親兵一哨。合共三千三百。以俟霞仙至。見尙發札。調數人至省。以備營哨之用。此軍若成。或不草草。(一月餘成軍一月餘訓練斷不可少)惟弟頻年戎幕。未曾親歷戰陳。臨時調度。恐不足恃耳。江西皖南。皆當賊衝。凱軍由撫州進。若遇大賊。兵力猶單。如此軍成。而賊到江西邊界。似當先助凱軍擊賊。而後與公會師皖南。或吳越之交耳。春霆、雲崖兩軍。緊隨麾下。萬不可離。賊聞公至。必悉力來鬥。非占地勢。而有外援踵至不可。兵事瞬息萬變。未敢遙決。惟求慮勝而動。是爲至要。次青必已起程。然尙無到平江消息。弟之新軍應募者頗多。好手尙易得。如將來可滿五千。或當盡帶以來。霞仙處所募。將來恐不過二三千。蓋湘人應募者。多已外出。而本地轉難也。江西尙可勸捐。如有本地人員。可回江委

勸者。請賜委札。尊處如有部照。請畧分若干見寄。可否希示知。不宣。

與胡潤之

十五日奉上一函。計已達覽。樅陽血戰得之。賊援必急。亦可稍牽賊勢。滌公渡江。兵力猶單。而廷旨摧其由浙援吳。必不能赴。凱軍四千。已催其速由茶陵出撫州。如賊尙在浙境。則先扼饒廣。杭城無恙。則入浙爲固。越規吳之計。賊勢披猖。蔓延日廣。滌公大軍。人數尙不能分。山內山外兩枝。更何能分偏師以援越。然局勢如此。三路缺一必不支也。公意三大枝一出揚州。造水師。一出浙江。造水師。一大枝分爲三枝。從徽寧廣德趨吳。的是妙著。惟恐無此兵力。無此將才。如何如何。弟日間料理選募諸事。立四營官四總哨。（每三百二十餘人爲一總哨）外。收璞山舊部四旗一千四百。別精選勇士爲八隊親兵共二百人。以奮勇著名者爲其隊長。每隊二十五人。供臨陣衝堵之用。將來以五千人爲率。或不草草。湘中見成營官。定議不調。惟李金陽一營。籥門先生欲以付我。蓋此子難以鈴束調馴也。霞仙奉命募六千人。恐難招齊。能以二三千人應卽好。霞鄉中應募已空。且六千君子。亦殊難爲長也。弟部多用驍士。名爲楚軍。（數處盡用湘鄉勇丁。無論一縣難供數省之用。且一處有挫。士氣均衰。

非計也。非霞仙所能帶。霞仙亦必不願帶之。弟自行耳。七月訓練成軍後。或取道江西。以赴皖南。或由水路徑赴皖南。均未能定。且看局勢如何。鮑春霆已來營否。新增之二千人。尙未知穩實可靠否。禮營亦似非健者。滌公渡江。恐必有賊尋鬥。或是大股悍賊。亦未可定。殊難放心。弟軍難速成。不能奮飛。爲之懸心。來示執筆而籌。終不如枕戈而寢。誠爲確論。弟於軍務兵機。頗常留意。惟臨陣指麾。協宜與否。實不能自信。俟閱歷數仗。方有把握。蕭濬川四月二十七日在蜀病故。其軍無可代統者。必散無疑。蜀事實無可爲也。阿瞞已到長沙。忽奉扶柩回籍。無庸督辦四川軍務之命。爲之愕然。不自解其何故。渠意深慮江南後命。蓋猶於馬上望三台星耳。江西來咨。欲湖南募勇萬餘赴江。言彼處東路兵力之單。毫無足恃。不知前疏防兵四萬盡置何處。令人耽憂。滌公來咨。欲湖南認二成。江西認八成之餉。湖南義不容辭。但非得兩三小統領率之而去。何以放心。此則甚費躊躇也。候補四品京堂。尙未見有專奏謝恩者。或者起程到營時。呈請代奏爲妥。如補一缺。則不能不專謝矣。日間勞甚。數日後卽出城住營。訓練已堅。請王梅村來營幫辦數月。開數仗後。聽其自便。尙可慨許。亦頗患病。上年屢調不出。無如之何。此次以請懇之。或稍動耳。滌公昨以三千統領札調。

之。恐不應也。

答曾滌帥

七月朔日。奉六月十五日手書。敬承一是。入蜀不如來吳。大疏措詞運意。爲鄙人增聲價。爲夫已留地步。極有斟酌。見在所調彬桂兩路之勇。鎮筵之夫。均已陸續到齊。合之老湘及長沙先募各營。共五千七八百人。弟於前月二十四日。由校場移駐金盆嶺。晨夕訓練。漸有頭緒。請王梅村總理全軍事務。王毅卿辦老湘營務。楊石泉、劉克庵諸公。均入幕府。各營哨皆百戰之才。似亦不甚草草。然終能不負公以不負朝廷。則未敢知也。召募經費。及一月坐糧。一月行糧。約需六七萬金。此皆吾人膏脂。而中丞及諸當事謁蹶供之者。未收一戰之效。先糜數萬之餉。思之皇然。八月初。必率以東行。擬取道袁瑞。以指景德。由景德而來祁門。新軍無存儲。不禁飢餓。伏乞飭江西當事。爲謀一月之食。俾得速達麾下。無憂羈滯。感且不朽。霞仙已來意不欲自成一隊。但願比於附庸之國。蓋營哨之才。良不易得。漫致數千之衆。必不適用。此時湘人之健者。朝取暮取。已空其羣。渠不肯輕爲嘗試。自言不隻身就我。則走依潤公耳。楚軍營制一本。呈請教益。不宣。

答駱奮門中丞

降卒數千。頗難處置。老弱資遣歸籍。擇其驍桀。分置各軍。此一辦法。否則開籍貫清冊。咨原省安插。其見被賊踞地方。無家可歸者。卽咨送原省各軍營。分別遣留。亦可有利無害。否則聚羣不逞之徒於一方。轉瞬仍爲盜賊。不但遠憂。且有近患。湘粵此次降人之籍隸湖南粵西兩省。隨地安插。其籍隸湖此江西安徽者。宜分起派員弁送潤滌屢兩大軍及敵處。分別去留。散則勢孤。不能爲變。臨以大軍。則易鈴束。反資其力也。

答曾節相

連接兩書。敬承所示。李苗夙隙已深。討苗詞義甚正。或可資其裨助。鮑軍西上。青陽圍解。皖南局勢。亦當漸有起色。惟賊意總在竄入江西浙江。各覓生路。未必盡援金陵。以應逆渠之召。蓋黃胡諸逆。構亂已久。知東竄則其勢日蹙。難望生全。又粵東花旗諸賊。見賊勢日衰。意欲回粵散幫。竄江西。竄浙江。均須由宣歙分歧。我能力扼此關。遏其紛竄。偪令東趨。庶可保完善之區。殄此殘寇。青陽圍解。則竄江西之勢亦輕。意者其遂由徽竄浙乎。浙師除皖南兩支外。皆併力東趨。勢難回顧。又自夏徂秋。官民兵勇盡爲疫癘所苦。節交霜降。疫氣仍未減。

息。吾軍久飢久病，銳氣潛消。驅令東驟西馳，恐難用命。故飭老湘移駐歙休之交，克庵全軍漸次東指，務令絕其入浙之蹤。未暇過嶺助剿。鮑軍既來，江席兩軍與之會合。嶺外軍勢益盛。亦復無須浙師之助。自當以截其入浙爲正。想能諒之。兩淮鹽課甲天下。陶文毅在日。試行票鹽。已覩明效。惟淮北行之。而淮南有志未逮。蓋其謠譏繁興之故。今則事同創始。無所顧藉。若一律辦理。當於尊處餉事有裨。而淮南之鹽。行銷淮南引地。於義爲正。江楚誰得而非之。前讀大咨。以止論轄地。不論引地爲言。而引鄂湘之收淮釐。證之鄙懷。竊有未喻。前此安慶未復。其浸灌鄂湘之鹽。多從淮北而來。否則賊中所帶淮南之鹽耳。淮北之私。賊中之物。故鄂湘得抽其釐。然鄂湘所抽之釐。仍以川粵私鹽爲多。而淮南此不過偶有其事。試觀鄂湘已往辦法。顯有明徵。公督兩江。又正值安慶九洲洲先後克復。江路大通之時。專兩淮之利。整頓固有鯁網。收復淮南引地。以資軍食。鄂湘何能與公爭。淮南向時暗透之私。今變而爲官。何愁鹽不足而銷不廣。乃以論轄境不論引地之說。先資鄂湘話柄何也。因公既許免浙鹽之釐。未便再有辯駁。故止不言。亦慮公與弟均尙氣好辯。彼此爭論。更涉形迹。於大體多有窒礙也。弟更有請者。凡辦釐務。貴在各局委員得人。能與彼地紳商賈民浹洽。然後

民不擾而事易集。若各局不能得人而理。而惟知變置督辦之員。責其不能有所裨益。而嘗之斥之。不特無益。而且有害。李黻堂去後。劉孫諸公。畢竟有何成效。公固知之。至景鎮河口。釐務之旺。實由別處委辦之員。認真綜覈所致。於江西各局之釐。無所侵佔。見在由尊處委員接辦。虛實自明。無煩置辦。而公前此頗疑景鎮河口之釐日增。則江西各處之釐日減。弟慮公一時遽難燭察。而江西總司釐局者之益觸公怒也。故自承恐有侵佔。飭委員各清界劃。不料公不信其爲權詞。而信其爲確實拱招也。茲已委員接辦。水清石出。弟之苦衷。亦可略白。武有七德。豐財居一。豐財非和衆不能。非用人不可。用人不宜獨斷。公幸察之。

答駱籥門宮保甲子

去秋接奉惠函。敬悉一切。石逆稔惡極久。一入蜀境。卽便伏誅。餘黨李復猷。亦盡於粵楚之交。十數年逋誅積匪。一鼓蕩平。雖山川效靈。得收奇捷。非公精誠所格。何以至此。敷天稱慶。豈兩川蒙其芘賴乎。敝軍自肅清浙東後。彼時若直擣杭垣。爲力較易。乃以皖南羣賊麀集。時多境外之虞。不得以分軍助勦爲兼顧計。幸竭萬人數月之力。得以蕺事。而蘇常援杭之賊。遂畢萃浙西矣。富陽克復。賊退杭餘二城。誓死固守。其堅忍悍鷙。實與老賊無殊。宗棠見

駐餘杭城南橫溪頭。以攻餘杭。蔣方伯一軍。及水陸各營。破賊堅壘。直逼杭城。西南兩面。羣賊窘蹙萬狀。乃有乞降之請。計賊衆二十餘萬。安插匪易。若概行收納。後此必別釀成事端。勢非且勦且撫。不能完事。未敢取決一時。致貽後患也。滌相於兵機每苦鈍滯。而籌餉亦非所長。近時議論多有不合。祇以大局所在。不能不勉爲將順。然亦難矣。兒子孝威。在家多病。擬於春間來浙。眷屬尙住長沙。戎事倥傯。已久不寄書矣。承注附聞。

上總理各國事務衙門

達耳第福并無未清款目。前已咨呈冰案。茲承諭及。酌給卹賞。當卽行知寧紹台史道酌議。據史道覆稱。擬照中國總兵陣亡例加倍給予卹賞銀一千四百兩。宗棠查所給銀兩數目。與該公使請爲該故負清給墊款一千餘兩之說。尙屬相符。而外國官弁在中國出力捐軀。中國加倍給予卹賞。尤足示朝廷格外體卹遠人之意。已飭照辦矣。其洋將德克碑克復杭城。欽奉諭旨賞給頭等功牌。并賞銀萬兩。當卽飭司籌款解交該將祇領。其白齊文私逃一節。來諭謂該逆行蹤詭秘。難保無由江犯浙之事。已飭史道密查。據史道稟稱。密諭地方員紳徧訪甬上。毫無蹤迹。嗣後照會各國領事新關稅務司并英國參將葛格。一體巡緝。據美

國領事羅爾第照覆。白齊文實係歛迹日本。且有病不起。并未潛至寧波。史道以該領事所言。恐有不實。向寧滬往來洋商查訊。有云白酉見在東洋。有云已招黑鬼數十。投入金陵逆巢。傳聞之詞。尙難憑信。惟刻下未在寧波。則係的確。宗棠當飭史道隨時密查。如果潛赴寧波。一經拏獲。自應遵照諭函。立即處死。以絕根株。而免後患。

與陶少雲

古之讀書修身。卓然有所表見者。無不從艱難困苦中練出。動心忍性四字。最可玩。動字之義。卽乾之惕。震之恐也。忍字之義。卽艱貞正固之意也。人情耽於逸樂。當無事之時。覺眼前無復可慮。耳目口體之欲日盛。而天理日見消亡。冥然頑然。僅存人形而已。本然之善。具之生初。所謂性也。然四端初發。非忍則不能堅。非堅則不能達。善念之起。若存若忘。旋生旋滅。所謂務決去而求必得者。無有也。浮游其耳目。陷溺其心思。而善念日銷。惡念日積矣。

答郭筠仙

自汪逆殄斃後。賊中恟懼益甚。早知竄走之必速。惟西北則鮑軍遲遲未來。西南則曾鄭兩軍。自相恫喝。觀望不前。連用函牘嚴加敦迫。正恐長圍未能速合。經任拚飛。日夜企望。須髮

爲白。十七鮑子始進相公亭。十九進平成鋪。二十二日曾鄭始進長沙墟。小密（土音密近昧）賊卽於是夜二更傾巢而竄。由南走小密。曾敏行不能禦也。閩軍偵知。薜食急進。由泮坑出。天明抵黃沙嶂外。斬誠已多。比入嶂則羣峯攢刺。一經縈瀉。矛刺刃決。如狼驅羣羊。齧食所餘。概隨顛墜。而開路之胡瞎子。已穿巖度澗。驀入豐順縣北四十里之大由北溪一帶。弟慮其突犯潮郡。星夜調駐蓬辣三河壩之扒船駛赴留隍。自率親兵急進。比至松口。則各軍馳至。嶂內賊剿洗殆盡。惟鮑軍絡繹奔赴。撞擊攫掠。兵賊不分。而胡瞎子一股。尙未追及。有高軍門劉署鎮。夤夜截之。足可捕除。賊勢衰微。斷難他竄。乃檄江軍防興寧。粵軍防長樂。求安。自防江口。以待續報。定進止。二十七日。高軍飛報。生擒胡瞎子。并降死黨千餘。全數蕩平。乃輟潮郡留隍之行。檄諸軍分北降人。分造通冊。誅其桀黠。宥其脅從。資遣其老弱婦女。簡其精壯。隸之各營。以俟安插。蓋人多至數萬。非旬餘不能料檢也。十萬餘負嶠之寇。以三萬餘乖和之軍了之。十五年逋誅之賊。以二十餘日迫促之期了之。鮑軍來遲。未及赴長圍之約。到相公亭後。急於進取。又違速戰之戒。追勦後期。因人成事。而居殲渠之功。此則各營官爲之。非鮑子本意。疏中多假借之詞。復分閩餉犒之。亦古人賜几杖賜金帛之意也。度閣

下覽至此。亦必服其戡定之敏。調度之周。又必疑其自詡之太過。所言之未必盡然也。姑書此以俟。諸異日何如。粵東吏治軍事。玩愒粉飾。閣下力圖振作。而才不副其志。又不能得人爲輔。徒於事前諉過。事後彌縫。生平惟知曾侯李伯及胡文忠而已。以阿好之故。并欲儕我於曾李之列。於不佞生平志行。若無所闕。而但以疆目之。何其不達之甚也。甚欲與閣下惠州一晤。稍罄誠款。念閩事千端萬緒。急待整理。督閩浙三年。居節暑僅十又二日。本分應爲之事。曠誤甚多。不能不急圖返旆。一俟料檢事畢。當卽率所部啓行耳。粵將無一可用。而欠餉過多。不能遽撤。方耀之屋。被勇折毀。卓輿因索逋偪迫。吞生鴉片圖自盡。暫以計懾之。終必譁變。始誤於不擇樸實之將。量其力能。而惟務貪功貪多。縱詭隨以冀僥倖。繼誤於餉事匱竭。不能不作騙賴之局。而顧兵力之艱難。吁可畏也。巨寇雖平。憂慮正迫。如何如何。平生好過慮。於密友前言無不盡。屢以忤曾侯。茲復此犯嚴威。極知狂謬。然鄙懷如此。亦不敢有所隱匿。但使閣下稍垂察納。早爲區處。勿使吾言之幸而中。則所願畢矣。因忠而憤。以直而亢。知我罪我。聽之而已。

答蔣薌泉

老弟開濟宏敏。都人士均贊頌不置。從此廟堂可無南顧之憂。私懷尤爲慰愜。總署於輪舟一事。近始注意。觀致弟書。深切著明。較閩中公函。尤爲透露。日意格立定條約後。候德克碑於八月二十七日由安南來閩。索觀約稿。了無異議。正催其赴滬畫約間。兄忽奉調督陝甘之命。比卽催其赴滬。見白來尼畫押。并同日意格來閩定局。大約十月初可到。兄俟其到。始能啓行。總理船政。惟沈幼丹中丞最宜。以其夙負清望。又在籍紳士。無更替之煩也。兄已三次造廬敦請。渠仍遜謝未遑。見拜疏請之。垂以朝命。或無異議。所有設船局、船廠、鐵廠、船槽、買輪機、延洋匠、立學堂等費。約須四十萬兩。閩當獨任之。此後按月須四萬兩爲薪糧工料之費。擬閩任二萬兩。粵東一萬。浙江一萬。俟入告時。再咨達冰案。西行萬里。別無系戀。惟此事未成。又恐此時不能終局。至爲焦急耳。閩中事頗有起色。兄行後。惟盼周受三一手支持。此間官場正氣未允。不如去浙時光景。恐兄一移足。便爾倒歇。如何如何。霞仙、厚庵、均以病去。在兩君固得善脫。然非時之所宜。兄之能逮厚庵與否。未敢知。若喬君似實不若霞仙矣。彼中餉饋艱難萬狀。不獨無米且無麥。又苦寒異常。非南人所宜。將士不願赴者多。兄擬定米麥價。由官設局採運供支。其不敷之價。由官賠墊。逆回多馬。非步隊所能當。需賣口馬三

四千練馬隊。又須練車營。開屯田。凡此皆費之最大者。陝甘無可籌。求之別省。則必不應。兄擬於閩浙商之。未識粵東能惠我少許否。乞明示之。再筠仙於駱籥公先塋一事。處置殊欠允協。以公議論。由直固不可淆。以情理論。一品大員。先墓尙不能保守。亦非朝廷尊禮大引體卹耆舊之意。狀駱公八年湘撫。清操卓然。有功德於民者乎。筠仙以勢豪例之悖矣。果臣信來。意漸冰釋。吾情所以處之者。復禮交盡。渠固血性男子。斷無倍負之理。兄聞此。尤深佩慰。且俟東江治匪事竣。請仍助我西往可乎。

答彭雪琴宮保

得臘二日手書。具承一切。太夫人傳擬就奉覽。雖不能寫微行於百一。然較之俗手自別。不審偉盼謂何耳。弟頻年馳驅戎馬。筆墨久荒。文字之役。輒謹避之。非敢畏煩。實以藏拙。數承誣諉。乃勉爲之。亦以先世貧苦憂悴。與兄家世相同。不敢以不文辭也。二十九歲自題小像八首。中有句云。乾坤憂痛何時畢。忍屬兒孫斲菜根。當時蓋已心傷淚落。見蒙國恩。祿入甚饒。而除置族田及湘陰義舉外。尙未別有霑溉子孫之事。不知者謂其矯。愛我者稱其廉。實均不得弟之心耳。關隴餉糧俱窮。刻虞決裂。捻逆復又竄入。午道更阻。當急擊之。安敢爲省

幕之請。敵部在閩浙者。憐弟遠征。俱告請同行。弟皆謝止。一則新復疆土。需人鎮壓。二則隴西覓食太艱。人多更累也。勉率三千人而西。并奏請劉克庵副帥集我舊時部曲三十。來鄂會隊。見未抵鄂。而舊部來者。已絡繹不絕。看來劉軍會合。當可得八千子弟耳。閩浙粵東諸上座。不待弟求乞。均願助以重貲。各自入告。感荷何已。平生從不敢乞人憐。人亦少憐之者。至是不求而自至。此事卻較厚庵爲勝。尊體時有不適。急宜節飲。早晚兩三鍾。亦慰寥寂。何必連引巨觥。精神可省膏處。亦須時加葆惜。作畫作詩。縱好亦不過數十百年過活。願以漸屏棄之。世局方艱。當事者多爲病苦。弟自來強健。乃元年嚴郡瘡後。腹瀉不止。入閩後。百病叢生。自粵凱旋。精力更憊。見尙未愈。但恥言衰病耳。炎風朔雪。馬革沙場。隨天付與。何必瞞下兒女子手。乃爲正命耶。

答鄂撫曾沅浦中丞

小除抵鄂。聞子美小挫。時深懸系。見聞諸軍四集。當可聚而殲旃。子美勇猛。有血性。昨次之失。當由視賊太輕。然肯打猛仗。亦極難得。不見盤桓終年。未見一賊者乎。聞其受創頗重。未知能速復元否。老兄在德安。見有若干營壘。聞譚竹巖制軍云。鮑春霆又自拜疏赴陝西。未

知已成行否。弟西行之始。原以南人憚於西征。奏定自帶三千。克庵副帥。別募三千。均多選營哨之才。到秦後。爲增竈之計。昨到黃州。始聞捻入鄂境。抵武昌。奉諭勦秦捻。始知張總愚全股擾秦。西同各境。賊蹤殆徧。見正催副帥及各營迅速募帶前來。然開正卽能募齊。到募鄂總在一月之後矣。見率所部六營紮後湖。逐日訓練。并遣人賣馬。先造獨輪小車。俟各營齊到。再西發也。兄疏稿在江西已讀過。是目下第一好事。是當今第一篇文章。昔人論張清恪生平若無噶禮一疏。便覺減色。豈不諒哉。竹巖元覆件未曾見過。未便索其稿閱視。據云計接奉批答。當在新正初吉也。鄂中軍事吏事。得賢者逐加整頓。自可漸期或效。惟關隴一片榛莽。迥異尋常。未知何日真見澄清之效耳。霞仙卸事之人。廷旨迺猶責其高臥城中。殊非意料所及。厚庵分明爲餉饋所苦。東馳西驟。迄少成功。論者每言其不能戰。致朝廷有一籌莫展之斥。然則古所謂神兵者。皆將不食而飛耶。擬并爲一疏剖之。

與曾沅浦丁卯

昨讀大咨。知捻逆回竄。喜其仍入殼中。今日探報。又聞仍從棗陽竄去。未知鮑子能以全力截之否。此君長短。諒有所聞。人嫌其拙。我覺其知。前年諭旨命歸弟節制。弟疏固辭。渠自請

歸弟節制。疏末惟請敕弟親臨軍前。明察行間功罪。比弟至嘉應。調所部急合長圍。而霆軍不進。惟藉口粵東未設米局爲言。弟催筠仙速思所以濟之。而筠仙又固不肯。僅許每月協銀萬兩。鮑子之意未慊。仍不卽來。弟六次專人咨調。不應。直至汪逆陣斃。賊衆洶洶。乃依第七檄雅步而來。二十日州城西北一戰。斃賊無多。輒馳報殺賊數千。二十二夜。賊由西門竄黃沙嶂。渠乘楚軍之後。爭擒縛賊目之功。幾與各營開仗。弟嘗直告之。然渠每對人言。輒居爲功首。計別已一年。并未與賊遇。此際賊竄。又正奉催促入秦之旨。恐將有所藉口耳。尊處辦賊。仍可無須此軍。惟入秦。則秦中無此巨餉應付。將來又難料理。是又難與弟與霞仙之責矣。漢陽鍾太守謙鈞。堅請開缺西行。并捐廉二千。求免日後保舉。意以受恩未報。聞西事方亟。不遑自逸。必求允其所請。弟鑒其誠。敬其用心。迥異時流。不敢壅於上聞。然念方今時事之艱。實在守令難得其人。如雲卿之賢。其聲績久著荆楚。必私爲秦隴僚佐。毋乃示人不廣。且雲卿方得賢者爲依歸。并無不得其志不安其位之慮。在秦猶之在楚乎。安必琪花瑤草之長我階除乎。擬會列尊銜。具述其志節。俾天下之爲守令者。有所觀感。至留鄂入秦。一聽廷旨何如。尊意以爲可。或專主留鄂一節。亦聽卓裁。秦中喬劉互劾。已奉密諭交查。

是非之介。消長之機。則亦不敢不慎耳。

答彭雪琴宮保

西旋入關。接奉良書。并承畫篋見寄。展玩再四。如對故人。且感且慰。辭官終制。復因朝命。暫展行期。出處進退。緩急。罔不理得心安。求之古大臣中。尙不多見。何論今人。將歸。仍舉軍儲。分贍飢卒。公私義利。較然不欺。老頭陀且作檀越布施。上庵寒衲。合掌領齊。阿彌陀佛。願恆河沙變粟顆。滄海化甘泉。煮薄粥。作一場清供也。關隴浩劫未了者。閻黎仍作殺人放火勾當。果何時放下屠刀。恐說偈西天。無復衡峯撲鉢時矣。夙因猶在。後晤有期。公但拄杖竦之。節飲簡慮。久遠住世。手以達誠。是無上咒。

答劉克庵

退庵來牘。極言其軍可用。他軍不可用。愈當快意時。氣矜愈甚。不信學道人竟如此器小。牘尾中微諷之。未知所見然否。朱德樹事得其來牘時。殊爲詫異。然思范宣子聞韓獻子將斬人。馳救無及。遂令以徇一段。覺古人處此。亦不能專論是非。誠恐是非一明。軍情翻因而搖動也。然終疑其別有緣故。不盡因違分致然。日昨見隴州湯牧敏稟。據稱朱德樹上次到隴

時。曾以軍裝布百餘捲。向周署牧借領銀三百兩。後又索借一百兩。周以人地生疏。託湯轉借。應付後。吳退庵到隴。向其索還。始猶應允。繼則以藥材驛頭抵算。比請還銀。則覆信飭其私相授受爲非例。大約退庵之殺朱德樹以此。而原稟一字不及。又不知其何故。豈新病後神智昏迷耶。朱德樹保至總兵。實任遊擊。不宜如此草草。若以侵軍餉販私貨及強借州縣銀錢。有犯軍律爲說。加以軍法。亦尙有可原。又何必代爲隱飾。專坐以違令之罪。至其軍中營哨各官。均懷不服一說。此間尙無所聞。然此公若久留軍中。必有異變。擬密致受三。因病重求歸。好爲遣之。惟聞其鄉人怨之者多。恐歸後亦不免異患相干也。鳳岐戰事。實推宗岳爲首功。寧州獲生賊。訊供亦如此說。荔友此次惱羞成怒。詞多失實。由退庵稟中語多譏切。固不能謂其無因。然欲并攘其戰功。則武夫之見耳。

與劉克庵

今晨接奉廷旨。并原摺批回。謹飭鈔覽。片來焦慮。爲之稍紓。想閣下與幕中諸君子。同此欣幸也。部撥四成二百萬兩。尤爲殊恩。朝廷公道猶存。不爲異議所惑。天下事尙可爲也。諭內處處周匝。均留餘步。尤見樞邸調護苦心。幼丹當亦知感。丁雨生有先湊六十萬之奏。差強

人意。部款二百萬。已飛請文卿。迅委妥負領解。目下所急需者。俄糧價也。（除已解尙欠十五萬）運腳費也。（肅欠十萬哈密安西合欠數萬）景領款也。（除分給文慶兩處及部費外尙應發五萬餘兩）弟擬俟二三批解到。先儘毅齋各營。裹帶行餉。（非十五萬兩不可）聊慰軍心。餘仍點綴而已。軍火大小銅火已經起解。當可速到。快響槍子。請飭賴鎮趕緊加工製辦。大約於毅齋啓行前（在此二十營廿一哨拔萃開出關。次則黃萬鵬。次則毅齋。大約啓行當在四月中）解到兩萬。尙可濟用。此式爲槍之上品。昨出示俄員烏史漫達迷勞伏。贊好不絕。言伊國亦不能多有也。烏史能漢話。人極安詳明白。談次頗推獎張郎齋。而於金和甫不置可否。前敵軍事。正月廿九日。額副都統馮桂增以馬隊攻瑪納斯城失利。額背受重傷。馮被活捉。金於昨十三日始有函牘到。額則無一字。此次吉江馬隊陣亡者。（淮北馬隊）近二百名。原其致敗之由。則貪功輕進。馮受額之愚耳。雖於大局無甚礙。而伊犁糧路。慮其中梗。始悟和甫近日急於索糧者以此。再劉忠壯時露靈異。湘人多能言之。昨肅到日。啓行十里許。毅齋率所部來迎。忽有勇丁直趨弟輿前。大呼劉松山遣來說。請我與其滿餉一月。左右拉之不去。弟覺其癡。不之理也。見其號挂。知是董福祥營勇。次日毅齋

爲說。詢問此勇。言彼時見西北角一綫冷風。不覺老統領已到。飭其如此。後不復知自作何狀也。湘軍中皆言到肅後。聽人說老統領已在嘉峪關。催少統領製寒衣萬件。亦不知言所自起。毅齋設祭。剪紙焚化。乃止。弟於明日致祭忠壯。忠壯沒後。遇有大戰。必先示夢其部曲。忠義之靈。固常在也。

答楊石泉中丞

秋間奉惠書。知清恙漸痊。卽擬銷假。具仰公忠偉抱。佩慰何言。惟爲臣不易。進不如退。素懷略同。而值此時艱。卻又難言者。閣下與克庵及弟。所處正同。不足爲外人道也。餘杭案仍無分曉。殊不可解。言者每以道光初。奉旨平反趙二姑爲比。似當於庶獄。亦朝政所宜。不知彼當承平無事之時。聖意以各省督撫。養尊處優。不親細務。特欲於題本中指摘一二件。以示儆戒。若如見時光景。必不屑屑於此。且弟前赴燕齊勦捻。路過趙城。見一低小牌坊。卽趙二姑奉旌所建。時人猶指謂妓坊也。然則當時附和成獄者。亦獨何心哉。威妥瑪藉滇案與波作浪。聞亦爲華員所使。實則威曾意興早已索然。無如過持息事之說者。必欲遷就結案。屈意奉之。見已爲其國所詆。撤回本國。去時尙於樞邸處懇准安集延之降。意在芘安集延。以

與俄爭印度。幸樞邸以此事有人主持卻之。此虜伎倆。大率欺軟怕惡者耳。其實英人亦不欲中國肇衅。觀從前之撒巴噶禮。此次之撒威妥瑪。皆因惡其多事可知。况此次正與俄爭。佔印度。尚有求於我也。惜孱禽爲急弦所下。不能掙扎片時。豈不可歎。

答楊石泉中丞

薊泉才氣無雙。弟自奉命撫浙。卽奏調赴浙。自後聲績日隆。又奏請入粵。其撫粵時。治具畢張。於禁賭捕盜等事。尤著成效。不獨粵人頌之。卽島族亦懾服聲威。嘖嘖稱道。固天下所共知。此次奉特詔起用。未及簡畀。遽以疾殞。時論惜之。粵人誦言其在粵西功烈。朝旨開復原官。飾終典禮。不替有加。閣下又以浙人之請。專祠奉祀。薊泉有知。亦可無憾矣。至易名之典。原出特旨。內而侍郎。外而撫部。非例所應得。除奉旨予諡外。間有中外臣工奏請者。則必因其美節懿行。有出於事爲之外。爲人所鮮知者。表而出之。足以風示末俗。俾有所觀感。君子表微。蓋取諸此也。閩撫徐清惠。陝撫蔣文恪。弟曾舉其清苦之况。籲懇恩褒。得蒙俞允。而隴事危迫之秋。周閣學以存亡呼吸之間。繾綣相從。籌畫兵食。調和驕將悍卒。收復列城。盡瘁而死。弟雖縷舉實行。上達宸聰。而易名之典。終未之及。薊泉豐功偉績。載在旗常。朝廷特旨

起用。不幸齋志以歿。宜天下所同悲。而身後頌其功烈。思其遺愛者。皆出自舊部士君子之口。益足徵信無疑。事功著於宇宙。非微也。奚待於表哉。以尋常言之。則撫部例不得謚。復官尙足身後殊恩。茲請賜謚於義。尙合。已於浙人呈中批示之。如浙人懷其舊德。則位於朝者夥矣。聯銜呈請。誰曰不宜。近有劉霞仙請謚之案。亦未及奏請。蓋在官言官。祇合如此。閣下當以爲然。

答劉毅齋

連接托克遜所發捷報及各函。比卽草疏具陳。由六百里馳遞。想天顏有喜色。賞賚攸隆。凡關心大局者。莫不慶幸同深也。此次得機得勢。尤在達板擒斬無遺。足令狂賊喪膽。惜得報遲遲。未克先達宸聰。殊深悵惜。十五日行查各地方營汛之檄甫發。而尊處兩捷報亦至。遂濡筆草奏。敍次精整。足彰偉伐。私懷亦暢。以局勢論。安會事急。以白逆爲費。事在意中。大通哈此時曾否得帕夏回報。想已分曉。所患白逆狡點。非帕夏父子所能制。或至別生他變。然亦無能爲耳。從來西域辦賊。渠魁多漏。蓋西北荒遠。種人雜居。易於逃匿。不若東南一海窳縹。界畫可稽也。然安集延東距官西。爲俄人所偏。持此安歸。白逆附安會以存。安旣失勢。白

將焉往。此賊勢所可逆料者。尊意擬暫作小停頓。於事勢不得不然。且吐魯番採糧巴里坤。亦非可速辦之事。以時日計。仍是緩進急戰。擔遲不擔錯一說耳。巴局所存大米一百七十餘萬。本預備大軍進規南路之用。黃米亦多。較之麥稞連殼者。最有實濟。已飭王詩正儘力運解吐魯番。已飭雷道帶隨員前往設局。糧銀先後起解六萬兩。斷不至缺乏。四五六數月。餘糧栖畝。軍食易於取濟。朗齋治事之才。人不易及。閣下但傾懷相與。必有可成。夾帳棚藍白千計有零。候再飭哈局續解。鐵檄雖是定做。尺寸斤重。與尋常倍加。然價值脚費。合算甚不便宜。此後師行愈遠。不能照辦。須從本地設法。吐魯番本是產棉出布之區。平價購買。自易易耳。南八城富饒。著名物產甚多。一切免從內地取辦。節省勞費不少。幸留意焉。軍需照民價購取。卽是功德。若增給脚價。斷非所宜。幕中人才未集。自應從寬收錄。厚給薪水。惟時局如此。餉之難得。迥異尋常。仍宜加意撙節。保舉犒賞。均從中制爲是。南八城次第可望得手。凡在事出力之人。何患不能如意。此時先爲之極。後此何以加焉。曹武惠使相遲授。未祖待其平江南而後酬之。當時君臣之際。不嫌坦懷相示如此。我輩開列功次。只好賞從其薄。待南八城悉數收復。再思有以處之。未爲遲也。凡百詳慎出之。前書寧靜致遠四字。幸時留

意千萬千萬。

答劉毅齋

得八月廿九日所發公牘。具悉馬步各營。齊抵曲惠。分軍先由間道。繞襲賊後。正兵由大道。扼賊之前。觀蓋籌之周密。卜狡虜之就擒。未接捷音。先爲浣慰。白逆不過盜賊之智。於眼前地形兵勢。尙能窺測一二。至數百里外盤局。非所能知。此次兵由兩路同進。出賊意想之外。斷不能兩頭堵格。只要庫勒纏回。有糧供應。余提戎等穩扼橋頭。正兵過河。縱橫蹴踢。卽如甕裏捉鼈。翹盼捷書。日夜以俟。此賊一除。師行無阻。戡定有期。惟喀什噶爾一城。英人久有覬覦之意。早經總署峻詞卻之。觀此次向總署辨論。猶以喀什噶爾爲無主之地。足知其奸謀。海古拉中道被回截殺之說。旣不確。未知其究歸安集延故土。抑仍在喀什噶爾。若逆豎猶活。英人或謀挾之以爭喀什噶爾。亦未可知。惟我發兵恢復舊疆。與英何涉。總署來信。樞邸於八月十七日。接見英使傅磊斯梅輝立等。梅問此事可辦與否。樞邸峻詞拒之。結尾并云。此事見在不能定局。卽將來所議如出情理之外。亦斷不能辦。蓋謨謀已定。不過留一活筆。待外間自辨耳。至地不可棄。兵不可停。弟已前疏切實陳之。已蒙鑒允矣。其俄人藉邊界

案件。與總署辨論。藉端支展。爲緩交伊犁之計。和甫將軍聞俄兵攻土耳其失利。頗有乘機動作之意。不知俄復大舉攻土。直指土京。已奪其城隘。英方擬發兵援之。俄勢并未弱也。弟已函商。切戒妄動。總署亦有回信詳示之矣。將來雄師西發。或英人向尊處饒舌。一切照弟六月二十九日所致尊函處之可也。

致劉克庵

毅齋軍進庫爾勒。懸賞掘窖。得糧數十萬斤。適後路解糧亦至。計二十餘營。各得二十餘日之糧。遂裹之疾趨。六日夜行九百里。沿途見賊卽擊。越庫車而西。至和色爾。白逆所裹諸纒回。均已追散。急催朗齋繼進。毅齋仍率所部趨拜城。（距河色爾僅一百六十里）窮追阿克蘇。以截竄路。并飭庫車回會。遣人由間赴阿克蘇。屬其回會羈縻白逆。勿令分竄。未知能否做到。毅齋此時計已早抵阿克蘇矣。此次之戰。雖殺敵不多。然解散裹脅蒙回以數萬計。師過庫車以西。所歷皆產糧之地。隨地採購。易以集事。不須別籌轉運。省勞節費。尤爲至幸。阿克蘇地居南八城中間。水草豐美。距喀什噶爾不足兩千里。師行至此。分道并進。藏事較易。只要嚴禁兵勇擾害鄉村回堡。則蕩平有期。而久安長治之規。亦基於此也。英俄耽耽。無

能撓我。則亦聽其自鳴自息而已。入秋已來。病體支離日甚。眠食均不及前。幸尙能勉自撐撐。

答楊石泉

關隴陽雨以時。豐登可卜。惟涇源猛漲。小有損益。見平涼支渠修治之功。未可緩也。新疆舊緒。經毅齋恢闋廣續。大有日新月盛之望。桑秧不若上次之佳。多留關內。或能多所成活。阿克蘇所請本少。弟意在多發。以求速效。亦以地頗宜桑之故。上年阿局新織綢緞。宮府皆詫爲奇。竊思與蘭州織毛創舉。映美一時。故不俟其請益。先爲之所。胡雪岩前稱所購之秧。較上次更佳。茲承示及。皮皺肌枯。殊爲失望。或者雪岩以求精而反失之耶。織呢局稟擬成鏡面呢。尙須駝羊茸毛購到。始能開機。想已確有把握。見有成效可觀否。十年業屨。只今猶魂夢不忘。近因教練旗兵之舉。議論難合。改修水利。先從涿州桑乾開淀起手。適劉蘭州簡授台灣道。應帶所部赴閩。而旌喜馬隊五起。全數遣撤回隴。從事畚鍤者僅貳千有奇。未審能於伏汎前了此一段否。直隸順天。頭緒至繁。而要處總在桑乾滹沱。先於此著意。或免神州陸沈之歎。震災應在坤位。三月初四夜。太白犯月。越六日卽遭大喪。此其徵矣。禧聖五月內

可報大安。沖聖臨御。朝覲者均以聖叡度越古今爲頌。餘生卜見太平。可爲慶幸。留肅之安集。回部衆。自可放回。沅浦前月過鄂。屢疾少痊。至度隴視事。恐未有期。節園蔬長。能瞭乾見餉。俾識故鄉風味。亦至幸耳。

答劉毅齋爵帥

伊犁僅得一塊荒土。各逆相莛以安。不料和議如此結局。言之腐心。新疆改行省。冀可長治久安。否則邊地多於腹地。武官多於文官。轉瞬不堪設想。文卿和甫諸公。只顧目前敷衍定事。似無暇謀及久長。都人士能深知此事原委者少。恐無復議論及之者矣。麾下所處頗難。惟有靜聽廷論一法。然隨衆畫諾。卻似不可。弟上年在樞垣。曾以伊犁復後。必須置省。機不可失。爲賢王誦之。不知仍能記憶否。遇有機會。或當補牘。

與周荇農閣學

蒞事以來。以治水行鹽爲功課。而精神所注。則海防。蓋必治水而後可保民。能保江淮以北之民。不爲島人所驅使。而後兩江之兵。不可勝用。島人之勢日孤。官軍日壯。彼圍視皆有戒心。又兼以頻年貿易不興。攪用重而利息少。除鴉片外。無不折閱者。再歷歲時。折耗多。卽門

面亦難敷衍。其不爲漢口九江之自閉洋行。停帳歇商者。幾希。彼時復租界而仍歸之我。乃意中事耳。保民之道。必以養民爲先。六府之修。以水利爲亟。江淮之間。地廣而土沃。若能新修溝渠。培厚加廣。挑淤濬淺。一如隴上新疆治法。則水有所歸。旱潦有備。墾荒成熟外。加以桑棉之利。則民可自贍。又可易洋人銀錢。以供賦稅。彼之未富。安能與我之本富爭。彼之淫巧。安能與我之食貨比。操贏以馭其絀。一轉手而富強且十百於泰西矣。

與郭筠仙侍郎

前奉尊函。闕然久不報。以委遞摺件。尙稽附進故。茲於十月五日拜發。計數日內可奉批回。但仍發兩江或徑發湖南。則未可知耳。高麗事已旬當完竣。此乃合肥全集壓卷之作。然非諸將謨定後。（吳提軍長慶膽識尤偉）合南北洋全力圖之。恐不臻此。雲貴改界。岑彥卿才氣固勝蔭渠。而精力正盛。足任馳驅。輿象亦復豪贍。當指揮如意。尊論謂南宋識議無足取。弟以今日人才衡之。似南宋尙勝一籌。以彼國勢日蹙。遑言長駕遠馭之規。茲則金甌無缺。策士勇將。又足供一時之需。乃甘心螻屈。一任凌夷如此之極。洵有令人難解者也。鹽務漸有轉機。部議似亦稍能領會。而農田水利。一氣呵成。蓋得力於閱伍之餘。文武畢集。士農

環侍。隨到隨看。隨議隨辦。故支幹相承。上流下接。師水之智。用士卒之力。瞬息改觀也。蒞事未滿一年。而氣象一新。較之兵燹之前。尙覺遠勝。公得毋笑其浮夸否。蓋於明正駕扁舟來游。同觀厥成也。見加飭道府。督率修渠築壩。浚淤洩底水。待新漲。一俟春融。再親臨勘驗。勅爲一編。以爲歲修準的。俾江北之民。不復食島族之餘。而海疆亦可戰可守。自強之道。其在此乎。姑略報一二。以慰公餘。俟司馬橋酒酣耳熟時。一一陳之可耳。

答李少荃傅相

接讀四日惠書。敬悉所云法越事中變。亦無足怪。越官劉永福。獲此全捷。實足塞法人之膽。法人協以謀越。增兵集餉。亦勢所必至。然傾國出師。亦難持久。再衰三竭。則漁人之利也。劫剛在法都既久。覘其勢。不能大舉犯越。自非無所見而云然。此次雖添派團甲及兵船四隻。陸軍三千。爲報復計。果使越軍再接再厲。則兇鋒全挫。安能越紅江上闕。演粵邊境乎。岑彥卿夙饒膽略。此次暗助劉永福。已見一斑。上年疏請連濟槍礮。已略微效。鄙見似須連水雷十餘具。儲存廣西。并派此間能放水雷者解往。聽彥卿酌撥前敵。更當得力。如彥卿無須用此。將來台旃端臨。亦不能不預籌此種利器。是勞費終不虛擲耳。尊處需調淮軍。一接大咨。

卽常派營慎防湘軍如章作堂所部七營尙能得力當以三營交王蓴農帶領隨征亦作堂意也。此軍本壯武舊部營哨各員均壯武當時勇夫令其歸蓴農管帶適符其願已函致石泉與其商定俟得覆信卽以奉聞。王朗青英銳能戰亦一時之選。僅帶兩營自期游刃有餘。昨得其來稟擬先回永州挑募舊部比已批准專盼尊處調札以便遵行也。至尊軍餉責之兩江萬難籌措然亦不敢不勉。今日衙參已與司道言及當據實上陳無義不搜冀蒙鑒允耳。

詩

辛卯夏仲兄客武昌送別後卻寄

西風吹孤禽。瘁羽身不肥。人生奔車中。志士無光輝。憶昨別兄時。盍旦鳴朝暉。念當遠焉去。有淚不敢揮。開懷相慰語。蹙蹙恐君悲。攜手上河梁。去矣何時歸。別君未兩旬。巨浸城四圍。頽冥麾黑幟。闖浪堆頽黎。日月澹無色。蛟龍專其威。哀哉澤國民。倏忽阡廬非。傳聞鄂渚間。井竈嬉魚龜。念君不得往。如飛鳥黏竊。嗟予少失祐。孤露唯君依。三年客邵陵。相見時亦稀。貧居豈能久。誰復惜分離。華顏苟無凋。白首終可期。塵衣纔一洗。忽復載行旗。江湖阻修遠。我懷君豈知。蛟龍勿君慕。蝮蝎毋君危。一家盡死喪。君我先人遺。念茲并百憂。泣涕以漣漣。晨之西肆卜。默禱煩靈耆。遂遇離之九。卜士詳其詞。積陰臨陽曦。陰險陽則夷。行者遇此兆。上吉莫如之。憂思積中腸。欲信旋復疑。歸爲阿嫂說。征途亮無羈。阿喜蹠踏來。強索紙背窺。鬱鬱低自語。對此增感歎。湘水去悠悠。大別山巍巍。顏色不可睹。況復音書希。故山有黃精。野澗多蕨薇。何當早歸來。與君共耨機。

癸巳燕臺雜感八首

世事悠悠袖手看。誰將儒術策治安。國無苛政貧猶賴。民有饑心撫亦難。天下軍儲勞聖慮。昇平弦管集諸官。青衫不解談時務。澆卷詩書一浩歎。

紇烈全金功亦鉅。李悝策魏術非疏。公孤自有匡時略。災異仍來告糴書。不惜輸金籌拜爵。初聞宣檄問倉儲。廟堂袞袞羣英在。休道功名重補苴。

西域環兵不計年。當時立國重開邊。橐駝萬里輸官稻。沙磧千秋此石田。置省尙煩它日策。興屯甯費度支錢。將軍莫更紓愁眼。生計中原亦可憐。

南海明珠望已虛。承安寶貨近何如。攘輸詣俗同頭會。消息西戎是尾闕。邾小可無懲蠱毒。周興還誦旅獒書。試思表餌終何意。五嶺關防未要疏。

湘春門外水連天。朝發家書益惘然。陸海只今懷禹蹟。阡廬如此想堯年。客金愁數長安米。歸計應無負郭田。更憶荆沅南北路。荒村四載斷炊煙。

青青柳色弄春暉。花滿長安晝掩扉。答策不堪宜落此。蘇句壯游雖美未如歸。故園芳草無來信。橫海戈船有是非。報國空慙書劍在。一時鄉思入朝饑。

已忍伶俜十年事（杜句）驚人獨夜老雅聲。一家三處共明月。萬里孤鐘逐弟兄。北郭春暉悲草露。燕山昨日又清明。宵深卻立看牛斗。寥寞誰知此際情。

二十男兒那刺促（長吉句）窮冬走馬上燕台。賈生空有乾坤淚。鄭緊元非令僕才。洛下衣冠人易老。西山猿鶴我重來。清時台輔無遺策。可是關心獨草萊。

二十九歲自題小象八首

猶作兒童句讀師。生平至此乍堪思。學之爲利我何有。壯不如人他可知。蠶已過眠應作繭。鶴雖繞樹未依枝。回頭廿九年間事。零落而今又一時。

錦不爲幘自校量。無煩詹尹卜行藏。君王愛壯臣非老。貧賤驕人我豈狂。聊欲弦歌甘小僻（史館謄錄積勞得敍例與一令）誰能臺省待迴翔。五陵年少勞相憶。燕雀何知羨鳳皇。

祗恐微才與世疏。聖明何事恥端居。河渠賈讓原無策。鹽鐵桓寬空著書。學道漸知箴快贖。平情敢妄賦枯魚。幽閒歲月都無累。精舍優游樂有餘。

十數年來一鮮民。孤雛腸斷是黃昏。研田終歲營兒哺（父授徒長沙先後廿餘年非脩脯無從得食）糠屑經時當夕飧（嘉慶十二年吾鄉大旱母宵糠爲餅食之僅乃得活後長

姊爲余言也傷哉。五鼎縱能隆墓祭。隻雞終不逮親存。乾坤髮痛何時畢。忍屬兒孫斲菜根。

機雲同住素心遠。堪歎頻年事事非。許靖敢辭推馬磨。王章猶在臥牛衣。命奇似此人何與。我瘦如前君豈肥。來日連牀雞戒曉。碧湘宮畔雨霏霏。（兄所居五代馬氏碧湘宮廢址也）
九年寄眷住湘潭。廡下栖遲贅客慙。嬌女七齡初學字。穉桑千本乍堪蠶。不嫌薄笨妻能逸。隨分齋鹽婢尙諳。賂史敲詩多樂事。昭山何日共茅庵。（素愛昭山煙月之勝擬買十笏地
它日挈孥老焉）

旅館孤懷鬱不舒。屋梁見月更愁余。可憐禽鳥猶求友。獨隔關山祇寄書。楚澤涼風吟別夜。燕臺斜日惡歸初。安能飛夢四千里。人海茫茫一執裾。

唐初身判原無格。漢室侏儒例免飢。仕宦何心爭速化。人材似此不時宜。秋山綴石鐙前影。春筍聞雷領底髭。祇待它年衰與老。披圖聊得認參差。

感事四首

愛水昏波儘大化。積時汙俗企還淳。興周有誥拘朋飲。策漢元謀徙厝薪。一怒永維天下祐。

三年終靖鬼方人。和戎自昔非長算。爲爾豺狼不可馴。
司馬憂邊白髮生。嶺南千里此長城。英雄駕馭歸神武。時事艱辛仗老成。龍戶舟橫宵步水。
虎關潮落曉歸營。書生豈有封侯想。爲播天威佐太平。

王士孰容營狡窟。巖壘何意失雄臺。癡兒盍亦看蛙怒。愚鬼翻甘導虎來。借劍願先卿子貴。
請纓長盼侍中才。羣公自有安攘略。漫說憂時到草萊。
海邦形勢略能言。巨浸浮天界漢蕃。西舶遠踰師子國。南溟雄倚虎頭門。縱無墨守終憑險。
況幸羊來自觸藩。欲效邊籌裨廟略。一尊山館共誰論。

題羅權如讀書秋樹根圖

人生無處無書讀。長歎幽人自不閒。入畫一株霜雪影。照君廿載鬢毛斑。圖開松桂經千卷。
夢到梧桐屋兩間。(梧桐爲先祖課諸孫處)題罷憑君發逸興。弟兄舊約媿湘山。(余與仲
基早歲有讀書湘山寺之約)

陶氏園聽彭山人琴

山邊亭子花之陰。耀仙開囊調素琴。洞庭秋老葉初脫。夜壑春深龍一吟。中有羲皇不盡意。

世無夔曠誰知音。我家湘上水雲窟。歲晚鼓棹來相尋。

催楊紫卿畫梅

柳莊一十二梅樹。臘後前春花滿枝。娛我歲寒賴有此。看君墨戲能復奇。便新寮館貯瓊素。定與院落爭妍姿。大雪湘江歸臥晚。幽懷定許山妻知。

題鄧厚甫采芝圖時鄧以被議去官

飄然曳杖息塵肩。歸種都梁二頃田。卻恐采芝雲霧窟。世人又謗是神仙。（陸放翁寄朱子詩慎勿采芝驚世俗恐人謗道是神仙）

壬戌九日軍次龍邱作

萬山秋氣赴重陽。破屋頽垣闢戰場。塵劫難消三戶憾。高歌聊發少年狂。五更畫角聲催曉。一夜西風鬢欲霜。笑語黃花吾負汝。荒畦數朵爲誰忙。

題鄧完白先生觀日圖

海天冥冥莽空闊。下視齊州九點著。囊中有客翩然來。日觀峯頭躡雲屨。高吟琅琅天風隨。手攜短筇導雙鶴。鶴去經今七十年。圖中之人仙乎仙。劫餘文字照千祀。始信仙人終不死。

八歲孤雛今老儒。猶抱遺經究終始。飄然曳杖來漢東。知我厭見旌旗紅。眎我茲圖熨兩眼。耆宿獲覩乾嘉中。我亦好書粗解事。五經學究我所志。無端恩迹塵埃間。朔雪炎風飽嘗試。適辭甌海出重嶠。又作崆峒持節使。下馬走筆題此篇。羣盜縱橫獯豸熾。它日何人看畫圖。中有勞人數行字。

崇安道中和同征諸子用原韻

直從甌海指黃河。萬里行程枕席過。道出中原宸極近。膽寒西賊楚聲多。尖叉鬪韻看題壁。競病聯吟更荷戈。回首四年泥爪迹。明當出嶠意如何。

百二舊關河。郵程次第過。捫碑知字少。懷古覺詩多。殺賊仍書檄。降羌任倒戈。安危仗公等。於意定云何。

題王君遺象有序

無錫王君樂山。恩綬以知縣發湖北。咸豐五年。粵賊三陷武昌。時君以二月十六日抵會城。城閉不得入。鄂撫部陶文節公恩培。武昌知府多公山。將死之。止君毋入。君執不可。卒攜子燮及僕人丁貴吳福壽入城。次日城陷。死之。子僕同殉。事聞。詔贈知府銜。子

雙主薄銜。諭賜祭葬。入祀昭忠祠。世襲雲騎尉。六年十一月城復。君次子庭楨奔武昌。徧覓忠骸不得。返無錫。奉衣冠招魂葬之。同治五年。敕無錫建專祠。其明年。余持節西征。道出襄陽。庭楨時權知襄陽縣事。求爲君篆衣冠墓銘額。并出君及子雙遺象徵詩。賦此。

人生墮地必有死。死者體魄同蛻委。所貴浩氣萬古存。能塞蒼冥立人紀。王君死鄂得死所。況復殉父有賢子。朝野爭傳忠孝名。遺骨誰收溝壑裏。楚吳氛祲一時銷。歸然衣冠照清泚。歲時簫鼓走遺民。奠以溪毛薦芳芷。魂來江淮風月清。魂返楚塞暮煙紫。駕玄豹兮導兩螭。峨峨高冠曳雲履。神仙中人不易見。我瞻遺象肅然起。後欲有考於誰徵。大節堂堂視此誄。

吳桐雲西來且喜且惱出冊索題漫書二絕句

浩蕩風塵使節邊。故巢回首意茫然。五年一覺清涼夢。茶半香初海國天。
雙清心迹擬名臣。朔雪炎風見身。且蹴昆侖令西倒。再勤詩酒老湘濱。

澄清閣公謙詩

月出東斗間。忽來黃河池。池底見明月。化工人所爲。黃河急東流。爲我留遲遲。蕩漾三池接。

風吹生微姿。澄清曲復曲。寸且百里規。迤邐射堂東。汨汨吐清漪。散布走街塵。飲和挹注茲。東家辦罌盎。西家濯槃匱。一拭塵垢痕。且沁心與脾。獨忿祛宿恙。生者百歲期。甯誇九里潤。人民歌於斯。河仍日夜東。有月長照之。同治十一載。中秋讌集時。發興歌滄浪。敢擬洄酌詩。

題顧超秋山無盡圖

行盡秋山路幾重。故山回首白雲封。阿超知我歸心急。爲畫江南千萬峯。

秋日泛舟泉湖作

我心如白雲。舒卷無定著。身世亦如此。得泊我且泊。昔歲來蘭州。隨槎想碧落。黃河橫節園。牛女看約略。以槎名其亭。南對澄清閣。走筆題一繫。鄉心慰寂寞。今我訪酒泉。異境重湖拓。杖擲出新泉。隄周三里廓。洲渚妙迴環。樹石紛相錯。渺渺洞庭波。宛連湘與鄂。扁舟恣往還。勝躡游行屨。邦人詫創見。旁睨喜且愕。吾黨二三子。時復舉杯杓。頻年南風競。靖內先戎索。出關指疏勒。師行風掃箒。強鄰壁上觀。弭伏一邱貉。老我且婆娑。勉司北門鑰。桓桓夫子力。盛美吾敢掠。西顧幸無它。吾歸事錢鏹。水國足魚稻。笱蕨耐咀嚼。梓洞泉柳莊。况舊有邱壑。一觴酌飛仙。有酒盈陂灤。不飲酒不溢。十日飲不涸。仙來笛悠揚。我來歌且喞。豐年醉人多。

仙我共此樂。他年儻重逢。一笑仍夙諾。

題瞿子玖學士先德自濟圖分鐙課子圖有序

余舊識瞿魯青翁及長君石雲弟季。咸豐初。授徒長沙。時何子貞子敬回湘。寓居相近。每讌集。必與魯青楊紫卿熊禹臚借。流連詩酒。諧謔間作。意相得也。旋聞寇警。去。比余復至長沙數。數晤石雲。追話往事。而魯青則鄉居不復出矣。魯青翁倜儻自喜。軀幹甚偉。素工丹青。不輕爲人作。嘗以自畫小像見示。生氣遠出。呼之欲騰。并言諸子從母授讀。能文章。自忘其貧也。石雲曩弟旋聯舉於鄉。諸孫多附學籍。子玖且以學士視學河南。清譽藉藉。還朝補官。出翁所畫自濟圖。泉湯太夫人分鐙課子圖。屬篆幀首。並索詩。休沐之暇賦此。光緒七年七月。

湘城跌宕飲文字。五十年前老畫師。解帶自量松十丈。橫經殿閣見孫枝。（右題自濟圖）
紗幔傳經賢母錄。長沙故事又清門。書聲斷續鐙光裏。三孝廉兒學士孫。（右題分鐙課子圖）

題羅忠節公遺像

紫光畫閣且遲開。競羨長沙好秀才。省識舊遊如昨日。春風歸詠定王臺。（咸豐初公館賀耦耕尚書里第及門諸子假館長沙東郭定王臺就公請業時李公續宜王公彝李公杏春咸在余嘗與劉公蓉晤公於此）

題許蘭友廿四橋圖

桑竹沿隄宿麥饒。舟行鏡裏過花朝。飛輪直送江入海。不數春光廿四橋。

文

廣區田制圖說序

區田之制。農書傳之。創自伊尹與否。未可知。若語農務之精良。古近無以過。蓋論農之理。具六善焉。論農之事。兼三便焉。今法田必秧種。宿水漬穀。夜晾晝沈。番釀鬱蒸。偁使芽。甫芽布諸秧田。春陰多雨。秧悴不耐。諺謂之酣。晴迺起。否竟浥瀾不成苗。長二寸以上始分栽。併手忙插。一夫日畢二三畝。嫩綠數莖。欹臥白水中。貴種賤植。於茲甚矣。夫嘉禾視乎種。未有種不善而禾善者。一穀三移。元氣屢泄。親下之本。既久去地。傷母之體。豈能全天。兒在胎中。賊其天和。墮地而哭。尪悴善疴。良媪其將如爾何。世傳撮穀種宜稼而豐苗。利較恆田倍。然指撮穀。足踏水。水漾穀不安簇。耘盪艱。且託根已淺。不耐酣。病差與秧種等。區田法。布穀於區。手覆按令著土。足履區旁高土。水不縈。穀不易其所。有撮穀之利而無其病。善一也。凡農之道。厚之爲寶土。宜禾。糞益土。糞欺土者穰。土欺糞者荒。是故上農治田先治糞。糞與田稱。禾之良也。今農田一畝。糞多者十數箕而止。農糞之薄。禾亦報之薄。徐文定公稱張宏言以禾

壅法治田。今田一畝。亦得穀二十餘斛。多恆田三之一。區種法。區用熟糞二升。一畝一千三百五十二升。旁土不糞。土受糞者止畝四之一。實土戴糞。糞圍禾。質取其熟。力取其多。以視恆田倍十有加。善二也。禾畏旱畏風。今田竟畝不爲畎。費水多。宿水盡。輒翹首望澤。不時則損。區種法。費水止今田四之一。水易足。又禾根深。禾葉茂。雨澤雖遲。實土常潤。蔭穀能早。凡灌稼。溝納外水。自區角斜入。遞注之。歲甚旱。五六番足矣。區深一尺。禾自出葉已上。至結實時。旋助區土壅之。無慮七八寸。振林之風不損。善三也。禾畏蟲。今農田一畝。爲禾二千餘科。疏者千數百科。禾長掩畝。氣不得利。鬱蒸所至。并鍾五賊。積熱在土。盛雨卒加。爲溼裏燥。根則受之。是生蝨。日正烈。忽小雨。雨自葉底流注節間。或當午納新水。熱與溼薄。厥病均是生賊。露未晞而朝。激紅霧未散而溫氣蒸。著葉而凝。是生蟻。熱附於根。溼行於稟。時雨時暘。二氣交錯。是生螟。不雨不暘。蘊氣難洩。日霾宵暘。是生蠶。凡厥五賊。賊禾之渠。未化之先。遇風洒除。區種法空四旁。風貫行間。纏纏然。鬱者通。結者解。蟲類無由滋。書曰。上農治未萌。此故勝也。惟蝗與蝻。未由獨免。然耕道交互。足不踐稼。卯午之間。勤樸。逐視它田。便善四也。有農焉。地饒而糞強。苗長而葉光。望之。非不油油然。蕃且良矣。逮日至。實暘葉豐。十穀五空。於諺

爲肥。嗚美其始而惡其終者。何也。纖根旁出。遇浮泥而滋。直根力衰。遇實土而止。得濁氣也。多。得清氣也。微。陽極陰絀。葉繁而心不充。拙農不知。乃專咎夫風。旨哉周髀之論稼也。藕禾時。足躡禾四旁。令浮根斷。如是者再。其穀倍豐。其米耐舂。區種務勤。鋤厚壅。禾生葉。馬耳已上。卽鋤。比稼成。數不啻十。徧墮土附根。深可七八寸。旁根斷。正根王。穗蕃碩而長。圓粟而少糠。米飴以香。多沃而食之彊。善五也。先農盡地方。又思地力乏。息者欲勞。勞者欲息。棘者欲肥。肥者欲棘。歲易之法易其田。代田之法易其耒。禾不欺土。土不竊穀。上之上也。今農爲田。寧普種而薄收。地稀種。則詫禾稀。穀則無究之者。嘻其惑矣。區田歲易其所。不甚其取。旋相爲代。地氣孔有。善六也。匪唯六善。是有三便。今農惟壯丁治田。老弱婦穉。供饋餉小運。鮮以充耦。區田用力雖頻。不甚勞累。力小者亦任。開區治田。擔糞引水。壯夫任之。和土布穀。鋤草土壅根。餘丁力可給。地近足力省。鋤小手力省。隴土高。體不霑。足不塗。犁旣廢。省牛牧與芻。肩不重負。腰脚便。無前牽後拽之劬。老自六十已下。穉自十歲已上。主童婦女。自治饋應餉外。皆量力而趨。循行耕道來徐徐。盡室作活如嬉娛。人無冗而力無虛。其便一。貧農賃田。先奉田主上莊錢。歲租多寡。視此爲差。吾鄉上田畝約錢二千許。歲租石五斗。湘潭西南鄉。上

田畝十金。或減其二。歲租一石。大率湘潭上農賃耕一畝。得穀可四石。歲租一石。一石充糞。直庸錢雜費。上莊子錢應除一石。餘迺爲佃農利。吾鄉上農賃耕一畝。得穀三石六斗有奇。歲租石五斗。一石充農直庸錢雜費。上莊子錢應除斗許。餘迺爲佃農利。它郡縣佃例不一。茲固其概也。歲歉收。或豐而穀賤。佃農措措終歲。僅及一飽。次虧子錢。又次乏耕資。負租不能償。或以上莊錢抵。或徑謝地。還取上莊錢。棄耕圖暫活。中下農與田更無論已。區田法。治田少而得穀多。壯丁一人。但佃二三畝。上莊錢少。租不外科。餘丁合作。自庸其家。糞雖多。準恆年廣種。所需又何加焉。其便二。舊說區獲四五升。畝計三十石。食五人。糠少粒圓。斗得八升。總爲米二十餘石。初年學種以半計。卽以半計。計亦非左。數口之家。力作不惰。凶歲能殮。豐年大可。既高吾廩。復通人貨。易乏爲饒。反瘠爲沃。效莫捷焉。其便三。是故讀書養素之士。世富習耕之家。未作趁食之民。游手無俚之子。皆能自營轉雇。稱力而食。一家爲之一家足。一邑爲之一邑足。天下爲之天下足。聚民於農。人樸心童。几遽之理。於焉隆矣。嗟乎。吾言區田之利。吾農重思之。不誠如此乎。乃驚其土省而獲多。又畏其煩數不易治。輒置之。嗟嗟。人心無古今。習故安常。莫適爲倡。或間爲之而不悉其法。或厭其煩數而意爲增損。利不及

古則倦生矣。嗟夫。此區田之制所爲旋作旋廢。彼作此廢。孤良法於數千百年而未能多觀其驗也夫。

慎齋詩文鈔序

仲兄旣沒。余求其遺稿。兄子潛。以寫本交子孝威。寄余蘭州。余屬施孝廉補華。校字。周編修崇傳。覆審畢。寄王觀察加敏。刊之鄂中。余兄弟三人。侍先公讀書。比長。不名他師。長伯敏。能文。蚤卒。先公傷之。故課仲季書。不如伯之嚴。詩古文。令略識塗轍而已。不責其專。且工也。道光十二年。余與仲兄同舉於鄉。出與諸老先游。嘗以文學竊時譽。中間課徒自給。去家輒千百里。不嘗聚處。歲晚歸。輒出所著錄相眡。或談國故。指列時事。不欲使外人知也。然學求心得。不尙苟同。嘗各持所見相辯難。得失未析。輒斷斷然。余所學不逮兄遠甚。兄於余所業。亦少許可。每劇談竟夕。爭駁不已。家人乃溫酒解之。酒後。或乃辯難。或遂釋然。雖諧語常露憨態。回思多可笑者。時事方棘。兄處弟出。蹤迹不可合併。同治六年。余由閩浙移督秦隴。兄攜子渾。眡余漢上。相持而泣。時兄病嗽久。肌膚銳減。飲饌量腹而後進。余則誦兄所作詩文。侑酌娛之。兄喜。每盡一觴。帳下健兒。環聽相睨而笑。蓋非復曩者送疑推難諠競之態矣。兄詩

尙樸忌巧。務苦吟。爲古文辭。先根柢。後枝葉。蘄進於作述之林。旣時流少當意者。晚研天又家言。於中西法各有所取。其推步占驗。有應有不應。兄不輕爲人言。或有言。余亦未能遽省也。工四體書。亦不常爲人作。晚年所愛少子渾。赴禮部試。病歸數月歿。兄旋以哭子過哀。病遂不起。自兄云亡。喪子孝威。兄子潛。算學甚邃。亦能文章。相繼而逝。計吾父諸孫存者。惟伯兄詞子世延。兄子澂。及孝寬。孝助。孝同。五人。而文學可期成就者。已喪三子矣。摧折之慘。猶幸兄不及見。余所爲敍兄詩文。涕泗交橫。不能自己者也。適奉出塞督師之命。啓行有日。和淚書之。

送劉克庵南歸寧親序

治天下之事。而能充周乎事之外者。視其人之才。任天下之事。而能貫澈乎事之終始者。視其人之氣。用其才於盤錯艱難之會。屢試不鈍。頻施不絀。帥其氣以赴事機之會。奮迅圖功。從容而就理。非其中之所存實有大過人者。而孰能之。國家重熙累洽。二百餘年。吏縛於簿書文法。不習詩書。將疲於趨踰應對。不諳戰略。於是谿谷之蠻。市井之奸。羣起弄兵。所至城鎮成邱墟。林莽冒血肉。盜起一隅。天下爲之震動。道咸之間。粵寇犯湖南。陷武漢。趨江皖。陷

金陵。分支北上。越河南而犯天津。如入無人之境。北方甫定。金陵賊又陷蘇州。分犯皖浙江西。橫溢各枝郡。狡猖益甚。余以咸豐二年。襄事湖南。張駱兩撫部戎幕。得盡識吾鄉豪傑長者。八九年間。湖南內固封守。外靖江鄂黔兩粵之寇。則邦人君子之力也。其間奸徒竊發。次第就誅。會甯鄉齋匪謀變。長沙一日數驚。余爲駱公言。君必辦此。未幾事定。余益信君之才。咸豐十年。湖廣總督方以積忤故謀傾余。文宗鑒其無他。特旨授四品京卿。襄辦兩江總督曾文正公軍務。余議募楚軍五千餘。自當一路。延君與王貞介公、楊石泉中丞、總營務。是時賊蹤徧布江西皖南。文正方駐節祁門山中。楚軍力戰於浮梁。景德鎮、樂平、婺源。斬悍賊數萬。然後午道常通。惟賊勢南趨。而浙事益急。杭州再陷。余由太常寺卿奉命撫浙。時則兩浙傾覆。無可圖存。金陵賊方分起掠地。圖撓大軍後路。以衛其巢穴。余率新集之軍。行荒殘之地。餉絕來源。計非速清衢嚴。規復杭州不可。而銳意東嚮。遏賊南趨。賊如由皖南出犯。則浙江邊境。江西腹地均危。而我平浙之軍後路又斷。因以討皖南分支之賊屬君。奏請別將一軍趨江西。余與蕪泉、石泉一意由衢嚴掃除富陽。餘杭、桐廬之賊。以規杭州。君率所部。卽行越皖南。會江西官軍。節節掃蕩。諸賊悉平。而杭州亦克。君旋奉諱。歸嗣金陵克復。餘逆勾

結粵東賊黨。由粵竄閩。陷漳州龍巖各郡縣。余赴閩討之。收復各郡縣。閩平。賊竄粵東。軍不能制。余時在漳州。奉命移軍入粵。節制粵東江西各軍。時提督鮑超所部叛卒。由湘竄粵。將與賊合。余令諸軍由鎮平追賊。又慮閩軍追賊急。賊或流入湖南。疏請君問道入粵。爲固湘助粵計。君急起赴之。師抵韶州。賊望風先遁。君語諸將。尾賊而追。非策也。當別由嶺道繞追。截其由粵出竄之路。余聞賊陷嘉應。星夜由漳州率親軍八百人。兼程入粵督勦。蓋亦擬會合諸軍。盡賊粵中也。比至大埔。則君已率師取道會甯上杭。先一日至矣。大喜過望。相與畫合圍之策。令諸軍各自其所分道。并進環而攻之。君麾所部。敗賊塔子壘。殪逆渠汪海洋。賊駭而奔。諸軍乘之。鎖圍急合。遂復嘉應州。窮追至豐順之黃沙嶂。盡賊而還。是役除解散新脅之衆。資遣歸里者五六萬外。凡東南漏逸渠目。及金陵首逆死黨戚屬。與鮑軍叛卒。均悉數種滅無遺。而十數年倡亂逋誅之寇始盡。天下不復憂髮逆矣。君旋謝軍事歸。余督諸將。分途捕治潮嘉漳泉興化永春各郡縣莠民。誅斬數千。而積年械鬪拒捕之案亦結。回福州數月。區畫閩事。籌海防。粗具端緒。復奉移督陝甘之命。所部將士。時已散歸粵浙。餘留之閩中。僅攜部曲三千餘就道。聞陝回盡變。制兵不可用。巨捻又闖入關中。勢頗猖獗。慮兵單

不足制賊。疏請於朝。自將所部。取道潼關。命君由湖南募選一軍。取道武關入陝。定計先剿。擒後剿回。務宣朝廷威德而持之以信。君先余至。與提督劉忠壯公、高勇烈公、擊賊渭水南。北相爲犄角。賊不得逞。余維擒馬而我步。騎兵多不足恃。平原列陣非所宜。擒賊專颯忽乘虛。遇官軍整密相持。卽結隊飛馳。掠陣而過。追軍如遠。則徐行以待。否則迅走旋轉。無端亟肆以疲我。制賊之法。宜渡渭夾擊。而渭北地勢平行。非多兵不可。默計所有兵力。不足分布。議以晉軍扼東岸防偷渡。秦軍渡渭。蹙賊涇洛間。聚而殲之。適賊由澄城入北山。陷綏德。劉忠壯躡蹤追之。賊復由間道南趨。出大河西岸。晉軍防河者。以河冰未結。船移東岸。可恃無虞。方調各營防北路。一夕南風驟起。冰橋成。東岸奸民導賊徑過。比劉忠壯追至。賊已先一日入晉矣。忠壯踏冰急追。余度賊將犯燕。憂惶無措。飛檄追軍。覓間道截賊去路。自率數營。由風陵渡河入晉追之。時君已由三品銜二品頂戴奉命署陝西巡撫。率所部討回。屢次獲捷。余抵燕齊。與劉忠壯會師討擒。擒平入覲。凱旋。屬忠壯駐軍洛陽。自率所部還秦。與君議討回方略。察陝回鷓張。所恃者甘回馬化。爲謀主。化。故新教巨猾。西自烏魯木齊、瑪納斯、肅州、西甯、河狄、甯夏。東至黑龍江、寬城子。凡新教之回。皆聽其指嘍。潛謀不軌者數十年。

反形已露。國家必討之賊也。金積堡阻渠流。地險而富。屢以撫誤官軍。所以售其欺者。官軍不能制賊。不得不飾言賊誠就撫。以苟目前。然此賊不除。禍且不測。甯惟西北之憂。大漠南北。將旰食。蒙古疲於奔命。神京肩背寒矣。定計分三路進兵。劉忠壯由洛陽渡河而北入晉。復渡河。取道綏德。徑花馬池。直擣金積老巢。甘軍出秦鞏。掃隴南諸賊。余率親軍由陝度隴。入涇州。埽平涼慶陽固原及鞏屬會甯安定之賊。以向蘭州。時陝西賊勢披離。北路要隘。均駐軍扼截。兵事稍閒。君以養親侍疾。陳情入告。報可。里五居年。色養承志。晨盤暮羞。與諸弟偕。太夫人顧而樂之。健踰常日。君私衷稍慰矣。惟念西事方殷。獨余以衰憊承其乏。意恆不釋。每舊部言歸。輒就詢西事何如。及余病狀。惴惴然時虞其不逮也。比隴患漸平。安西哈密亦復。余又奉督辦新疆軍務之命。自請移節肅州督諸軍。顧蘭州治所。爲轉饋總匯。新撫陝甘回衆。悉安置隴干。措注苟乖。事端立見。余方經營關外。師行絕域。沙磧冰嶺間。萬里而遙。勢難兼顧。又所部一百數十營。非有威望而恩信孚於人者。無以一其心力。俾就鈐束。乃復請之朝。起君幫辦陝甘軍務。報可。君請於太夫人。獲允所請。仍諭以勾當畢事速歸。君輕騎西行。至蘭州。余嚴裝待發。有日矣。握手一笑。如平生歡。商略軍事。建節啓塗。曉夜治軍書。調

軍食。督諸軍急進。克烏魯木齊吐魯番。下兵南疆。棋餘八城。速復。強隣震懾。皇威鬯焉。綜覈其時。撫治客土各軍。徵集餉需。遠餽邊塞。晝夜矻矻。如營其私。積勞致疾。猶力起視事。君於精密。常足軍食以相待。役車絡繹。不以缺乏累行者。改行餉爲坐餉。將士安之。天子嘉其功。由太僕寺卿。晉通政使。司通政使。嚮用方專。而君久病未愈。太夫人又頻書促歸。乃以養親治疾。疏請開缺。朝廷重違其請。特旨垂詢。余乃本其意以聞。并陳可以代君者。始荷俞允。茲於其歸也。爲文送之。以謂才足匡時。氣可蓋世。而仕止進退。原本忠孝。其志可喻諸人。如君殆未易數觀也。士之懷才負異。發爲事功。卓然有所表見者。或難免夫求全之訾毀。有道之寡恩。史牒所稱。曷可勝數。縱信乎友。獲乎上矣。返而求之家庭之間。不能無遺憾。由前言之。事功與乎人。在所自致。尙可勉而幾也。由後而言。則事之可知不可知。天爲之。非人所及也。君在官日淺。與人有終始無怨惡。上鑒其誠一。嚮用方殷。不忍過拂所請。始允歸養。君年六十。歸猶孺子。太夫人則八十有七矣。方扶杖倚閭。望君風雪歸來。以慰晨暮。古近以來。二三豪俊。爲時出者。不恆見之。而君獨際其盛。得之天者。不已厚歟。余方臥疾邊關。未能并轡言旋。視絳雲在霄。舒卷自如。不覺振觸於懷。如籠鳥之企鶴蹤也。

銅官感舊圖序

章君壽麟、銅官感舊圖冊。紀舊遊也。道咸之際。粵寇洪秀全踰嶺下湘。攻長沙不下。則掠民船蔽江而東。所過城邑不留。踞金陵。分黨四出。爲天下患。湘鄉曾文正公。時以禮部侍郎憂居在籍。詔起討賊。集鄉兵水陸東下。公在朝以清直聞。及率師討賊。規畫具有條理。卒克復江東枝郡。會師金陵。殲除巨憝。顧初起之軍。水陸將才未集。閱歷又少。往往爲猾寇所乘。時形困躓。公不變平生所守。用能集厥大勛。中興事功。彪炳宇宙。天下之士。皆能言之。推事功之所由成。必有立乎其先者。而後以志帥氣。歷艱危險阻之境而不渝。是故明夫生死之故者。禍福之說。不足動之。明夫禍福之理者。毀譽之見忘。吉凶榮辱。舉非所計。斯志壹動氣。爲其事必有其功矣。志士仁人成其仁。儒者正其誼。功且在天下萬世。奚一時一事之足云乎。而卽一時一事言之。則固有堪以共喻者。咸豐四年三月。金陵賊分黨復犯長沙。先踞長沙城北七十里之靖江。憑水結寨。步賊循岸而南。潛襲上游湘潭縣城。縣城繁富。麋市鱗比。賈舶環集。賊速至據之。文正聞賊趨湘潭。令署長沙協副將忠武塔齊布公等率陸軍。楊千總岳斌彭秀才玉麟等率水軍往援。偵賊悉銳攻湘潭。靖江守寨之賊非多。遂親率存營水陸

各營擊之。戰事失利。公麾從者它往。投湖自溺。隨行標兵三人急持公。叱其去。不釋手。章君
 瞰公在舟時。書遺囑寄其家。已知公決以身殉也。匿舟後。躍出援公起。公會戒章君勿隨行。
 至是詰其何自來。答以適聞湘潭大捷。故輕舸走報耳。公徐詰捷狀。章君權詞以告。公意稍
 釋。回舟南湖港。其夜得軍報。水陸均大捷。殲悍賊甚多。燬餘之敗船斷槳。蔽流而下。湘人始
 信賊不足畏。而氣一振。其晨余縋城出。省公舟中。則氣息僅屬。所著單襦。濡染泥沙。痕迹猶
 在。責公事尚可爲。速死非義。公瞑目不語。但索紙書所存礮械火藥丸彈軍械之數。屬余代
 爲點檢而已。時太公在家。寓書長沙。飭公有云。兒此出以殺賊報國爲志。非直爲桑梓也。兵
 事時有利鈍。出湖南境而戰死。是皆死所。若死於湖南。吾不爾哭也。聞者肅然起敬。而亦見
 公平素自處之誠。後此沿江而下。破賊所據堅城巨壘。克復金陵。大捷不喜。偶挫不憂。皆此
 志也。夫神明內也。形軀外也。公不死於銅官。幸也。卽死於銅官。而謂盪平東南。誅巢馘讓。遂
 無望於繼起者乎。殆不然矣。事有成敗。命有修短。氣運所由廢興也。豈由人力哉。惟能尊神
 明而外形軀。則能一死生而齊得喪。求夫理之至是。行其心之所安。如是焉已矣。且卽事理
 言之。人無不以生爲樂。死爲哀者。然當夫百感交集。怫鬱憂煩之餘。亦有以生憂爲苦。速死

爲樂者。觀公於克復金陵後。每遇人事乖忤。鬱抑無聊。不禁感慨系之。輒謂生不如死。聞者頗怪其不情。余比由陝甘新疆。移節兩江。亦覺案牘之勞形。酬接之紛擾。人心之不同。時局之變易。輒有顯得一當以畢餘生之說。匪惟喻諸同志。且預以白諸朝廷。蓋凜乎晚節末路之難。謠詠之足損吾素節。實則神明重於形軀。誠不以外而移其內。理固如是也。而論者不察。輒以公於章君及三兵皆不錄其功。疑公之矯。不知公之一生死。齊得喪。蓋有明乎其先者。而事功非所計也。論者乃以章君手援之功爲最大。不言祿而祿弗及。亦奚當焉。余與公交有年。晚以議論時事。兩不相合。及蒞兩江。距公之亡十有餘年。於公所爲。多所更定。天下之相諒與否。非所敢知。而求夫理之是。卽夫心之安。則可告之己。亦可告之公也。章君壽麟出此卷索題。識之如此。

陶文毅公節書馮定遠雜錄跋後

右陶文毅公節書馮鈍喙先生雜錄一冊。鈍翁在國初。爲吳中耆逸。著名江淮間。其行誼著錄。略具文毅自跋中。敬釋數過。語語平實切近。與明呂新吾、薛文清、及我朝魏環極、張考夫、朱柏廬、王朗川、數先生爲近。粹然君子之言也。近世士大夫。專尙考證訓詁書數之學。以闢

隙攻鷓爲功。至標立漢學名字。號召後進。於書之言身心性命者。相戒爲空疏迂闊之譚。棄置不一。顧其甚者。乃敢躬冒不韙。輕議先儒。及問以四子書。義不能答。嘗以利害細故。頽亂而無所守。嗚呼。可不謂惑與。文毅手書此冊。欲貽之家塾。是可知其用意之卓。措施之有本矣。跋尾自署道光十年閏月。按是時。公新督兩江。兼筭鹽政。庶事煩鉅。疑謗畢集之日。乃能把筆雍容。不易其素如此。至其筆勢縱橫。生氣遠出。竟數十紙無爛漫彫疏之病。非夫心淡神閒。精氣豐豫者。其孰能之。公以此冊贈王平舫先生。歲辛丑。余館公里第。先生自岳陽寄示命題。既錄副本。儲示公子枕。並識數語於後。

陶文毅公詩話鈔跋後

陶文毅公手書詩話一冊。賜女公子梅鏡夫人。塔王君師璞。梅鏡夫人者。公次女。以刲臂奉旌。世所稱陶孝女者也。孝女工吟詠。故公以是與之。王君出是冊。囑識數語。並爲余言。公自跋歷中外。所踐更皆極煩劇之區。它人爲之或不稱。公經紀庶事。無巨細。皆公自裁決。事盡辦。尋常章奏批判。以及賓朋題詠。倡和簡牘。往復之作。公餘皆自爲之。不以屬人。人亦無能代之者。暇或探紙作書。刻盡十數副。公嘗語人。吾豈欲名一藝邪。聊習吾勤耳。凡所手書。歲

可得百數十冊。旋爲人裹去。亦不自惜也。嗟嗟。由王君之言。世之徒以才識敏贍日公者。其足盡公邪。周王之命畢公也。曰克勤小物。夫畢公大賢也。保東郊大事也。於小物之勤曷取乎。蓋惟勤也。則清明之氣在躬。意念沈下。而不爲煩冗所絀。故古今之能任大事者。必於其小事不苟信之。公書此冊。在辛卯之冬。距臘數日耳。歲終。官司文書。冗雜尤甚。乃能從容作字。章體朗逸。無一畫苟者。是不可以觀乎。余故以是言之。將以諗天下之論公者。

名人書畫冊跋後

沅浦曾九。以所得桐城張氏舊藏明代及國朝諸老書畫扇而貶余。蓋雪琴觀察得之兵燹中。以贈滌生侍郎。侍郎舉以貺沅浦者也。二百數十年。桐城以文章科第名天下。張氏尤多聞人。近稍零落。復遭賊亂。此物乃爲曾氏所有。人事代謝。夏鼎秦遷。且淪泗水。矧零縑斷紙。僅足供世人愛玩者乎。摩挲此冊。思曩者愛玩之人。與書畫之人。所遭獨幸。不禁欣與感并。且悄然有所思。沅浦方當隨侍郎征皖。肅清淮甸。若訪得張氏子弟之佳者還之。俾其世守弗失。斯其高義。直與興廢繼絕等。湘之曾。其不勝於桐之張乎。試以此諗侍郎謂何如也。

徐熙庵先生家書跋後

右熙庵師道光壬辰科湖南闈中寄公子董園書書中所稱同事胡公爲瀟灣編修。瑛龍年伯爲白華編修。瑛龍本公丁丑同年進士。是科亦主山西鄉試。所稱先生爲常德陳海陽孝廉永皓。後官直隸知縣者也。故事鄉試同考官以各省州縣官由科目進者爲之。凡試卷經同考官閱薦。而後考官取中。同考所斥爲遺卷。考官不復閱也。是科宣宗特命考官搜閱遺卷。胡編修旣以疾先卒。公獨披覽五千餘卷。搜遺得六人。余忝居首。書中所稱十八名者也。當取中時。公令同考官補薦。不應。徐以新奉諭旨曉之。旋調次場經文卷傳視。各同考乃無異議。禮經文尤爲公所欣賞。題爲選士厲兵簡練桀俊。專任有功。書中所稱經文甚佳者也。後并進覽。當時闈中自內簾監試官以下。頗疑是卷爲溫卷。比啓糊名。監臨巡撫南海吳公榮光賀得人。在事諸公多有知余姓名者。羣疑益解。越三十七年。余視師秦隴。公孫韋佩襄治軍書。爲言榜前一日。公曾有書寄家。今存篋中。亟取視之。大致完好。余與仲兄癸巳春闈後上公啓事。亦附存焉。歲月不居。距公撤瑟之期。已三十餘年。公子董園亦下世十餘年。計同舉四十五人中。余齒最少。今亦五十有九。仲氏則近七十矣。關中回亂八年。古籍散佚飄零。百不存一。白頭弟子。尙得於橫戈躍馬時。得瞻遺翰。不得謂非幸也。抑余尤有慨焉。選舉

廢而科目興。士之爲此學者。其始亦于祿耳。然未嘗無懷奇負異者出其中。科名之能得士歟。亦士之舍科名末由也。惟朝廷有重士之意。主試者不忍負其一日之長。則興教勸學。其效將有可觀。於世道人心。非小補也。爰檢付手民。鈔諸木。俾三秦之士。有所觀焉。夫豈徒文字投契。知遇私感云爾哉。原本仍付韋佩藏之。

彭母王太夫人傳

太夫人紹興王氏。幼慧。習詩禮。父母愛之。擇塔嚴。年三十。歸懷寧三橋鎮巡檢贈光祿大夫衡陽彭公鳴九。生子玉麟。玉麒。粵寇陷江南。玉麟以諸生從相國毅勇侯曾公治水軍湖南。沿湘下洞庭鄱陽。歷江淮間。首尾數百戰。遂平劇寇。復江南。累官兵部右侍郎。世襲一等輕車都尉。爲咸同朝勳臣。侍郎治水軍時。方居太夫人憂。曾侯以國難起之。同治五年。侍郎奉行略。自濡須軍次。寓書閩中。求爲傳。距太夫人之歿。十有四年矣。余方移督陝甘。率師西討。舟次。檢侍郎所述行略。敬敘次之。俾天下後世。知侍郎名業之成。有自也。太夫人歸彭氏。不逮事其翁。事姑唯謹。嘗變其奩中物。爲姑養。并爲兩叔娶婦。以奉姑。贈公爲吏。廉好施予。太夫人節縮衣食。成其志。民有鬻婦償負者。婦誼不它適。太夫人爲贖其昏約。令爲夫婦如

初。陳氏婦喪其夫。夫弟偪之死。楊媪聞諸太夫人。雨夜。戶外有聲。嗚嗚然。如泣如訴。太夫人異之。祝曰。如爲陳氏婦者。三呼當爲申理。果三呼。乃白贈公。逮其夫弟。一鞠而服。論如律。贈公沈下僚二十餘年。薄積廉奉。寄所親。買田湘中。將老焉。比歸。檢校所親。匿其契券。不與。初猶許致薄少。繼且出無義語。時相詬訾。贈公以此憂鬱病歿。侍郎年甫十五。銳思報之。太夫人泣謂兒當志其遠人。毋速禍自危。事無左證。不得直也。所親又伺玉麒過市。擠墮深池。遇救僅免。於是彭氏之黨益忿。謀訟諸官。返所匿貲產。太夫人謝之。兒幸不死。吾不欲以爭產故。攜之赴官求理。兒如不肖。雖訟得之。終爲人有耳。所親知事不可掄。諾還瘠田十之二。然心猶不慊。輒藉故相陵轢。太夫人不之校。歲禋。採野菜作食。語兩子。移家郡治避之。侍郎補博士弟子員。學行重一時。以奇貧。爲人司質庫。未陽。咸豐二年。粵寇入湘。未陽一日數警。人多遷避。太夫人病中貽書侍郎。受人重寄。無虧信義。苟免也。必謹扃鑰待主者。寇旋由彬桂犯長沙。未陽免。侍郎始辭歸衡陽。而太夫人病日進矣。八月二十四日。終於衡陽寓舍。春秋六十有二。侍郎悲母。飽更憂虞。比祿豐而養不逮也。語及輒泣。余茲由章貢出鄱湖。溯潯陽。過廬山。歷蘄黃。以指夏口。皆侍郎昔時屢戰地。峻坂絕壁間。時見侍郎題咏。大書深刻。欽奇。

歷落。與江流俱壯。天生人豪。乘時樹績。偉矣哉。太夫人教之。忍忿毋苟免。斯侍郎所以建不朽盛業。而膺廟堂腹心之寄也夫。

李忠武公墓志銘

公諱續賓。字克惠。一字迪庵。湖南湘鄉李氏。曾祖本桂。祖白詩。皆以公貴。贈榮祿大夫。父登勝。公歿特恩加光祿大夫。曾祖妣氏張賀。王祖妣氏戴。母氏蕭。皆封一品夫人。公性端凝。不苟言笑。而膂力過人。能挽強弓。命中於百步外。嘗就武科試不第。咸豐二年。粵逆犯長沙。羅忠節公澤南。率生徒練鄉兵聽徵。調討賊。公從之。平桂東衡山諸土匪。明年賊圍江西省城。公隨忠節赴援。佐謝君邦翰治軍事。謝君戰歿。公代領其衆。解南昌之圍。克復泰和安福。還湖南。平永興工匪。復其城。四年七月。賊上犯岳州。曾文正公督水陸諸軍勦之。以忠武塔齊布公率陸隊。與忠節及公所部千人。會師轉戰而前。閱兩旬而岳州平。乘勝克復沿江臨湘蒲圻縣城。直抵武昌。連踏賊壘百數十。克復湖北省城。追敗賊於驢埠。盡殲之。復興國州。時賊踞田家鎮。北倚半壁山之險。南跨岡原。築壘數十。中有鐵鎖橫江。勢甚張。忠節與公反塔公。奮威衝盪。斃賊萬餘。江水爲赤。方事之殷也。士卒驕惰。多離伍潛逃者。公飛馬追擒三人。

揮淚斬於軍前。士氣乃定。整隊迎擊。遂獲大捷。曾公據以入告。謂有古名將風者也。自此長江上游。險隘已得。而江皖之賊。不知所爲計矣。公已洊保至直隸州知州。田家鎮捷報奏入。文宗大慰。詔以知府用。記名候簡。并賞摯勇巴圖魯名號。旋授安徽安慶府知府。進攻廣濟及黃梅縣。克之。嗣攻九江郡城。協勦湖口梅家洲諸賊。大小十餘戰。皆捷。而水師失利。賊復上犯。北軍走德安。武昌復陷。時曾公駐江西。饒廣告急。檄湘軍往援。先後克復弋陽、廣信、義寧州、各城。詔記名以道員用。旋奉檄回援武漢。巡撫胡文忠公林翼。謂公忠勇沈毅。必能爲國戡亂。悉以軍事委之。以克復通城、崇陽、蒲圻、咸寧。功加鹽運使銜。率師趨武昌。駐洪山。屢戰皆捷。咸豐六年三月。羅忠節中礮陣亡。公統其衆。擊却石逆。平城外賊壘數十。開長濠鎖圍困之。十一月。再克武昌省城。加布政使。記名以按察使用。乘勝復黃州、興國、大冶、蘄州、瑞昌、各城。遂直擣九江。悍賊林啓榮。久據地險。江路中梗。羣議不拔湖口。九江不可得。公力戰克之。旋復梅家洲。與水軍會復彭澤。夷小姑。泐僞城。事聞。擢浙江布政使。明年四月。克九江。殲賊數萬。磔林啓榮屍。九江平。賞穿黃馬褂。加巡撫銜。時皖中糜爛。胡文忠公請留公圖皖以固鄂。詔許之。公至皖。連克太湖、桐城、舒城、潛山。遂進三河集。平賊壘九。軍威大振。而逆酋

陳玉成、李世賢等率大隊來援。連營數十里。我軍衆寡不敵。相繼潰。公知事不可爲。躍馬入賊陣死之。與難者約七千人。事聞。上震悼。手詔曰。惜我良將。不克令終。尙冀其忠靈不昧。他年生申甫以佐予也。追贈總督。湖北江西安徽湖南立祠。予諡忠武。賞騎都尉兼雲騎尉世職。同治二年。特旨遣官賜祭。三年。克復金陵。朝廷推恩有功之臣。賞二等輕車都尉世職。公擊賊。每以身獨當其堅。軍仗亦以其精利者讓人。所餘薪資。不入私囊。聞各營餉絀。則分而濟之。餘悉以犒將士。以故人樂爲之用。聞公之歿。識與不識。皆爲之隕涕。公生於嘉慶十八年五月十八日卯時。其卒於軍。則咸豐八年十月初十日也。年四十有一。原葬星子山。同治八年。改葬四十四都鶴爪山之陽。丁首癸趾。配謝夫人。子二。長光久。二品頂帶。浙江補用道。襲三等男。次光令。特賞舉人。早世。女二。長適翰林院待詔宋式暉。次適中書科中書騎都尉兼一雲騎尉曾紀壽。孫三人。前普。廕生。候選同知。前晉。候選通判。前晉。縣學附生。女孫二。光久從余江南。總統營務。旬余。文藏諸幽。余老矣。不能文。茲略爲敘之。并系以銘。銘曰。衡嶽鍾靈。聯生偉器。率季從戎。聯鑣并轡。冒險衝堅。攻心鬥智。和衆分財。就難讓易。規復列城。游膺闡寄。上契主知。方隆倚畀。陷陣捐軀。成仁以義。我瞻三河。潛焉垂淚。鐵券酬庸。燕貽

後嗣陵谷不遷。貞珉永誌。

李勇毅公墓志銘

公諱續宜，字克讓，號希庵，湘鄉李氏。兄弟五，長續官，次續寬，次忠武，諱續賓。公其季也。公少好學深思，師事羅忠節公澤南，以躬行自勵。顏其居曰恥不逮齋。咸豐三年，與忠武公隨忠節募勇討賊，克復江西泰和、安福、義甯州，再克武昌、漢陽。以功洊擢花翎同知，知府用。加道銜。是時忠武公戰功卓著，名震寰宇，胡文忠嘗疏言續賓才堪濟變，而飭整營務，和輯士卒，實賴其弟續宜之力。時論翕服，上契天心。公之受知，蓋肇於此。當忠武公之圍九江也，曾愨烈國華圍瑞州，公以事至瑞，會愨烈以父喪罷兵事，公接統其軍，適蘄黃告警，公選千七百人亟援之，馳至黃州，連破賊壘，甫三旬而黃州平，詔賜伊勒達蒙額巴圖魯名號，連破賊於黃州、廣濟，與忠武會師，克湖口、彭澤，拔小池口、梅家洲、小姑山諸賊壘，論功擢道員。八年賊陷麻城，公以兵力薄，急切未能下，忠武公既復九江，移節與公同擣麻城，克之。加按察使銜。湖北兵事稍定，胡文忠規畫東南，疏請留公駐鄂，公議五路進兵，不果行。未幾，忠武公三河殉節，公拊膺大慟，收集潰卒，得數千人，胡文忠居母喪，奉詔墨經視師，抵黃州，與公

撫循簡練，湘軍復振。公旋簡授湖北荆宜施道。明年，粵賊石達開率悍黨二十餘萬，由廣東出江西南安府間道，徑竄湖南之桂東桂陽，圍寶慶。湘撫駱文忠策賊將由寶郡竄蜀，預調精銳八十餘營，濱資水立營，扼要布置，爲保守城關。遇賊入蜀之計，顧將領皆等夷，素不相下。非調威望素著，忠智如公者，總統軍務不可。并飭公自益陽甯鄉取道界嶺，直趨寶郡城北。速解重圍，與被圍諸軍約期夾擊。公自甯鄉兼程疾進，至郡北釀溪度浮橋，出賊不意，立破賊壘數十，擒斬無算。賊喪膽竄廣西，寶慶解圍。加布政使銜。時曾文正與胡文忠方議規復安慶省城。曾公國荃圍攻安慶，將軍多隆阿公圍攻桐城，調公東還，軍於桐城青草壩。適逆酋陳玉成率衆十餘萬援安慶，公與多隆阿公并力禦之。賊大潰。公以安徽按察使加二品頂帶，旋奉安徽巡撫之命。疏言保鄂宜先固皖，然亦須察度賊蹤緩急。茲賊自英山竄湖北，陷黃州麻城德安等城。臣宜提師回鄂，不能遽任皖撫之事。比公馳抵武昌，連獲大捷，收復各城。而安徽屬境亦先後克復。旋以安慶功，詔賞穿黃馬褂。文宗愴念胡文忠薨於位，嗣事殊難其人，特詔公移節撫鄂。公疏言皖中軍事，百倍於鄂，籲懇天恩，仍回安徽本任。上皆從之。時苗沛霖叛服無常，朝廷密詢勦撫機宜。公復疏主勦，上聽其議，詔授爲欽差大臣，而

公丁母憂。命仍署理巡撫。公疏陳哀悃。情詞懇切。賞假百日。回籍治喪。旋奉詔起復。墨經視事。公疏言強病赴皖。不敢稽延。懇開皖撫之缺。專辦軍務。途次復陳病狀危急。賞假四月。而勞瘁哀毀太過。卒以不起。時同治二年十月二十八日也。遺疏入上。爲震悼。敕照總督例賜卹。三省建立專祠。予諡勇毅。曾祖諱本桂。祖諱白詩。皆以忠武公貴。贈榮祿大夫。父諱登勝。特晉光祿大夫。曾祖妣祖妣母。皆封一品夫人。配彭夫人。子光英。安徽滁州直隸州知州。政聲亦著。滁人思之。孫二。前泮候選知縣。次前洽。女孫二。長訂余孫念慈。公生於道光三年三月十一日卯時。享年四十有一。原葬四十三都。同治八年。改葬鶴爪山。忠武公瑩右。光久請余志其墓。余與公相知久。近復申之以昏姻。不敢以不文辭。謹爲之銘。銘曰。將稱材武。厥本儒風。志爲氣帥。理直氣充。忠節羅公。學宗閩洛。生徒濟濟。咸抱偉略。壯武毅愍。蓋六七作。忠武勇毅。競爽齊名。三河陷陣。忠武以隕。公復嗣之。天悲人憫。仁者有勇。毅爲近仁。嘉名飾終。允副其稱。同懷同仇。死又同穴。仁人之風。光爭日月。

飲和池記

輪挹河流上西城。傍堞。池行東入節園。園西北阜。疊石峻嶒。高逾仞。疑積石也。阜下搏泥沙。

煨石爲灰劑。爲三池。欸之。靜極明生。黃變爲碧。如湘波然。繞澄清閣。供烹飪。汲飲灌溉。暇遊其上。謀目謀耳者。應接靡暇。樹石其髮膚。風其態度。月其色。或作響如球鐘。或涓涓如笙聲。則其聲也。禱曰。河伯。勺我多矣。其有以溉吾人民。池溢北出。少東池而南。繞瑞穀亭。如經三受降城。曲折銀夏間也。又南趨隆阜下。如出壺口。過龍門。而面二華。渠中石起。上立數石。則砥柱然。遵射堂東而南。清流汨汨。注大池中。命曰飲和。與古之大陸何以異也。用工萬九千餘。皆親軍力。未役一民也。用錢五百餘緡。使者之俸餘也。彌月畢。工役征繕之暇。未廢事也。呼民取飲。則餅壘瓢勺罌盎之屬。早具。乏者或以織柳之器來。或手掬而飲。老者弱者盲者跛者。羣熙熙然。知惠之逮我也。記此落之。凡有事於此者。條其銜名碑陰。

甘肅督署園池記

陝甘總督使者駐節蘭州。其署明肅王故邸也。基宇壯闊。園亭之勝。爲諸行省最。地接西域。冠蓋絡繹於道。宴會多在節園。所以盡賓主之歡也。嘉道間。那彥成公。三督陝甘。修葺益勤。園中有肅王烈妃大家。及從殉寮屬兩大家。相傳時露怪異。余入署。猶見前督部琦善公所署貞烈祠義士祠。樞於當日事迹。約略及之。戒人勿輕入其處。尋所立之祠。傾圮殆盡。三大

冢榛莽荒沒。蓋不可識矣。嗟嗟。世俗耽安樂而昧節義。非謂事不吉祥。言之令人寡歡哉。然當時甘之如飴。赴之恐後者。果何心也。古今捐軀就義者。豈不知生之可樂。而謂園亭鐘鼓。自樂其樂者。乃獨智乎。欣尙失所。世教不明。非細故也。同治五年。標兵飢變。前督部楊公賓從。多及於難者。楊公嘗建屋園西。爲位祀之。尋被人撤去。余旣廢延綠亭爲烈妃廟。復廢環碧山莊爲忠義祠。祀肅藩寮屬。而楊部督省從同列一龕。以其志節同。其死事之地亦同也。各爲文記之。并書此。詒來者。澄清閣下引黃河入。復出爲飲和池。映帶祠廟左右。清闕無塵氛。足妥幽靈矣。

漳州松關磨崖銘

率師徒。徂閩嶠。犁山穴。截海徼。龍巖復。漳州平。寇亂息。皇心甯。

天山扶欄銘

天山三十有二般。伐石貫木樹扶欄。誰其化除貽之安。嵩武上將唯桓桓。利有攸往萬口歡。靖鎮石字龍蟠戒。母折損毋鑽刖。光緒二年六月刊。

祭胡文忠公文

我生於湘。公產於資。歲在壬申。夏日冬時。詹事文學。讀書麓山。兩家生子。舉酒相歡。我甫逾冠。獲舉於鄉。見公京師。猶躡文場。縱言闊步。氣豪萬夫。我謔公。公步我趨。羣兒睨眎。詫爲迂怪。我剛而褊。公通且介。諧謔雜選。不忘箴言。庭誥相勉。道義是敦。公官翰林。我墊鄉里。中間契闊。蓋數稔耳。公守黔中。我居壻鄉。歲比不登。盡無餘糧。使來自黔。緘金贖我。欣欣度臘。返券舉火。道咸之交。盜起蒼黃。紅巾白梃。踰嶺下湘。我治軍書。入居湘幕。公帥湘人。建牙於鄂。六七年閒。湘固鄂完。我司其隱。公任其難。江漢滔滔。用武之國。公總上游。以規皖北。前羅後李。楚之良也。公帥以聽。位高心下。曾侯觥觥。當世所宗。公與上下。如雲如龍。養士致民。恤農通商。斂此大惠。施於一方。我方憂讒。圖隱京門。晤公英山。尊酒相溫。公憫我遭。俛焉若靈。憂蘊於中。義形於色。我反慰公。何遽至此。天信吾道。猶來無止。流連經時。辭公返湘。有命自天。襄事戎行。載旆東徂。數挫賊氛。公聞則喜。謂我能軍。我嘗戲公。吾豈妄耶。憂虞方殷。謬語相夸。安慶既下。黃州隨之。桐舒疊克。復徼與池。賊萃吳越。猶癰斂口。協力并規。庶殲羣醜。何圖我公。精勞成瘵。中興可期。長城遽壞。書來訣我。勞者思憩。君等勉旃。吾從此逝。啓函涕零。兩致良藥。蒼頭馳齋。七日至鄂。使還告我。詳訊寢食。公臥射堂。屏退婦稚。血盡嗽急。膚削骨

時頻聞吉語。笑僅見齒。鼎湖龍去。攀號不遂。以首觸牀。有泣無淚。嗚呼公乎。而竟已矣。殤彭淵蹠。均之一死。況公名業。震今鑠古。絳灌無文。隨陸無武。勞臣斯殫。歿乃暫逸。委形觀化。祛煩已疾。君子曰終。得正斯可。以此哀公。公應笑我。悠悠我思。不甯惟是。交公弱年。哭公暮齒。自公云亡。無與爲善。孰拯我窮。孰救我褊。我憂何訴。我喜何告。我苦何憐。我死何弔。追維疇昔。歷三十年。一言一笑。愈思愈妍。公之嗣子。我外孫夫。今我於外。罔恤其孤。公之先塋。屢思改卜。執紼未能。莫相負築。遺文無多。可以餉蠹。章疏琅琅。關係國故。當以暇時。爲之校刪。上之史館。藏之名山。我當力戰。罔敢定居。以終公志。以實公譽。儻遂生還。梓洞柳莊。當展公墓。兼省福郎。(謂公嗣子)靈輻西返。不獲走送。陳詞酌酒。聊以志慟。有酒如池。有淚如絲。盡此一哀。公其鑒茲。

祭楚湘閩粵忠義將士文

維昔徂征。載旆東馳。江西以奠。皖南是蔽。蕩平浙水。訖於海陲。逾嶠陟嶺。梅循并規。斬巢誠讓。種滅無遺。曰維公等。實左右之。如雷如霆。以張我師。我師還歸。公等莫隨。威尊命賤。遇蹇數奇。衝鋒蹈刃。戕體墮肢。自古有死。凜凜須眉。我媿生存。追想涕洟。涼月滿庭。南郊淒其。夢

寤吞聲。甚矣吾衰。命駕出郭。薄奠陳詞。塗車芻靈。以妄塞悲。大白飄搖。恍惚靈旗。素車白馬。赤豹文狸。桓桓毅魄。毋與鬼嬉。繁藻有薦。徧東南維。妥茲英靈。式鑒庶其。

祭宋三將軍文三將軍者。洎王吳公玠。信王吳公璘。武穆劉公琦。皆靜甯州人。祠在州城東。

嗚呼。宋自徽欽。至於高宗。金源爲虐。爭戰自雄。燕雲淪陷。汴洛塵蒙。舉族北轅。渡江一龍。臨安駐蹕。中原爲戎。維時洎王。奮起隴右。偕弟信王。且戰且守。實扼敵吭。嚴軍蜀口。金人善騎。性堅耐久。公以疊陣。弱前強後。仙人戰場。地與不朽。鋒鋒屢挫。乃舍而走。武穆劉公。赴官東京。東京不守。順昌是爭。銳斧如牆。拒馬如城。殺人如麻。慘不聞聲。八字之軍。強虜所輕。順昌旗幟。一見而驚。三公桓桓。闕如哮虎。韓岳束來。整我旗鼓。飲馬呼沱。抵黃龍府。胡丁孱朝。不究厥武。雄制上游。以庇南土。亦繇國祚。其歷百五。我去公世。閱七百年。獫狁孔熾。持節臨邊。道出隴干。父老攸傳。城東公祠。昔輯豆籩。城北公里。今仰遺阡。昔在順治。叛將控弦。神霧覆城。賊驚而旋。乾隆中葉。出五倍命。巨礮城頭。大聲莫震。忽三童子。擊鐵丸進。試以轟賊。煙開賊淨。詫爲神降。理固可信。神眷梓桑。呵護宜競。英風浩然。得氣之正。無弗之也。況茲郡姓。隴水濺濺。隴山峨峨。三忠式憑。於彼卷阿。自我徂西。鬢已皤皤。以我懷忠。知公靡他。朝馳羽檄。

夜枕瑠戈。神克相予。惠我民和。殲夷醜虜。洗甲天河。遂平西戎。永奠岷嶓。

祭高勇烈公文

昔吾持節。肇事龍邱。公從西來。與我同仇。兩浙既平。從我閩粵。爰總偏師。以佐九伐。東南底定。建牙惠州。極寇所往。海澨山陬。嶺海救平。關隴用亟。天子命我。徂征西國。公聞奮起。願當匈奴。寇戎交誼。賊騎我徒。兩載鏖鬪。不遑啓處。每戰必先。莫余敢禦。我徂燕齊。以勤王事。公戰關中。以殄異類。我來自東。公聞而喜。郊迎關中。如蟄初起。指陳兵事。較若列眉。進壁山河。(地名)協力同規。待發有日。鳴鉦伐鼓。既比我矛。又厲我斧。誓滅醜虜。奠彼西陲。胡圖梟獍。畏罪而徂。竊聞狂逞。頓忘厥初。夜呼澤中。異變以起。燭影斧聲。公長已矣。嗚呼公乎。而止於斯。不死於賊。殞於叛。斲。健兒列校。莫遺一矢。獨有僚佐。隨公以死。岑彭來歙。遺憾差同。厥氣浩然。長爲鬼雄。歿吾甯也。公復何恫。下人謀上。干國之紀。盡殲諸奴。屠厥犬豕。庶慰公靈。以嚴大防。公之聲績。紀於太常。飾終異數。請之於帝。遺孤藐焉。引之勿替。公之雙親。貧老龍鍾。我當分贍。罔敢不共。會卜其吉。遷神故土。巋然高邱。在瀉之浦。公其鑒諸。毋我攸謫。絨詞盡哀。公如來格。

劉果敏公誄

奉命討賊三人從。鞭弭周旋雲與龍。公領偏師戰江皖。後歷閩嶠來粵東。師行貞吉皇威。盡賊始返告成功。東南底定西事急。奉命移節治羌戎。公壁臨涇我臨潼。湖湘子弟千熊熊。狡寇渡河犯燕齊。我請北伐公留撫。秦中陝回度隴避其鋒。我歸自北來鎬豐。公急歸養憂心忡。一表陳情報曰可。別我南下殊恩。慈親倚閭搢短筇。公歸喜溢半畝宮。朝盤暮子羞職共。念我獨肩西事不得息。蹉跎歲晚憂無終。三閱春夏三秋冬。請纓絕裾將毋同。兩念縈攪愁心胸。我請於帝復起公。公以白母母意通。乃攜長劍倚崆峒。蘭州握手慰離。別公駐節酒泉封。新疆籌策煩郵筒。還我疆索皇武紹乾隆。公疾益進乞歸養。帝鑒其誠嗟匪躬。飭俟代者語從容。楊公臘八至蘭州。別十數載萬里還。相逢公喜如聞空谷。晨鐘絮語宵鼓琴。口講指畫興未慵。殘年風雪歸未得。曰歸曰歸待春融。楊公望日函兩至。公病忽劇肺氣壅。汗喘大衝息僅屬。口占遺疏語言重。國恩待報母養未能終。兩者遺憾將何窮。日辰加酉公已矣。良覲七日罹此凶。發函悲詫老淚盡。飾終典禮祈褒崇。在子維孝臣維忠。經權允協公無侗。既悲逝者一个弱。歲晏未歸餘老翁。肴饌盈盞酒盈鍾。委官奠醊更薦藉。新與死者

含笑生者哭。知公猶能鑒此衷。

曾 左 胡 合 集

左文淵公集 文

三十四

聯語

左氏家廟

咸豐二年。擬撰新祠聯。會寇事起。出襄戎幕。未及寫上。同治五年。由閩浙移督陝甘。治裝之暇。作此付兄子澂。子孝威。刊懸祠中。以示族子弟。

縱讀數千卷奇書。無實行不爲識字。

要守六百年家法。有善策還是耕田。

家塾

卅年前作此語以自夸。祇今猶時往來胸中。試爲兒輩誦之。頗不免慙赧之意。然志趣固不妨高也。安得以德薄能尠。謂子弟不可學老夫少年之狂哉。

身無半畝。心憂天上。

讀破萬卷。神交古人。

頻年馳驅。不皇課子。同治五年夏。威寬勛同來閩省視。適又移節西征。命其侍母歸湘。兒

求訓甚切。遂書此付之。縣諸闈子。見吾書。當如見吾也。

要大門閭。積德累善。

是好子弟。耕田讀書。

年踰五十。閱歷不少。嘗歎馮鈍翁所云。子弟得一才人。不如得一長者。誠有所見。惜近時士大夫。鮮有以此詔其子弟者。威、寬、勛、同、能、體、會、此、其、庶、乎。

慎交游。勤耕讀。

篤根本。去浮華。

天竺冷泉亭

同治三年秋。兩浙平定。游冷泉亭。山僧語余。亭舊有泉。自幾時冷起。峯從何處飛來。一聯燬於兵燹。乞補書之。余因題此。蓋欲爲彼氏作一了語也。

在山本清。泉自源頭冷起。

入世皆幻。峯從天外飛來。

漳州芝山書院

開元寺建自唐時。佛事之盛。志諫詳之。朱子嘗講學寺右。北溪勉齋諸先生從之遊。後人卽其地立祠。并建芝山書院。而址小於寺。諸生出入。必由是門。儒者病之。當時北溪先生曾有開元寺改建試院之議。然有其舉之莫敢廢也。咸豐三年。寺毀於寇。棟宇尙有存者。同治三年。粵寇陷城。盡付一炬。僧徒逃散殆盡。昔之連屋彙棟。并遺址不可復識矣。余督師過此。結營寺後山頂。適漳人議修復試院。因令卽寺故址爲之。且示以北溪舊議曰。陳先生命我矣。五年春。余自梅州班師過漳。試院工已逾半。觀察夏君、太守劉君、乞余題柱。因遂書此。芝山書院舊有石刻一聯云。五百年逃墨歸儒。跨開元之頂上。十二峯送青排闥。自天寶以飛來。相傳爲朱子遺蹟。此固無可考。然不啻爲今日言之也。

經始問何年。果然逃墨歸儒。天使梵王納土。籌邊曾此地。大好修文偃武。我從瘴海班師。

福州正誼書院

卅年前。湘塾見正誼堂。竊儒先書廿餘種。心誠好之。以不得見全編爲憾。持節來閩。訪求清恪刻彙舊本。蓋亦廩有存者。同治五年春。自粵班師回閩。開正誼堂書局。屬同人蒐致

開雕。意將以此續閩學之緒也。工未半。復奉西征之命。臨行。同學諸子。請數語志諸楹間。遂書此示之。并以爲別。

青眼高歌。異日應多天下士。

華陰回首。當年共讀古人書。

甘肅試院

光緒紀元。詔開恩科。時關隴肅清。分闈得請。肇建試院告成。入闈監臨書此。共賞萬餘卷奇文。遠擷紫芝。近攀朱草。重尋五十年舊事。一攀丹柱。三趁黃槐。

南菁書院講堂

釋志多忘。嗟老大。

讀書有味。且從容。

常德關帝廟

史策幾千年未有。上繼文宣大聖。下開武穆孤忠。浩氣常存。是終古彝倫師表。

地方數百里之間。西連漢壽舊封。東接益陽故壘。英風宛在。想當年戎馬關山。

蘭州忠義祠

生而爲英。死而爲靈。同是兩朝正氣。
忠以殉君。義以殉友。允稱一代完人。

蘭州烈妃廟

一杯荒土蒼梧泪。
百尺高樓碧血碑。

西甯昭忠祠

光緒建元之初。湟中旣平。毅齋京卿。建忠義祠。祀所部死綏諸君子。以妥忠魂。屬書聯語。
謹譔此懸諸楹。

黃流東注。湟水南來。任濁浪縱橫。百折終須趨巨海。
胡笳勿悲。羌笛休怨。認靈旂鬢髻。千載猶聞誦大招。

會甯昭忠祠

百戰樹功名。躍馬橫戈。豺虎叢中爭效命。
千秋懷義烈。刑牲擊鼓。麒麟冢畔與招魂。

宋三將軍祠

力捍蜀秦。東浙猶延漢歷。
神在桑梓。西賊敢犯吾鄉。

西甯風神廟

律協靜條鳴。試看豹駕螭驄。作雨成霖。都承清景。
化行知草偃。聽罷胡笳羌笛。阜財解慍。更譜虞琴。

明方忠文公祠

慷慨志猶存。一死奚惜。
名節事極大。十族何妨。

明練忠肅公祠

嘉名遠並西湖。異代恩加忠肅諡。

文藻應留故宅。金川人記浩然堂。

明鐵忠定公祠

執節坐庭南。百折不回。應知鼎石肝腸皆鐵。
奇忠鍾塞外。寸磔以報。誰識先生色目中。

明景忠壯公祠

緋衣坦腹舊有徵。詎料鈔延瓜蔓。
赤色異星急犯座。從知圖應天文。

江甯陶文毅林文忠兩公祠

三吳頌遺愛。鯨浪初平。治水行鹽。如公皆不朽。
冊載接音塵。鴻泥偶踏。湘間邗上。今我復重來。

鄧完白先生墓門

三古而還。代有述者。
九原可作。我所思兮。

漢口長沙郡館

道光壬辰甲午丁酉三度赴春試。皆於漢口郡館度臘。同治五年冬奉命西征。除日率師經此。則鶴樓早燼。郡館故址亦不可復按矣。適郡人有重葺館舍之議。書此志感。

千載此樓芳草晴川。曾見仙人騎鶴去。

卅年作客黃沙遠塞。又吟鄉思落梅中。

福建湖南會館

甌浙越梅循。海國仍持使者節。

隴秦指疏勒。榕垣還作故鄉看。

陝西湖廣會館

百二關河十年征戍。

八千弟子九塞聲名。

蘭州四川會館

刻銘天山石。

喜作巴人談。

蘭州澄清閣

同治十一年秋七月。入居節署。引河流注園中。登三池止之。汲用烹飪畢事。書此并爲聯。
懸兩楹。

萬山不隔中秋月。

千年復見黃河清。

飲和池

空潭瀉春。若其天放。

明漪絕底。飲之太和。

瑞穀亭

同治十一年秋。戎事漸定。安定會甯。狄道地產瑞穀。書此志之。

五風十雨歲其有。

一莖數穗國之祥。

望河樓

積石導流趨大海。
空同倚劍上重霄。

槎亭

八月槎橫天上水。
連畦菜長故園春。

壽楊石泉中丞

癸酉重九。石泉中丞壽日。撰聯語奉寄。回首甲子歲。是日高會於靈隱。豁光間。歷歷如昨事也。

知公神仙中人。勉爲蒼生留十稔。
憶昔湖山佳處。曾陪黃菊作重陽。

輓賀蔗農先生

宋儒學。漢人文。落落幾知心。公自有書貽後世。

定王臺。賈傅井。行行重回首。我從何處哭先生。

輓林文忠公

附公者不皆君子。間公者必是小人。憂國如家。二百餘年遺直在。
廟堂倚之爲長城。草野望之若時雨。出師未捷。八千里路大星頽。

輓鄧湘泉廣文

著作甚勤。四海聲名今北斗。
風流頓盡。百年文獻老南村。

輓陳堯農京卿

養志早抽簪。廿載山林傳舊學。
感時同起舞。頻年笳鼓入新詩。

輓楊菊泉明府

今日是效命之秋。子孝臣忠。有此須臾便千古。
半夜爲何人所刺。君恩母養。未能圖報待他生。

輓陶芭亭妻賀宜人

內外各名家。久聞闔政遺徽。樛木鳴鳩無異說。
乾坤有餘憾。試聽庭除落葉。藍橋杏酪續哀吟。

輓歐陽烈婦

痛絕未亡人。餓十八日而死。
是爲烈女子。歷千百載如生。

輓羅忠節公

率生徒數十人轉戰而來。克廿餘城。殺幾萬賊。是誼友。是忠臣。獨有千秋。羅山不死。
報國家二百年養士之澤。提三尺劍。著等身書。亦純儒。亦良將。又弱一个。湘水無情。

輓李忠武公

百戰聲威。吳楚東南支世局。
九重震悼。甫申生死繫天心。

輓王壯武公

是奇男子。是真將軍。萬里忠魂歸白竹。

爲天下憂。爲吾黨惜。兩行熱淚對黃華。

輓夏憇亭方伯

壯志挽宗邦。病時猶看吳鉤笑。
宦游悲末路。老去方知蜀道難。

輓劉武烈公

初援鄂州。繼援江州。忠於國。亦忠於桑梓。
得一名城。失一長城。死於賊。實死於小人。

輓羅壯節公

殉國死如歸。試看史牒千年。獨標大節。
知公含猶視。爲告王師六日。旋復孤城。

輓徐清惠公

老去怕傷心。那堪萬里長征。嚴裝更哭同舟侶。
人生如寄耳。賸有卅年清德。令名付與史臣知。

輓張石卿制軍

長沙獨守幾經旬。憶草檄紛馳。公爲府主我爲客。
鄂渚一別卽終古。歎萍蹤靡定。昔向瀟湘今向秦。

輓曾文正公

謀國之忠。知人之明。自媿不如元輔。
同心若金。攻錯若石。相期無負平生。

輓周受二觀察

學劍術雖疏。誰謂荆卿非勇士。
渡河聲尙壯。共憐宗澤是宗臣。

輓唐蔭雲方伯

湖外故人稀。萬里遙情春草綠。
荆南長吏在。廿年遺愛峴山青。

輓楊曉峰提軍

老淚灑西風。十數年從征舊侶。
靈旛向南浦。萬餘里入夢歸人。

輓黃熙春太守

哀情吉語本難雙。偏是捷奏甘泉逢永訣。
吏幹軍諮才有幾。堪念政成天水賦同仇。

輓馮尹平

尹平先生戍烏孫。城陷殉難。越十餘年。詰嗣竹儒觀察負忠骸歸葬嶺南。遺櫬入關。書此
誄之。

絕徼作忠魂。孤冢迷離。收骨猶憑鄴曼父。
覆盆嗟往事。九重昭雪。籲天不待武陵兒。

輓黃雲鵠觀察母太夫人

一尺布。一卷書。五夜寒燈慈母淚。
蜀江清。蜀山峻。十年冰燄遠臣心。

輓袁筱塢侍郎祖太夫人

兩朝綸綍傳榮。良將名卿齊上壽。
五代兒孫濟美。鳳雛鱗趾映當時。

輓徐頌閣修撰母太夫人

持節指空同。晝日有才光特榜。

歸程近畿甸。望雲何處慘孤星。

輓李蘭蓀大司空母太夫人

兩朝師保疑丞。母訓由來資啓沃。

八座富貴壽考。天章猶爲表音徽。

輓潘星齋先生夫婦

位躋極品。年過古稀。名德更貽千載遠。
生本自天。歿仍同日。唱隨猶是暮春初。

輓英西林宮保

遺訣酸辛。嗟膝下無兒。堂前有母。

殊勳彪炳。看大江東去。冰嶺西來。

輓劉果敏公

北闕君恩。南陔親養。西域戎機。忠孝合經權。好與聖賢論出處。
廿年交固。萬里功成。九原夢斷。死生關氣數。忍看箕尾吐光芒。

輓陳步青提軍

步青陳君。從征十八載。積功疊擢提戎。因求昏辭歸。甫三月。以假滿從。余塞上。其家人屢
書促歸。不應也。悼亡後。久病不起。書此致哀。

無以家爲。萬里邊塵悲馬革。
不如歸去。他生風雪泣牛衣。

輓琿蘭谷觀察

從佛圖轉輪來。十載同官推長者。
值邊關聞喜後。一棺歸去賸清名。

輓沈文定公

入告有嘉猷。擊楫應同劉越石。
經邦懷遠志。籌邊遠憶李文饒。

輓李仲雲觀察

咸豐庚申。余被時宰之譖。將赴愬於朝。而裝不具。親故餽遺。未敢輒受也。仲雲以三百金。祝我乃成行。行至襄陽。鄂撫胡文忠遣人要於道。請必毋行。廢然而返。尋奉命襄理軍務。馳驅南北。積苦兵間。未有以報也。忽忽廿有二年。寸衷未能自釋。茲因南行。得請省墓。則仲雲下世已數月矣。詣靈奠醊。并出橐餘金償夙諾。蓋謂此意固不可負也。嗚呼。豈尋常酬答之私云爾哉。

古誼契苔岑。論交我在紀羣列。
騷心壯寥寂。并世天生屈賈鄉。

輓李傅相母太夫人

德贊兩后。榮垂雙節。
福隆八座。壽躋九齡。

家書

致霖兒（正月二十七夜四鼓季父字）

久不作篆。偶爲霖兒書千文仿本五紙寄去。須玩其用筆之意。以濃墨臨之。

字諭霖兒知之。閱爾所寫請安帖子。字畫尙好。心中歡喜。爾近來讀小學否。小學一書。是聖賢教人作人的樣子。爾讀一句。須要曉得一句的解。曉得解。就要照樣做。古人說。事父母。事君上。事兄長。待昆弟朋友夫婦之道。以及灑掃應對進退喫飯穿衣均有現成的榜樣。口裏讀著者一句。心裏就想著者一句。又看自己能照著者樣做否。能如古人。就是好人。不能就。不好。就要改。方是會讀書。將來可成就一個好子弟。我心裏就歡喜者。就是爾能聽我教。就是爾的孝。早眠早起。讀書要眼到。一筆一畫莫看錯。口到一字莫含糊。心到一字莫放過。寫字要端身正坐。要懸大腕。大指節要凸起。五指爪均要用勁。要愛惜筆墨紙。溫書要多遍數。想解。讀生書要細心聽解。走路喫飯穿衣說話。均要學好樣。也有古人的樣子。也有今人的樣子。揀好的就學。此紙可粘學堂牆壁。日看一遍。二十七夜四鼓。

癸叟姪覽之。郭意翁來詢悉。二十四日嘉禮告成。凡百順吉。我爲欣然。爾今已冠。且授室矣。當立志學作好人。苦心讀書。以荷世業。吾與爾父漸老矣。爾於諸子中年稍長。姿性近於善良。故我之望爾成立尤切。爲家門計。亦所以爲爾計也。爾其敬聽之。讀書非爲科名計。然非科名不能自養。則其爲科名而讀書。亦人情也。但旣讀聖賢書。必先求識字。所謂識字者。非僅如近世漢學云云也。識得一字。卽行一字。方是善學。終日讀書而所行不逮邨農一野夫。乃能言之鸚鵡耳。縱能掇巍科躋通顯。於世何益。於家何益。非惟無益。且有害也。馮鈍吟云。子弟得一文人。不如得一長者。得一貴仕。不如得一良農。文人得一時之浮名。長者培數世之元氣。貴仕不及三世。良農可及百年。務實學之君子。必敦實行。此等字識得數個足矣。科名亦有定數。能文章者得之。不能文章亦得之。有道德者得之。無行誼者亦得之。均可得也。則盍期蓄道德而能文章乎。此志當立。爾氣質頗近於溫良。此可愛也。然丈夫事業。非剛莫濟。所謂剛者。非氣矜之謂。色厲之謂。任人所不能任。爲人所不能爲。忍人所不能忍。志向一定。併力赴之。無少夾雜。無稍游移。必有所就。以柔德而成者。吾見罕矣。盍勉諸。家世寒素。科名不過鄉舉。生產不及一頃。故子弟多樸拙之風。少華靡佻達之習。世澤之賴以稍存者。此

也。近頗連嫺官族。數年以後。所往來者。恐多貴遊氣習。子弟脚跟不定。往往欣厭失所。外誘乘之矣。惟能真讀書。則趨向正。識力定。可無憂耳。蓋慎諸。一國有一國之習氣。一鄉有一鄉之習氣。一家有一家之習氣。有可法者。有足爲戒者。心識其是非而去其疵。以成其醇。則爲一國一鄉之善士。一家不可少之人矣。家庭之間。以和順爲貴。嚴急煩細者。肅殺之氣。非長養氣也。和而有節。順而不失其真。其庶乎。用財有道。自奉甯過於儉。待人甯過於厚。尋常酬應。則酌於昧報可也。濟人之道。先其親者。後其疏者。先其急者。次其緩者。待工作力役之人。宜從厚償其資。及其放也。廣惠之道。亦遠怨之道也。人生讀書。得力祇有數年。十六以前。知識未開。二十五六以後。人事漸雜。此數年中。放過則無成矣。勉之。新婦名家子。性行之淑。可知。妃匹之際。愛之如兄弟。而敬之如賓。聯之以情。接之以禮。長久之道也。始之以狎暱者。其未必睽。待之以傲慢者。其交不固。知義與順之理。得肅與離之意。室家之福永矣。婦女之志。向習氣。皆隨其夫爲轉移。所謂一牀無兩人也。身出於正而後能教之以正。此正可自驗其得失。毋遽以相責也。孟子曰。身不行道。不行於妻子。胡雲閣先生。乃吾父執友。曾共麓山研席數年。詠芝與吾齊年生。相好者二十餘年。吾之立身行事。詠老知之最詳。其重我非它人。

比也。爾今培其妹。仍不可當鈞無敵之禮論。年長以倍。且兩世朋舊之分。重於媼姪也。尊之曰先生。可矣。爾婚時。吾未在家。日間文書紛至。不及作字。暇間爲此寄爾。自附於古人教子之義。不知爾亦謂然否。如以爲然。或所見各別。可一一疏陳之。以覘所詣也。

致孝威（庚申正月三十日）

孝威知之。我於二十八日開船。是夜泊三汊磯。廿九日泊湘陰縣城外。三十日即過湖抵岳州。南風甚正。舟行順速。可毋念也。我此次北行。非其素志。爾等雖小。當亦略知一二。世局如何。家事如何。均不必爲爾等言之。惟刻難忘者。爾等近年讀書無甚進境。氣質毫未變化。恐日復一日。將求爲尋常子弟不可得。空負我一片期望之心耳。夜間思及。輒不成眠。今復爲爾等言之。（爾等能領受與否。則我不能強之。然固不能已於言也。）讀書要目到口到心到。爾讀書不看清字畫偏旁。不辨明句讀。不記清頭尾。是目不到也。喉舌唇牙齒五音。並不清晰伶俐。蒙籠含糊。聽不明白。或多幾字。或少幾字。祇圖混過。就是口不到也。經傳精義奧旨。初學固不能通。至於大略粗解。原易明白。稍肯用心體會。一字求一字下落。一句求一句道理。一事求一事原委。虛字審其神氣。實字測其義理。自然漸有所悟。一時思索不得。即請

先生解說。一時尙未融漸。卽將上下文或別章別部義理相近者反復推尋。務期了然於心。了然於口。始可放手。總要將此心運在字裏行間。時復思繹。乃爲心到。今爾讀書總是混過日子。身在案前。耳目不知用到何處。心中胡思亂想。全無收斂歸著之時。悠悠忽忽。日復一日。好似讀書是答應人家工夫。是欺哄人家掩飾人家耳目的勾當。昨日所不知不能者。今日仍是不知不能。其去年所不知不能。今年仍是不知不能。孝威今年十五。孝寬今年十四。轉眼就長大成人矣。從前所知所能者。究竟能比鄉村子弟之佳者否。試自忖之。讀書作人。先要立志。想古來聖賢豪傑。是我者般年紀時。是何氣象。是何學問。是何才幹。我現在那一件可以比他。想父母命我讀書。延師訓課。是何志願。是何意思。我那一件可以對父母。看同時一輩人。父母常背後誇贊者。是何好樣。斥詈者。是何壞樣。好樣要學。壞樣斷不可學。心中要想個明白。立定主意。念念要學好。事事要學好。自己壞樣。一概猛省猛改。斷不許少有回護。不可因循苟且。務期與古時聖聖豪傑少小時志氣一般。方可慰父母之心。免被他人恥笑。志患不立。尤患不堅。偶然聽一段好話。聽一件好事。亦知歆動羨慕。當時亦說我要與他一樣。不過幾日幾時。此念就不知如何銷歇去了。此是爾志不堅。還由不能立志之故。如果

一心向上。有何事業不能做成。陶桓公有云。大禹惜寸陰。吾輩當惜分陰。古人用心之勤如此。韓文公云。業精於勤而荒於嬉。凡事皆然。不僅讀書。而讀書更要勤苦。何也。百工技藝。醫學農學均是一件事。道理尙易通曉。至吾儒讀書。天地民物。莫非己任。宇宙古今事理。均須融澈於心。然後施爲有本。人生讀書之日。最是難得。爾等有成與否。就在此數年上見分曉。若仍如從前悠忽過日。再數年依然故我。還能冒讀書名色充讀書人否。思之。思之。孝威氣質輕浮。心思不能沈下。年踰成童。而童心未化。視聽言動無非一種輕揚浮躁之氣。屢經諭責。毫不知改。孝寬氣質昏惰。外蠢內傲。又貪嬉戲。毫無一點好處。開卷便昏昏欲睡。全不提醒振作。一至偷閒頑耍。便覺分外精神。年已十四。而詩文不知何物。字畫又醜劣不堪。見人好處。不知自愧。真不知將來作何等人物。我在家時常訓督。未見悛改。我今出門。想起爾等玩鈍不成材料光景。心中片刻不能放下。爾等如有人心。想爾父此段苦心。亦知自愧自恨。求痛改前非以慰我否。親朋中子弟佳者頗少。我不在家。爾等在塾讀書。不必應酬交接。外受傳訓入奉母儀可也。讀書用功。最要專一無間斷。今年以我北行之故。親朋子姪來家送我。先生又以送致耽誤工課。聞二月初三四始能上館。所謂一年之計在於春者。又去月餘。

矣。若夏秋有科考。則忙忙碌碌。又過一年。如何是好。今特諭爾自二月初一日起。將每日功課。按月各寫一小本。寄京一次。便我查閱。如先生是日未入館。亦即注明。使我知之。屋前街道。屋後菜園。不准擅出行走。如奉母命出外。亦須速出速歸。出必告反。必面斷不可任意往來。同學之友。如果誠實發憤。無妄言妄動。固宜爲同類。倘或不然。則同齋割席。勿與親暱。爲要。家中書籍。勿輕易借人。恐有損失。如必須借看者。每借去。則黏一條於書架。注明某日某人借去某書。以便隨時向取。

致孝威（九月初四日章門營次）

孝威覽之。啓行後廿六日抵章門。途間接滌帥信。寧國府於十二日失守。滌帥方遣李次青觀察率所部平江勇三千赴徽郡防守。正值張副憲（芾）內召。因欠餉軍潰。賊遂漸窺嶺防。次青抵徽甫數日。分所部兩營防叢山。賊至敗走。滌所派援之兵亦敗。廿五日徽郡遂失。次青未知存亡。徽城大而陋。儲糧既乏。百務均未備。次青所部僅二千五百人。入城同守。滌翁派援之鮑軍門一軍。又未到。兵單地險。賊多援緩。此城之失。固在意中。惟自江此西兵事日棘。滌翁在祁門。崎嶇險阻。地逼勢孤。亦殊可危。安慶獲賊僞文。知逆首陳玉成有分兩路

上行之說。一擾皖北。一擾江西。我當率所部五千餘人。由仁樂安平扼婺源。以固江西門戶。而通祁門之氣。特慮賊蹤速至。婺源不可得到耳。楚軍自省至江西。沿途整肅。言者以爲向來未有衆而能整。或可一戰。然賊勢浩大。時局之艱。未知攸濟。燕都夷患逼近。徵調川楚丁赴援。尤時事之大可憂者。我旣挺身任事。亦不敢有所推諉。竭吾心力所能到者爲之而已。爾身體尙未復元。凡百宜知保愛。毋貽我憂。爾母前有攜爾往外之說。未知果否。讀書亦而養身。只有恆無間。不在功課之多。萬方多難。吾不能爲一身一家之計。爾年幼弱。諸弟更小。須一切稟命行之。所有讀書做人爲終身之計者。吾曾爲爾言之。時記我言。免我憂慮爲要。

致霖兒（十月廿三日景德鎮行營）

霖兒知之。接兩次家書。均未及復。軍事甚煩。又未開仗。亦無可言者。皖南賊衆且悍。滌帥居祁門。未爲得地。今羣賊環伺。應接不暇。所恃者。鮑張兩軍。及我部五千餘而已。現發老湘桂勇及右營六營截剿安仁竄匪。（卽由粵楚邊界竄入江西者）賊已聞風遠竄。已飭星速追剿。如前途有兵遏截。可期悉數殲除。惟皖境賊氛日逼。當速進屯溪扼之。是處介休寧徽

郡之間。相距各四五十里。爲休歛之賊所必爭。到此當有數大惡仗。惟當慎以圖之。自抵樂平後。大明軍令革一營官戴國泰。三什長。斬一勇一夫。責革吸煙勇丁三十餘名。軍事日有起色。如果餉需無缺。專心兵事。當有可觀。江西官民。喜其毫無擾累。惟案餉則頻頻不屬。無如之何。如東征釐餉。可月得三萬五千兩。專濟我軍。（已向郭意城詢之）則當請於滌帥。以此濟我之困。免得仰面求人耳。王興多病不耐勞。李貴亦然。故俱棄之。凡營中革逐之人。不得其意以去。到省後必造作一番謠言。可置之不聽。爾在家。以養身讀書爲事。一切均經諄諄訓誡。勿貽我憂。英人事已於九月十二三互換和約。聞鑾輿返宮。根本幸尙無恙。然辱甚矣。東南賊勢。盡取皖南。只看數月內有機否。江浙皖軍事均不堪問。以無將之故。滌公處人才亦乏。調薊泉不來。（旨不允）子春亦爲駱中丞帶去。只一魏質齋可調。我曾請之滌公。滌恐南中不肯令其來也。李金喝之爲人。我所深悉。然求之江皖。尙少有及勇者。此子留之湘中。無人駕馭。終必爲患。故我意調之。王永章。周達武。陳品南。已請之滌公矣。滌公於我極親信。毫無間言。惟才略太欠。自入窘鄉。恐終非戡亂之人。我此去要盡平生之心。轟烈做一場。未知能遂其志否。家中用度及延師之費。每年由營中付二百金歸。省嗇用之足矣。此

外斷不准多用。斷不能多寄。致損吾介節。劉王諸兄。見我寒苦。以四百金存我家中。我不知也。可以二百金。劃存家中。以二百金。請吳翔岡代製好劈山。切勿用動爲要。且等我下次信到再說。明日大隊拔向婺源。我自率親兵二百。先到祁門一行。再由祁赴婺。曾師進屯溪。爾母體氣何如。念念。少雲處。忙中未及致書。可卽以此示之。

致阿霖十一月初九日

阿霖知之。前月十七日。得安仁警報。卽派六營截剿。得獲大勝。賊竄入德興。又發四營迎擊。一戰遂克復縣城。賊竄婺源。我兵追到。一戰卽鼠竄浙界。共斃賊五六千。解散數千。拔出男婦數百。而我軍僅一弁帶傷。後物故。又兩勇陣亡而已。此次新軍甫試戰事。而十日之間。連獲三捷。克兩城。未亡一卒。則訓練之效也。將士勇氣百倍。若慎以用之。當尙有數好仗可打。昨夜得滌翁密緘。建德失守。普鎮敗退。勢逼饒景。我已前調梅村石泉諸軍。速回景鎮。諸軍克婺後尙留於彼。以資鎮壓。明日可到。聞此信後。又加調老湘桂營二千併來。約十二日可到。諸營到齊。當可穩打。此賊是僞忠王李秀成。人數實有四五萬之多。頗稱兇悍。從蘇州而來。楊厚菴曾於南陵途次親見之。且與諸友察看機勢圖之。江西無一

枝好兵相助。各處又急。則咨請速援。而月餉則吝不之與。實爲可惱。暫尙未大欠。然新軍必須如期發數月。乃可欠也。（浙撫奏請我督辦浙中軍務）答應四萬一月餉旨意詢滌帥。徽寧可少此軍。則令赴浙。滌必不放我。我亦不肯背滌也。家下事。我無心問及。一切有爾母在。謹聽教誡。毋胎我憂。

致孝威（辛酉正月二日四更海源橋行營）

孝威知之。接臘月初十日稟。知家中清吉。爾兄弟姊妹均好。甚爲欣然。爾年已漸長。讀書最爲要事。所貴讀書者。爲能明白事理。學作聖賢。不在科名一路。如果是品端學優之君子。卽不得科第亦自尊貴。若徒然寫一筆時派字。作幾句工緻詩。摹幾篇時下八股。騙一個秀才。舉人進士翰林。究竟是甚麼人物。爾父二十七歲以後。卽不赴會試。祇想讀書課子。以綿世澤。守此耕讀家風。作一個好人。留此榜樣與後輩看而已。生爾等最遲。盼爾等最切。前因爾等不知好學。故嘗以科名畝動爾。其實爾等能向學作好人。我豈望爾等科名哉。來書言每日作文一篇。三六九日作文兩篇。雖見爾近來力學遠勝從前。然但想赴小試做秀才。志趣尙非遠大。且爾向來體氣薄弱。自去春病後。形容憔悴。尙未復元。我與爾母每以爲憂。爾亦

知之矣。讀書能令人心曠神怡。聰明強固。蓋義理悅心之效也。若徒然信口誦讀。而無得於心。如和尚唸經一般。不但毫無興趣。且久坐傷血。久讀傷氣。於身體有損。徒然揣摩時尙腔調。而不求之於理。如戲子演戲一般。上臺是忠臣孝子。下臺仍一賤漢。而且描摹刻畫。鉤心鬥角。徒耗心神。尤於身體有損。近來時事日壞。都由人才不佳。人才之少。由於專心做時下科名之學者多。留心本原之學者少。且人生精力有限。盡用科名之學。到一旦大事當前。心神耗盡。膽氣薄弱。反不如鄉里粗才。尙能集事。尙有擔當。試看近時人才。有一從八股出身者否。八股愈做得入格。人才愈見庸下。此我閱歷有得之言。非好罵時下自命爲文人學士者也。讀書要循序漸進。熟讀深思。務在從容涵泳。以博其義理之趣。不可只志苟且草率工夫。所以養心者在此。所以養身者在此。府試院試。如尙未過。卽不必與試。我不望爾成箇世俗之名。只要爾讀書明理。將來做一箇好秀才。卽是大幸。軍中事多。不及詳示。因爾信如此。故略言之。李貴不耐勞苦。來營徒多一累。其人不能學好。留之家中亦斷不可。我寫信與郭二叔。求他轉薦他方可也。家中大小事件。亦宜留意。家有長子曰家督。爾責非輕。長一歲年紀。須增一歲志氣。須去盡童心爲要。

致孝威（二月三日）

孝威閱之。由意城南坡處所寄之緘均到。但不快耳。自到梅源橋初九日一捷後。聞祁門有警。卽分援之。而令四營羅近秋黃有功李世顏黃少春等隨鮑軍追賊。正月廿六。又獲一大捷。江西九江饒州各屬。一律肅清。建德亦無賊。（池州府屬）鮑軍之力多也。見接探報。徽寧大股。竄入婺源。又須親往剿辦。真是應接不暇耳。兵事一切。已詳致二伯信中。可與少雲大姊同閱後寄去。自頃連戰數次。皆無損折。計自成軍至今。陣亡者不過數人。帶傷者不及百人。病故者亦少。將士之心。日益親附。爾所聞於翔岡者。多非確實之談。外人多畏我嚴。多謂我尙氣。殊不知我。此不足辨耳。爾今年小試。原可不必。只要讀書明理。講求作人。及經世有用之學。便是好兒子。不在科名也。和官竟吸洋煙。癮。我前數日始知。擬卽遂令回家。克菴梅村諸公云。縱其回家。恐一發難。以斷癮。不如姑留此間。交李幹青先生照料。看其能戒與否再說。我姑聽之。爾小楷宜學帖。方有可觀。讀書總要涵泳從容。不可圖快潦草。切切。我在外於家事一切。全未念及。亦實無暇。爾可漸學料理。陸文安當家二年。所學大進。可知人情世故。上有真學問。真經濟。在只要人遇事留心耳。爾母體氣何如。諸姊好否。有便可

詳及之。黎爾民周慶生不能學好，雖至戚當敬而遠之。我體氣甚好，無須畢念。景鎮土民送萬民旗傘，遇便當以傘送祠堂，旗則留營備用也。明後日當率師赴婺剿賊，臨行草此，不能多及。

致孝威（三月初六日）

孝威知之。入春以來，追剿池州之賊，連擊徽寧竄江之賊，均獲勝仗。惟老溜各營，甲路之役，稍有挫折。然全師還鎮。（殺賊四五千）傷亡不及百名。於大局無傷也。僞侍王李世賢，率大股由婺源陷樂平，繞道鄱陽，故縣渡昌江而北。曾滌翁以我軍方擬下剿，景鎮未可空虛。調皖南鎮陳公（大富）率所部五千餘來鎮防守。二月廿日到鎮。我見其兵勇欠餉太久。（私給米百石，銀一千兩，並飭局籌錢千四百串，銀六百兩，米千餘石濟之）又冗雜無章，心竊憂之。然念其七年固守南陵，四月之久，尙未潰敗，意其或能守此要區。遂將景鎮防務交其照辦。廿二日親督各營下剿，駐鮎魚山，進金魚橋。廿六七八九等日，均獲勝仗。廿九之戰，斃賊三千有餘。陣斬賊目多名，極爲痛快。不料陳鎮軍遠以囑託，堅執守近，不守遠之說。棄柳家灣要隘不顧。於地勢情形全不考究。兵勇多雜處民間，不聽調度。賊知我軍下剿，景

鎮空虛。遂於二十八、九等有由祭丹街竄踞柳家灣。卅日午刻撲犯景鎮。陳公陣亡。景鎮遂失。所部有梟水逃潰者。有溺斃者。有降賊者。殊堪痛恨。景鎮距我軍六十餘里。賊到卽破。無從求援。（景鎮既失米糧無從採辦）我以孤軍據於四面皆賊之地。相逼愈甚。不得已率全軍於三月朔辰刻移駐樂平。幸二九日大捷。將此路打通。沿途尙無阻礙。惟祁門音信隔絕。不知滌帥得景鎮失守之信後。如何布置。又僞忠王一大股直竄臨江樟樹鎮及新淦縣等處。意在渡章江以趨潯郡。而江西各郡蹂躪殆遍。省城亦殊岌岌。我北顧祁門。南顧章門。日夜愁眉。期於兼顧。一軍七千餘。眭章羅新募之勇已到且接仗矣。欲敵數十萬之賊。不敢謂力不足也。賊衆且悍。積年叛卒。多降附之。故其勢日益披猖。東南大局。實不堪設想。亦惟盡其心力所能到者爲之。成否固不計也。德興婺源之捷。已奉三品京堂之恩旨。而郝文迄今未到。吳彤雲內翰。爲我請得祖父誥封之軸。今交履祥帶回。可敬謹收藏。以答先澤。（軸內諱氏未填。可以泥金薰沐填寫。）履祥老實勤快。尙是子弟中之好者。今令其歸。其口糧銀兩。均由東征局會兌。本分之外。給以甘兩。祿不昭肯歸。亦尙無大錯。聽之。和官無用。煙癮尙未脫。遣之歸以省我累。聞爾母脚氣時發。恐難速愈。老年氣血衰耗。殊爲念之。爾與

諸弟一心讀書學好。乃慰我意。外事不必問。軍中事冗。我亦不時寄家信。轉以無信爲平安耳。

致孝威（三月二十日樂平營次）

孝威知之。前信發後。僞侍王李逆大股調攻祁門。賊黨十數萬。回攻樂平。此賊蓋憚我軍聲威。忘我之撓其後路。故以全力來犯。幸賴諸將士之力。初六、初十、十四、三大捷。逆賊喪膽。仍向徽州竄去。賊中大頭目僞京衛軍大佐將李逆尙揚。已經陣斬。（衢州清泉人咸豐二年從賊。其位號僅下侍王一等李逆。世賢聞亦帶傷而逃。所供之天德王一。金像妖神長九寸許。）并被奪獲。此賊自前年陷三河。去年陷金陵官營。陷徽州嚴州。志得意滿。賊黨多張國樑。周天受等叛卒。故凶餓更張。不料竟爲我軍所破也。初十日勝仗。前營官羅鏡秋陣亡。十四日勝仗。史哨官聿舟陣亡。最爲傷心之事。此兩人者。血性膽識。均能造成第一等將官。不料感我知遇。竟以死報也。現在滌帥移節休寧。婺源最爲緊要。我軍明日當拔營往婺源。臨狗逆由英霍破黃州。胡詠翁駐節太湖。兵力太薄。兼患病甚篤。殊爲可危。江西吉安復陷。臨江瑞州岌岌。恐賊將直趨潯陽也。賊多且悍。辦賊之人太少。東南事勢。不堪設想。我帶兵在

外一切無所疑慮。只恐餉源日竭。不能行其志耳。咨稿鈔付一閱。

致孝威（三月廿九日德興大營）

孝威知之。前一緘。由驛轉遞撫署。托意城叔飭交。未知接到否。近剿僞侍王李世賢大股。六獲大捷。饒景。浮梁。樂平。婺源。一帶肅清。賴王梅村。劉克菴。諸君子。及各營將士之力。得以化險爲平。現在追至德興。賊已遠遁。此股實已胆落。惟僞英王四眼狗圍撲安慶官軍。勢殊岌岌。胡詠翁在太湖。兵力單薄。可危之至。而僞忠王李秀成一股。已陷吉安。瑞州。臨江。九江等郡。切無健將精兵足資戰守。江西腹地糜爛。吾湘邊防亦棘。擬將侍逆一股。再加痛剿。然後西趨。肅黃清楚邊界也。賊勢甚張。戡亂之才。實不多覩。若更有數軍如楚軍者。必不致任賊橫行也。我精力尙勉強支持。然年已五十。志慮實不如前。深恐貽誤。時局方艱。想之倍深。懷懷耳。爾母脚氣舊恙愈否。四姊近時體氣如何。大姊已回長沙否。江西袁瑞兩郡。爲吾湘入江通衢。此後既不免中梗之患。家信由驛轉遞。難期速到。遇有信脚來家取信。可使附數字與我。附來咨稿一件。閱後可送少雲意城南坡等處閱之。我原有咨致撫署東征局。恐日聞袁瑞有梗。未能到也。履祥回時。曾寄兩代封軸。是吳桐巢代我請者。已接到否。

致筠心（五月十三日）

筠心夫人近好。久未得手書。知腳氣尙未復元。衰老之年。氣血虛耗。飲食藥餌。須隨時調補。勿過節省。以貽我憂。霖兒娶婦後。漸有成人之度否。讀書不必急求進功。祇要有恆無間。養得此心純一專靜。自然所學日進耳。新婦性質何如。教婦初來。須令其多識道理。爲家門久遠計。小學女誡。可令諸姊勸爲講明也。樂平諸戰。荷皇上褒獎。并得拜尙方諸賜。一介寒生。忝竊至此。且感且慚。自此數戰後。威名頗甚。追賊至興安。賊解玉山之圍。至廣信。則且舍江山常山（浙江地界）而竄金華矣。維時毓中丞請勦瑞郡以保章門。適探瑞城踞賊無多。而滌生函牘。以僞右軍主將劉逆竄陷建德。饒景可危。呼令還鎮。比冒雨奔馳七日。甫抵樂平。卽發前隊赴鎮。而賊已至四五十里外矣。歸途經過樂平浮梁等鄉。沿途爆竹茶果香案相望於說。婦孺夾道歡迎。頌聲不絕。樂平素強悍。械鬥抗官抗糧。劫殺兵勇。無所不至。此次爲賊所苦。日觀官軍之威。遂帖服如此。惟景鎮遺黎僅在。到鎮之時。猶於破屋中放爆竹迎我。不覺爲之心酸淚落也。賞件及各處萬名傘。有安便再寄回。

致霖兒（六月二十三夜）

霖兒知之。意城叔處寄到家書。知狀況平安爲慰。家中所寄各書物。均收到。周品恆賚送御賞之各件回湘。附寄一信。想已收到。爾母脚氣漸痊。甚爲欣慰。然暑月服峻劑。未知是否相安也。新婦名家子。性情氣質既佳。自易教誨。但爾幼年受室。於處室之道。毫無所知。恐未知所以教也。孟子曰。身不行道。不行於妻子。修身爲齊家之本。可不勉哉。讀書先須明理。非循序漸推。熟讀深思。不能有所開悟。爾從前讀書。只是一味草率。故窮年伏案。而進境殊少。卽如寫字。下筆時要如何詳審。方免謬誤。行書點畫。不可信手亂來。既未學寫。則端正作楷。亦是藏拙之道。何爲如此潦草取厭。爾筆資原不差。從前寫「九宮格」亦頗端秀。乃小楷全無長進。問架筆法。全似未曾學書之人。殊可怪也。直行要齊。橫行要密。今後切宜留心。每日取小楷帖摹寫三百字。一字要看清點畫間架。務求宛肖乃止。如果百日不間斷。必有可觀。程子作字最詳審。云。卽此是敬。是一藝之微。亦未可忽也。潦草卽是不敬。雖小節。必宜慎之。東征局未收之一千七百餘金。暫存成靜齋處。吾意以五百金贖羅近秋。二百四十金贖史聿舟。二百金贖陳明南。百金贖趙克振。二百金還吳翔岡。劈山礮。二百四十金還少雲。餘候存靜齋處撥用。史聿人之兄來此。尙大老實。然無他長。伊亦求歸。遣之爲是。大約二十五六

始歸。我另有信交他帶回也。輝楚已來。留此當長夫。營中無好模樣。又易懶惰。故我不欲子姪來營也。數月後。仍當遣其歸。此間欠餉四月。近復大疫。困憊難堪。去冬由湖南竄江西之賊。今復從福建汀州竄至廣信各屬。李秀成一股。又分竄南康府各屬。章門亦頗震動。日間羽書絡繹催援。無以應之。滌翁增募二千餘。足成萬人。以便調遣。吾以餉項艱難。未之諾也。佑生來時。並帶其妻兄劉某來。殊不曉事。此子亦恐不能有所成就。周慶暫安置軍裝局。如察有毛病。當卽逐之。少雲是否還淹中。艾生已同去耶。白水洞屋聞已遣人修理。然此時似可不急搬回耳。文方伯丁外艱。已作書唁之。

致孝威（七月二十一日婺源軍中）

孝威覽之。六月二十四午刻一書。具知一切。吳翔岡所製劈山礮。未嘗不好。惟須照模製藥。又兜用螺絲轉。一經損壞。便難覓匠修整。大抵軍器不宜太精細。以所用者皆粗也。人翔岡立意要與人不同。此最是短處。而所賞識之人。多無實際。渠薦與我之人。張聲恆。章榮先。略可。然皆由璞軍出者。此外則無一堪用之才。難怪其從前帶勇。每戰輒不如意也。而猶不自痛悔。復意氣自矜。恐將來亦難望長進。終是廢材。渠來信云。尙欠伊銀百兩錢卅串。可從靜

齋處餘銀內取而還之我。所謂商賈氣太重者此耳。此君志趣頗好。然讀書太少。自信太過。頗有亡而爲有。而爲虛盈之病。上年欲其來營。亦頗思陶鎔一番。或可望其有進。渠既不願。則不必也。爾母脚氣未愈。須時勸多服滋補之藥。有人贈我頂好肉桂二段。當乘便付回。黨民旗繳牌匾亦當寄歸。(新送四柄皆江皖之民也)餉欠四月有餘。無法彌補。兼之軍中病疫緊興。需用甚急。日以爲憂。幸將士知我無它。不忍迫促。大家忍耐。不肯領支。然我因此更覺過意不去。滌帥見我艱難。咨撥婺源樂平浮梁三縣地丁釐稅歸我軍提用。經理甫一月。漸有生機。從前收釐無多者。今竟多三分之一。每月可得萬數千金。不致頓形饑潰。而樂平民風刁悍異常。十年不納錢糧。不設釐局。且騙學額十名。自爲得計。自歸我後。錢糧漸次完納。釐稅已肯捐辦。士民頗言懷德畏威。景鎮商民則言。如偷漏釐稅以欺大人。是欺天也。自媿無功德及人。遽得此報。殊爲慨然。三代直道之公。至今如故。人此可見。以爾信曾以此爲慮。故略及之。使爾等勿以此爲念耳。爾年已十六。須立志作好人。讀書在窮理。作事須有恆。兩語可時時記之勿忘。爾能立志作好人。弟輩可當效法。我可免一番窮念矣。少雲已回小淹未。前書交余都司帶來。恐到尙在此書之後。李逆秀成一股。由鄂竄回江西。省城戒嚴。

幸滌帥調鮑春霆由九江回剿。李次青克義甯州後。又轉戰而前。江西當可無慮。惟弋陽貴溪大股屯集。卽彭大順朱衣點諸逆從湖南竄江西福建者。我軍士卒病苦漸愈。當一擊之。若彼時李逆亦竄回廣信。亦可就近痛剿。江西肅清。則餉源可以不匱。可放手辦賊也。黃南坡裕時卿東征之餉。我不取用。李仲雲文式岩我亦未嘗託之。意城昨晚書。言索餉惟有疲纏一法。以詠芝沅浦得此訣爲好。我則不然。直幹到底而已。克菴信來。言其太翁病已略愈。八月後可啓程來營。石泉則須俟冬間葬親後始能來。不便催促也。爾小楷全無端秀之氣。又橫行太稀。尙不如從前之好。須急取家中所有小楷帖。一無論如何帖細心學之。自有長進。卽歐書姚恭公墓誌亦好。每日摹寫數百字。乃有長進。斷不可忽忽從事。切切。王興稟來。薦一姓郭人投效。實屬糊塗不堪。見面時當傳諭罵之。勿任其來。五月二十五日。已奉恩旨補授太常寺卿。想鄂中已見邸抄。如有邯鄲報至。可給銀十兩。多則不必。

致孝威（八月初四夜）

孝威知悉。許久未得家信。未知家中近况。然軍中事繁。我亦無暇念及爾曹也。周品恆到後。爾有信來。我已接著。此後我亦曾數寄家信。未知家中亦接到否。到婺源半月。打一勝仗。此

間士民感服不已。以十年來未見官軍之威也。婺源朱子闕里本朝名儒。江慎修先生水汪雙池先生絨。均守朱子之學者。故家遺俗。風流未歇。土秀民愿。與他處異。惟文弱殊甚。自咸豐三年以來。逆賊往來廿餘次。未能一矢加遺。典章文物。掃地而盡。傷哉。現在僞忠王李秀成自鄂回竄江西。自樟樹鎮至撫屬各處。蔓延殆徧。大有與熱貴股匪合勢之意。我軍七千餘。分駐景鎮婺源。又疾疫繁興。物故者不下二百餘。患病未愈者約八九百。勉能出隊者不過三千餘而已。然賊勢甚急。不能不相機圖之。大約調景鎮之兵。及見在各營。合計四千餘。尙堪一戰。此月內當於安仁弋陽有數大仗耳。和官洋烟癮似已戒脫。近稍知學好。履祥尙明常。惟輝楚到此後。不服水土。時常患病。今因其思歸。遣之。口糧之外。給銀十兩足矣。婺源士民送萬民傘與旗牌者。紛至沓來。今乘楊麓生形壽歸家之便付回。又頂上肉桂一枝寄爾母。必與脚氣之證相宜。此桂乃真交趾所產。不易得。慎勿以其形質不佳輕之也。胡詠翁病不可爲。實堪傷念。今日亦送一枝去。未審能趕上否。少雲是否已回小淹。順孫締姻徐氏亦好。在定局否。江西賊盡奔南昌撫州。吾湘邊界無事。聞今歲舉行秋試。吾族幾人與試。毛中丞似尙可有爲。或者吾湘可相庇以安也。成靜齋處所存之銀。除前單外。應再付吳翔岡

銀一百兩。錢卅串。（作銀廿兩）此外尚有撫標兵丁常宏貴應領陣亡卹銀卅兩。口銀十兩。渠兄常宏泰曾具稟來營請領。我已批准。由南付給。不知已發否。如靜齋處未發。或家中亦未發。卽須在餘項內劃給。已屬楊麓生查詢交付矣。史聿舟羅近秋兩人贖項共七百四十兩。如尙未發。亦可趁楊鹿生此次回南之便了妥。麓生係前營文案幫辦。德興婺源已保知縣。樂平案尙須加保。伊此次告假四五月。仍須來營也。致吳翔岡信。可卽粘封遞去。

致孝威（臘月初一日）

霖兒知之。爾所寄各書均到。潤兒所作文字。亦甚順暢。覽之欣然。爾體氣頗弱。周身間有作脹之時。是氣血不足之證。須加意保養。節勞逸。慎起居。爲要。讀書可以養性。亦可養身。只要工夫有恆。不在迫促也。吾近奉督辦浙江軍務大命。節制提鎮。而浙江遍處賊氛。無從下手。杭州危急。甯波亦將不保。金華嚴州衢州所屬。寸地皆賊。計賊數總在五六十萬。而吾除守婺四營外。僅只六千餘人。兵力太單。不敷分布。餉事經自辦景鎮釐金及浮樑樂平地丁漕折彌補外。尙欠十七萬四千有奇。雖廷旨令江西先解十萬兩。福建按月解十萬兩。然皆畫餅也。浙江精華。全在杭湖甯紹嘉興五府。今皆爲賊有。杭湖寧波城尙未失。而城外皆賊。一

時難以飛越。餘則皆賊占踞矣。援浙無數萬之兵。數十萬之餉。雖孫吳韓白復生亦難著力。吾亦知之。然明知其難而又不躲避也。爾曹在家。當時念我軍中艱苦萬狀。勉力學作好人。不可稍耽逸樂。至要。至要。

致霖兒（八月初九夜龍游縣譚石望行營）

霖兒知悉。六月十七日。吳都司蘭桂因病假歸。曾以一緘寄爾。並付今年薪水銀二百兩歸。未知接得否。念家中拮据。未嘗不思多寄。然時局方艱。軍中欠餉七箇月有奇。吾不忍多寄也。爾曹年少無能。正宜多歷艱辛。練成材器。境遇以清苦澹泊爲妙。不在多錢也。爾倅附學籍。人多以此賀我。我亦頗以爲樂。然吾家積代以來。皆志讀能文。僅博一衿。入學之年。均在二十歲以外。惟爾仲父十五歲得冠縣庠。爲僅見之事。今爾年甫十七。亦復得此。自忖文字能如仲父及而翁十七時。家太仲詩云。以彼徑寸根。蔭此千尺條。蓋慨世亂之致身。易於寒峻也。爾勿以此妄自矜寵。使人輕爾。辰下正鄉試之期。想必與試。三場畢後。不必在外應酬。仍以閉戶讀書爲是。此心一放。最難收捉。不但讀書了無進益。並語言舉動亦漸入粗浮輕佻一路。特人不當面責備。自己不覺耳。我家向例。子弟入學。族中父老。必擇期迎往掃墓拜

祠。想此次爾與丁弟亦必有此舉。到鄉見父老兄弟。必須加倍恭謹。長輩呼爾爲少爺。必斂容退避。示不敢當。平輩亦面謝之。分明昆弟。何苦客氣。自帶盤費住居祠中。不必赴人酒席。三日後仍卽回家。祠中獎賞之資。不可索領。如族衆必欲給爾。領取後仍捐之祠中。抵此次祭掃之費可也。浩齋先生處。送謝敬五十兩不爲多。先生不知我之所以自處。以爲帶勇之人例有餘財。非五十金不足慰其意。且先生境遇亦實苦也。爾大姊病體何如。爾母信來云。大姊意欲助兒往小淹讀書。我頗不以爲然。一則相距太遠。一則爾大姊多病。豈可累其照料。又助兒年太幼小。往來須人護送。亦殊不便耳。少雲今歲久住安化縣城。家中各事不知經理何如。爾母信云。渠意欲來浙學習軍事。我意俟金華克復後。再邀其來。蓋克復金華後。始有駐足之處。否則隨營逐隊。太勞苦也。又渠旣來營。縱有勞績。不便列保。未免負之。須先說明此意方好。近日軍事尙順。自七月十七日油埠一戰。克獲全勝。陣斬兩逆目。後二十一日。繼獲一勝。李逆之氣愈衰。日間頗有遁竄江南之意。惟軍中疾疫繁興。營官哨長。幾於無一不病。打仗出隊。不能照五成。實爲可傷。死者日以十數計。長夫尤甚。餉事艱難萬狀。上臘之餉。始結算清楚。幸士卒都能耐苦耳。劉竹亭之勇不甚精。故未促其出戰。薊泉奉特旨赴

浙七月餘之久。尙遲遲吾行。抵長沙後。又不卽來。頭隊甫於七月二十八日抵江西。聞渠二十二日始自長沙啓行。大約到此總在此月底矣。而粵餉。楚餉。江西餉。無不搜索殆遍。我之兵事未得其助。餉事則受其累。已嚴飭之矣。魏質齋尙覺順理。然好用文士。難獨當一面。我處幫手。殊覺其難。就現在大局言之。人才亦實不多耳。爾院試文字。及考古詩賦。何不寄我一閱。縣府學台姓名別號。何不詳寫告我。爾旣受知。我亦應寫信謝他才是。明歲塾師。仲父已薦何人。可寫稟告知。草此寄爾。爾覆我信。可卽照書中節次對之。

致阿林（九月十日龍游城西書）

阿霖知之。兩書寄爾。均由郭二叔轉遞。想已接到。明年不須會試。前函已言之。爾意從二伯入山讀書甚慰。我意惟念爾母衰病日甚。需人侍奉。一家僑寓省城。無人經理。爾入山卽家書亦難時得。殊爲不便。爾可與爾母酌之。或能請二伯來城。專課爾讀。而左邊住宅一所。卽退去。別開一塾。以爲潤助楊三兒延師課讀之所。計亦良得。爾從二伯讀書。得稍長學識。又可就近照料家私。一便。二伯年老。仍須作館。若迎之家塾。可無須遠涉。二便。所愁者。不過無錢耳。我在外。每年以二百兩寄家。以敷家用。今擬明歲以後。多寄二百兩歸可耳。（以一百

六十金爲二伯脩金。爾少年僥倖太早。斷不可輕狂恣肆。一切言動。均宜慎之又慎。凡近於名士氣公子氣一派。斷不可效之。毋貽我憂。浩齋師課爾。極費心力。明歲又不在家塾。光景之窘可想。爾意欲吾寄謝敬。自是至理。今緘六十金奉之。爾親送去。爲我致聲。（已作書謝之矣。）雋卿先生現在此。我自致謝。石渠芝生兩先生處。各奉二十金。湛湖先生聞已下世。其世兄至不成材。不必理會。如師母尙在。可送二十金。惟須擇妥人交到。不令其世兄知也。兩主考已由摺弁帶寄。士宜各五十兩。白蘭巖學使。及丁稚璜太守。閱鶴子明府。恩筱農房師。則均不寄銀。以其爲外官也。恩案楹聯。茲付一首來。可請郭二叔設法遞寄。廷芳字。則可無庸致書矣。郭二叔處借項。必須速還。可由若農觀處察借支。浙捐銀百兩還之。明歲二伯六十壽辰。可奉百金。昨江西士民送我壽屏兩副。萬名傘三把。壽幃三箇。壽聯一副。壽綵一副。可存之家中。傘則送入祠內可也。

致孝威（十月二十三夜龍游城外行營）

孝威知之。二十日接爾前月晦日一書。得悉一切。試卷刷印一千五百本。未免太多。履歷多未詳確。我保同知銜知縣後。曾保同知直隸州。非虛銜也。奉特旨以四品京堂襄辦軍務後。

旋又奉特旨以三品京堂補用。并蒙特賞多珍。然後補受太常寺卿。督辦浙江軍務。補授浙江巡撫。凡此履歷。皆應詳載。一數典不可忘祖。豈可忘乃父乎。又吾父母之得授四品封。是奉諭旨賞給。與尋常之覃恩例得者不同。應載明特恩。誥贈朝議大夫。誥贈恭人。方昭核實。此國恩家慶。未可忽也。吾以婞直狷狹之性。不合時宜。自分長爲農夫以沒世。遭際亂離。始應當事之聘。出深山而入圍城。初意亦祇保衛桑梓。未敢侈談大局也。蒙文宗顯皇帝以中外交章論薦。始有意乎其爲人。凡兩湖之人及官於兩湖者。入覲時。無不垂詢及之。以未著朝籍之人。辱荷恩知如此。亦希世之奇遇。略曾胡之保。則已在乎聖明洞鑒之後矣。官文因樊燮事。欲行構陷之計。其時諸公無敢一言誦其冤者。潘公祖蔭。直以官文有意吹求之深。意入告。其奏疏直云。『天下不可一日無湖南。湖南不可一日無某人。』於是蒙聖諭垂詢。諸公乃敢言「左某果可用」矣。咸豐六年。給諫宗君稷辰之薦舉人才。以我居首。咸豐十年。少詹潘君祖蔭之直糾官文。皆與吾無一面之緣。無一字之交。宗蓋得聞之。嚴丈仙舫。潘蓋得聞之。郭仁先也。郭仁先與我交稍深。咸豐元年。與我邑人公議。以我應孝廉方正制科。其與潘君所言。我亦不知作何語。宗疏所稱。則嚴仙舫丈親得之長沙城中。及武昌城中者。

與吾共患難之日多。故得知其詳。兩直道如此。却從不於我處道及隻字。亦知吾不以私情感之。此誼非近人所有。而宗潘之留意正人。見義之勇。亦非尋常可及矣。吾三十五歲而生爾。爾生七歲。吾入長沙居戎幕。雖延師課爾。未及躬親訓督。我近事。爾亦不及周知。宜多謬誤。茲略舉一二示之。二伯所言。不願姪輩有執袴氣。此語誠然。兒等當敬聽勿違。永保先澤。吾家積代寒素。先世苦况。百紙不能詳。爾母歸我時。我已舉於鄉。境遇較前稍異。然吾與爾母言及先世艱窘之狀。未嘗不泣下霑襟也。吾二十九初度時。在小淹館中。曾作詩八首。中一首。述及吾父母貧苦之狀。有四句云。研田終歲管兒餽。糠屑經時當夕殮。乾坤憂痛何時畢。忍屬兒孫齧菜根。至今每一諷詠及之。猶悲愴不能自己。自入軍以來。非晏客不用海菜。窮冬猶衣縑袍。冀與士卒同此苦趣。亦念享受不可豐。恐先世所貽餘福。至吾身而折盡耳。古人訓子弟以齧得菜根。百事可作。若吾家。則更宜有進於此者。菜根視糠屑。則已爲可口矣。爾曹念之。忍效執袴所爲乎。更有一語屬爾。近時聰明子弟。文藝粗有可觀。便自高位置。於人多所凌忽。不但同輩中無誠心推許之人。卽名輩居先者。亦貌敬而心薄之。舉止輕脫。疏放自喜。更事日淺。偏好縱言曠論。德業不加進。偏好聞人過失。好以言語侮人。文字譏人。

與輕薄之徒。互相標榜。自命爲名士。此近時所謂名士氣。吾少時亦曾犯此。中年稍稍讀書。又得師友箴規之益。乃少自損抑。每一念及從前倨傲之態。誕妄之談。時覺慚赧。爾母或笑舉前事相規。輒掩耳不欲聽也。昔人有云。子弟不可令看世說新語。未得其善水。先習其簡傲。此言可味。爾宜戒之。勿以爾父少年舉動爲可效也。至子弟好交結淫朋逸友。今日戲場。明日酒館。甚至嫖賭鴉片。無事不爲。是爲下流種子。或喜看小說傳奇。如會真記紅樓夢等。誨淫長惰。令人損德喪恥。此皆不肖之尤。固不必論。吾以德薄能淺之人。忝竊高位。督師十月。未能克一郡救一方。徒上負朝廷。下孤民望。爾輩聞吾敗。固宜憂。聞吾勝。不可以爲喜。旣奉撫浙之嘉命。則浙之土地人民。皆責之我。旣奉督辦之特命。則東南大局。亦將與有責焉。有見過之時。爲見功之日。每詠韋蘇州自慚居處崇。未覩斯民康之詩。不知何時始釋此重負也。爾輩若稍存一矜夸之心。說一高興之話。祇增我恥。亦當知之。明年旣定負笈入山。從伯父讀書。可將此帖別寫一通。置之案頭。時加省覽。如日與我對。庶免我憂。此帖亦宜與潤兒及癸叟世延傳觀。并各鈔一分。俾悉我意。

致霖兒（癸亥正月六日龍字城外大營）

霖兒知悉。郭叔處遞到爾前後兩書。一切俱悉。所論重經濟而輕文章。亦有所見。然文章亦談何容易。且無論古之所謂文章者何若。卽說韓柳歐蘇之古文。李杜之詩。皆盡一生聰明學問。然後得以名世。古今能幾及者。究有幾人。又無論此等文章。卽八股文。排律詩。若要作得妥當。語語皆印心而出。亦一代可得幾人。一人可得幾篇乎。今之論者。動謂人才之不及古昔。由於八股誤之。至以八股人才相詬病。我現在想尋幾箇八股人才。與之講求軍政。學習吏事。亦了不可得。間有一二曾由八股得科名者。其心思較之他人尙易入理。與之說幾句四書。說幾句大注。卽目前事物。隨時指點。是較未讀書之人容易開悟許多。可見真作八股者。必體玩書理時。有幾句聖賢話頭。留在口邊。究是不同也。小時志趣要遠大。高談闊論。固自不妨。但須時時返躬自問。我口邊是如此說話。我胸中究有這般道理否。我說人家作得不是。我自己作事時又何如。卽如看人家好文章。亦要子細去尋他思路。摩他筆路。仿他腔調。看時就要著想。要是我做這篇文章。必會是如何。他卻不然。所以比我強。先看通篇。次則分起節節看下去。一字一句都要細心體會。方曉得他的好處。方學得他的好處。亦是不容易的。心思能如此用慣。則以後遇大小事。到手便不至粗浮苟且。我看爾喜看書。卻不肯

用心。我小來亦有此病。且曾自誇目力之捷。究竟未曾仔細。了無所得。爾當戒之。子弟之資分各有不同。總是書氣不可少。好讀書之人。自有書氣。外面一切嗜好。不能誘之。世之所貴讀書寒士者。以其用心苦。讀書境遇苦。寒士可成材也。若讀書不耐苦。則無所用心之人。境遇不耐苦。則無所成就之人。我在軍中作一日是一日。作一事是一事。日日檢點。總覺自己多少不是。多少欠缺。方知陸清獻公詩。老大始知氣質駁一句。真是閱歷後語。少年志高言大。我最歡喜。卻愁心思一放。便難收束。以後恃才傲物。是己非人種種毛病。都從此出。如學生荒疏之後。看人家好文章。總覺得不如我。漸成目高手低之病。人家背後訕笑。自己反得意也。爾當識之。閔鶴子先生處。既送十二金。亦可去得。以其爲縣試前列之師。非甚有異常知遇之感也。丁稚璜先生處。已有回稟來。其赴陝臬時。可往送行。不必送禮。劉克菴送四十金與爾。此間無所聞。當由我處還之。黎壻此間無可位置。可轉達之。浩齋先生所荐胡仙槎在常山辦轉運。太不安靜。每日在外。於公事絕不留意。已革逐之。浩齋先生館地。此間無處尋覓。來信亦不及復矣。

致霖兒（九月初三日嚴州城外大營）

霖兒知之。七月十三日信。具悉一切。成滌泉。既與席研香共事。未便調來。此君膽氣血性。均爲吾所愛賞。惟於兵事則歷練尙淺耳。張世兄兩代同年。其人性情亦介直可取。已咨湖南調之。如無盤費。可由家中先付三十金與伊。江西各厘局已由滌相索回。彼間無可位置。來浙則可。李文學在李世顏幕病歿。已飭世顏有便送其柩回南。歸時我亦當致賻。寒士因升斗之人。送命異鄉。亦殊可憫。惟世顏亦病甚。未知竟能歸其遺蛻否。今歲疾疫。較上兩年爲甚。瘡痢痧症死者。將士兵勇長伏。合計不下數千。病弱驟難復元者。幾於十之七八。自我而外。薊泉克菴質齋諸君。無不病者。營官哨長。固無論矣。然克菴力保江皖。薊泉攻克富陽。各營於飢病之餘。尙能出死力以誅盜賊。忠哉我軍。我近爲瘡所苦。計五十餘日中。乍涼乍熱。殊不可堪。旬日來始覺稍稍痊愈。亦未嘗服藥。一以從前爲藥所誤。一惟飲饌調補而已。閩浙兵事方殷。而吾以衰年多病之身。勉承其乏。殊爲可憂。爾曹當念而翁之艱難辛苦。勸思保家保身之道。毋詒我慮。聞爾今歲多病。必殊憂迫。思爾一見。而道遠莫致。又以浙江兵燹之後。繼以飢饉。加之疾疫。儼同瘴鄉。一委員物故者甚多。一亦不欲爾急來。且俟杭城克復再議。聞爾病根由傾跌受傷而起。見在讀書高坡。常由屋後山礮跳擲而下。不顧性命。祇貪

嬉戲殊不可解。記曰。孝子毋登高。毋臨深。懼辱親也。虧體辱親。不孝之大者。爾亦知之否乎。吾年卅又五。而爾始生。愛憐倍切。爾母善愁多病。所舉男子惟爾一人。爾亦念之否乎。年已十八。而舉動如此。與牧豬奴何異。爾亦恥之否乎。如後如不悛改。吾亦不復念爾矣。潤兒今歲須與完姻。余三表伯。於八月初一。始由景德鎮啓程。計此信到時。亦已抵長沙。餘詳前信。不復贅。

致孝威（臘五夜富陽大營）

孝威知悉。得十一月十日書。具悉爾及爾母體氣均好。甚爲欣慰。衛生丸極得力。內有參茸。可取服之。秧蓐力量較高麗。參爲佳。作丸藥服之。亦好藥餌。滋補究是無益。總要自己加意保練。庶無他慮。父母惟其疾之憂一語。時時體玩。是爲至要。杭城不久可復。我意俟復杭城後。爾兄弟可侍爾母同來。稟商爾母。以爲何如。我於移軍富陽後。卽赴餘杭。看地勢。調諸營進紮。以攻餘城。前月十七廿四日。兩獲大陣。廿四日一仗。轟斃僞王鄧光明。此賊悍極。在諸賊會中最著名跡。除此一慙。差爲快慰。現在蘇泉已破。杭城外各石壘。直搗杭城。楚軍亦破餘杭七壘。賊黨思降者多。看來浙西三郡。或易持事。閩中兵事。亦漸得手。惟當慎以圖之耳。

我本無宦情。杭嘉湖了妥。當作歸計。惟浙民凋耗已極。當爲謀及長久。以盡此心。思欲流連一年半載。定其規畫。實未知朝廷不遽調離此間否。若閩中。則匪我思存矣。劉克菴楊石泉才德俱優。蔣獬泉才氣一時無兩。幕中多謹飭之士。爾來此執習。亦長才識。明年來時。有余三伯照料。亦可放心。我自病後。精氣大減。始衰之年。復元不易。此後當日見衰頹。故望兒輩來此少爲團聚。以娛我懷耳。

致孝威（五月三日杭州節署）

孝威知之。頃得爾書。知有外祖母之喪。殊爲痛愕。老人頻年多病。氣血虧耗已久。卒有此變。哀惋何言。爾大舅父聞耗。自當星奔回里。又未知有此盤費否。前得其信。知已得差遣。或張羅較易。我處奠敬。應從其厚。隨爾與爾母酌之。百金或二百金可耳。建坊一事。近無所聞。想必未辦。將來我必任之。但建於縣城。似不如建於鄉間爲妥。我近督師。經過城邑。石坊多遭燬壞者。故有此說。然亦聽汝舅父輩主之而已。貢院街祠屋。如何經理。爾來信總未說及。吾意先建中棟。以便安奉神座。（宜高大與對開之牌坊相匹。意以高與坊齊向以避煞耳。今歲山向不開。須明歲爲之。）其前棟應比中棟略低尺許。大門仍作正向。後棟則略與修葺。

爲試館可也。我應得浙撫養廉。擬呈繳萬兩入官。見在兼署並無半廉可得。其總督養廉。則以之修葺浙撫署矣。大約此項祠屋用度。及外祖母牌坊之費。均須俟明年寄歸也。賀仲肅家中光景窘甚。如家中餘銀。可撥百金。付其少君作家用。自杭餘克復後。戰事俱順。惟因皖南廣德州與甯國縣無兵守禦。致蘇常浙之賊。得由此過皖南以竄江西。曾節相與李中丞。均以縱賊爲速效之著。不得貽誤大局。乃至於此。尋亦悔之。已無及也。見在浙軍已追過廣信。因湖州現有大股悍賊盤踞未動。而常州丹陽克復後。賊衆均由湖州竄皖。須發兵截剿。故不克以大支入江西。俟湖州事定。我當移駐衢州督剿耳。自上年以來。腹泄之疾。日甚一日。而體更肥大。氣更虛弱。心神志慮。迥不如前。餘杭之克復。拜宮銜黃馬褂之特賞。惟恐受恩愈重。圖報愈難。思之惕然。爾輩如稍知我心。當益兢惕自持。免重我憂慮。道途多梗。爾可毋來。俟有平靜之日。再遣人來接爾。

致霖兒（八月初六夜杭州）

霖兒覽之。接七月初十日書。具悉家中安好。新得一孫。足慰老懷。是月克孝豐。可名之豐孫。所以志也。乳足則無須雇用乳母。不可過於愛之。吾家本寒素。爾父生而吮米汁。日夜咳聲。

不絕。臍爲突出。至今腹大而臍不深。吾母嘗言育我之艱。嚼米爲汁之苦。至今每一念及。猶如聞其聲也。爾生時。吾家已小康。亦未雇乳媪。吾蓋有念於此。少雲欲以第六女配豐孫。爾母欲俟十歲後再議。此甚有見。十歲後男女俱長。吾如尙在。當爲訂之。壬叟入學。最爲可喜。爾伯父望子甚切。而壬僅中人之資。得此固可塞責耳。試館明歲可改造。義學明歲可舉行。究竟需錢若干。如何規畫。爾來書不一言及何耶。義學之外。尙須添置義莊。以贍族之鰥寡孤獨。擴充備荒穀以救荒年。吾苦力不贍。帶兵五年。不私一錢。任疆圻三年。所餘養廉。不過一萬數千金。吾尙擬繳一萬兩作京餉。則存者不過數千而已耳。浙事了後。當赴閩一行。以一年度之。尙可餘廉泉數千。當欲請覲北上。卽決計乞休耳。約略言之。俾爾知自爲計。爾意必欲會試。吾不爾阻。其實則帖括之學。亦無害於學問。且可藉此磨礪心性。祇知八股一種。若作得精切妥愜。亦極不易。非多讀經書。博其義理之趣。多看經世有用之書。求諸事物之理。亦不能言之無疑於心也。爾初學淺嘗。固宜其視此太易。今歲并未見寄爾文字來。閱字畫亦無長進。可見爾之不會用心讀書。不留心學帖。乃妄意倖博科第。以便專心有用之學。吾所不解。曾記馮鈍吟先生有云。小時志大言大。父師切勿抑之。此爲庸俗父兄之拘束佳

子弟者言也。若爾之性質不踰中人。而我之教汝者。并不在科第之學。自不得以此例之。且爾欲爲有用之事。豈不可讀書。欲轟轟烈烈作一箇有用之人。豈必定由科第。汝父四十八九。猶一舉人。不數年位至督撫。亦何嘗由進士出身耶。當其未作官時。亦何嘗不爲科第之學。亦何嘗以會試爲事。今爾欲急赴會試以博科名。欲倖得科名以便爲有用之學。視讀書致用爲兩事。吾所不解也。大約近日頗事游嬉。未嘗學問。故不覺言之放曠如此。爾欲由湖南赴京。亦聽爾之便。吾以五年未見爾。故欲爾來浙。卽由浙進京。已遣袁升帶銀歸。并請余三伯挈爾同行。此信約月底可到。到時爾自定主意。

致孝威（十月二十九日富陽舟中）

孝威知之。日昨送我。舟中人客嘈雜。未及一一詳示。然究不知兒之能遵吾教否。又不能已於言。今日至富陽。酬應較少。乃書此寄之。兒此來。原擬令同住數月。始遣北上。不意閩中事急。不能不舍兒以去。吾旣去杭。兒亦宜及早北上。道途多游。游勇剽掠爲患。揚蘇常鎮一帶。時有戒心。兒未知遠行之難。世事之壞。一切皆宜詳慎。不宜粗率鹵莽。以貽余憂。近日察兒舉止。多有輕率之處。多由閱歷未深。如由弋陽至廣信時。正值湖州餘孽敗竄。兒放膽經過。

雖幸無事。然爾父亦數夕不能安臥矣。藉使在長沙時。少緩行期。俟予信至。就道。豈不安穩耶。爾抵杭後。閒譚日多。讀書日少。言動之間。童心未化。雖無大謬。可指。卻無佳處。可誇。窺其心之所存。不免有功名科第之念。此在尋常子弟。亦不爲謬。然吾意。卻不以此望兒也。自古功名振世之人。大都早年備嘗辛苦。至晚歲事權到手。乃有建樹。未聞早達而能大有所成者。天道非翕聚不能發舒。人事非歷練不能通曉。孟子孤臣孽子一章。原其所以達之故。在於操心危。慮患深。正謂此也。兒但知吾頻年事功之易。不知吾頻年涉歷之難。但知此日肅清之易。不知吾後此負荷之難。觀兒上爾母書。謂閩事當易了辦一語。可見兒之易視天下事也。書曰。思其難以圖其易。又曰。克難厥愼。古人建立豐功偉績。無不本其難其愼之心。出之。事後尙不敢稍自放恣。則事前更可知矣。少年意氣正盛。視天下無難事。及至事務盤錯。一再無成。而後爽然自失。豈不可惜。頃於舟中。見李雲鱗奉特旨撤去四品京堂。益用儆惕。以李雨蒼質地之美。何事不可爲。只緣言之易行之樂。遂致草草結局。假令潛心數載。俟蘊蓄既裕。而後見諸設施。豈遽止於此。兒當引以爲鑒也。至科第一事。無足重輕。名之立與不立。人之傳與不傳。并不在此。兒言欲早得科第。免留心帖括。得及早爲有用之學。如其誠然。

亦見志趣之不苟。然吾不能無疑。科第之學。本無與於事業。然欲求有意取科第之具。則正自不易。非熟讀經史。必不能通達事理。非潛心玩索。必不能體認入微。世人證八股人才。毫無用處。實則八股人才。亦極不易用。明代及我朝乾隆二三十年以前。名儒名臣。有不從八股出者乎。羅慎齋先生。以八股教人。其八股亦多不可訓。然嚴樂園先生從之遊。卒爲名臣。嘗言。得力於先生。在一思字。蓋以慎齋教人作八股。必沈思半日。然後下筆。其識解必求出尋常意見之外。乃首肯也。今之作者。但知塗澤敷衍。揣摩腔調。並不講題中實理。虛神題解。題分章法。股法。與僧衆誦經唸佛何異。如是而求人才出其衆。其可得哉。兒從師學時。俗八股。尙未有成。遽望以此。弋取科第。所見差矣。至謂俟得科第後。再讀有用之書。然則從前所讀何書。將來更讀何書耶。如果能熟精博注。則由此以窺聖賢蘊奧。亦復非難。不然。則書自書。人自人。八股自八股。學問自學問。科第不可必得。而學業迄無所成。豈不可惜。試細思之。至交游。必擇勝我者。一言一動。必慎其悔。尤爲切近之圖。斷不可曠言高論。自蹈輕浮惡習。不可胡思亂作。致爲下流之歸。兒當謹記吾言。不復多告。

致孝威（乙丑正月初一日延平行營）

孝威知之。爾在清江浦所寄一信。已由蕪泉方伯遞來。其寄爾母書。亦附驛遞去。計程當於臘底抵都。路途想均清吉。原飭爾卽住夏芝芬處。可免會館嘈雜。及別寓孤寂。諒已安榻夏宅矣。日間潛心讀書。寫字作試帖。須自立工課。有恆無間。自有益處。意念宜沈靜收斂。所有妄言妄動。須日一檢點。能自知有過。則過亦少。知有過而漸知媿改。則業自進。吾家積代寒素。至吾身而上膺乎國家重寄。忝竊至此。嘗用爲懼。一則先世艱苦太甚。吾雖勤瘁半身。而生所享受。嘗有先世所不逮者。懼累積餘慶。將自吾而止也。爾曹學業未成。遽忝科。目以世家子弟相待。規益之言。少入於耳。易長矜誇之氣。懼流俗紈袴之習。將自此而開也。爵賞之榮。兩疏固辭。尙未蒙鑒允。自不敢再有陳瀆。然憂患之念。日積懷來矣。閩事敗壞之極。所憂者不僅軍政之不修。武事之不競。而在民風之不正。吏治之日偷。自入閩以來。所見所聞。無非八九年前各省泄沓頹敗氣象。縱此時無巨股闖入。亦必趨於危亡。蓋人心日沈。人才日蔽。浸浸乎綱隳紐散之虞。非一時所能整頓也。中丞老而妄。方伯庸而專。均非從前意想所到。一省之大。無一卒之恃。一月之儲。所藉以勉強支持者。惟浙軍之二萬三千人。及浙餉每月十四萬而已。豈不傷哉。立盜伏草。行劫結會。從亂者處處皆然。吾駐軍延平。前後數十

里間。白晝搶劫之案。幾無日無之。數日後分兵四出掩捕。斬殺數十名。風乃稍息。然聚則匪而散則良。東捕而西竄者不知凡幾。高黃兩軍之進漳州。由省會興泉經過。處處皆須預爲購辦柴草米鹽。臨時無從買給。紮營盤亦須租價。否則聚衆持械。不與賊鬥而先與官仇。嗚。此獨非三代之民與。而乃至此。上失其道。民失其本心。匪伊朝夕矣。吾何修而能戡此亂解此劫乎。賊數本十數萬。入閩後而粵閩之從亂如歸者。又不知其紀。幸聞浙軍至。頗有震懾之意。將覓路他竄。欲求聚而殲之。勢有不能矣。非入江西。卽入粵東。毛寄雲沈幼丹空有援閩之議。恐將來仍須閩之往援。此等議論。切勿出口。徒招人怨。至囑。潤兒信來。十一月十五日舉一子。吾命之曰建孫。爾母聞甚健。入閩諸軍。克庵小挫後。亦復旋振。餘俱平適。惜劉簡青患難甚重耳。

致孝威（七月廿一日漳州大營）

孝威知之。接閏月二十一日信。知已安抵家中。途間均順。至爲慰意。先兩日甫得爾都中四月晦日書。正以爾盤費少。直東軍務正急。頗爲懸系。今竟安然無它也。會試不中甚好。科名一事。太倖。僥太順遂。未有能善爲後者。况所寄文稿本不佳。無中之理乎。芝芩書去。意欲爾

捐行走分部。且俟下次會試再說。我平生於仕官一事。最無繫戀慕愛之意。亦不爲仕宦望子弟。諺云。富貴怕見開花。我一書生。忝竊至此。從枯寂至顯榮。不過數年。可謂速化之至。絢爛之極。正衰歇之徵。惟當盡心盡力。以上報國恩。下拯黎庶。做我一生應做之事。爲爾等留些許地步。爾等更能蘊蓄培養。較之寒素子弟。加倍勤進力學。則詩書世澤。或猶可引之弗替。不至一旦澌滅殆盡也。世俗中人。見人家興旺。輒生忌嫉。無所施。則諂諛逢迎。以求濟其欲。爲子弟者。以寡交游。絕諧諛。爲第一要務。不可稍涉高興。稍露衿肆。其源頭仍在勤苦力學四字。勤苦則奢淫之念不禁。自無力學。則游惰之念不禁。自無而學業人品。乃可與寒素相等矣。爾在諸子中。年稍長。性識頗易於開悟。故我望爾自勉。以勉諸弟也。都中景況。我亦有所聞。仕習人才。均未見如何振奮。而時局方艱。可憂之事甚多。外間方面亦極乏才。每一思及。輒爲鬱鬱。爾此後且專意讀書。暫勿入世。爲是古人經濟學問。都在蕭閒寂寞中。練習來出。積之既久。一旦事權到手。隨時舉而措之。有一二場大節目。事辦得妥當。便足名世。目今人稱之爲才子。爲名士。爲佳公子。皆諛詞。不足信。卽令真是才子名士佳公子。亦極無足取耳。識之。六年不見爾母及爾曹兄弟姊妹。又兩新婦兩孫。亦時念之。惟現在汪逆入粵。

後。兇焰尙張。其蓄意在竄江西。另尋生路。眷屬來閩。必從江西取道。暫可緩之。俟賊蹤有定。再由此間派人來接。將來恐須由長沙雇船到九江湖口換船。至江西廣信府之河口。由陸路赴福建之崇安。雇船到福建省城。方爲妥便也。（此路游勇士匪無處無之。來時須帶勇士百名防護。）潤兒今歲原可不應試。文、詩、字、無一可望。斷不能僥倖。若因家世顯耀。竟獲僥倖。不但人言可畏。且占去寒士進身之階。於心終有所難安也。爾母於此等處。總不能明白。何耶。前接爾信。索銀甚急。已託周壽山由福建銀號匯兌紋銀八百兩。交芝苓收轉。交爾用。想芝苓早已接得。除還借項二百兩外。當以二百兩送綿師。二百兩送芝苓。餘卽留芝苓處應酬各項。

復京橋二兄書（十二月十一日王家渡舟次）

昨抵章門。遣石清攜匯票八千兩。以六千金捐入湘陰作義舉。以一千五百六建試院。餘以買史坡可田。閩浙廉銀用盡。（留三千兩作家眷回湘之費。）此八千乃預支陝甘廉也。所以急爲安置者。五十外人。且有萬里之行。了一件卽是一件耳。輪船爲救時急著。慘澹經營。幸蒙俞允。西行則車營屯田。又須從新安置。此皆舊病舊方耳。兄前以屯田爲問。孫侍講所

議。弟未見過。大約是指腹地兵燹之後而言。意在節餉耳。現在江浙兵後。田土荒蕪多而且久。招墾可行。而開屯不便者。爲其有主無主。多有錯雜。兵民雜處。最難相安。有要地應屯兵之處。閒田無多。其閒田最多者。何能且戰且耕。且一營之人。分布十里數十里。難於照管約束耳。弟昔在嚴州。以兵荒米貴。故曾力爲於此。而其用心。則專在救饑民。故有軍士耕種甫畢。忽地主出認者。并有荒至三年之田。臨收穫時。地主向分租者。皆一概許與。令軍士弗與爭論。故拔營向富陽餘杭時。孩童婦女數百。皆環拜泣謝而去。其餘各災區。則止借與籽種牛力。(均由温台買來浙西則無一牛也。傷哉)并分三等發賑。令官委之。耐勞苦有實心者。於發賑時勸相之。見在浙中吏治爲東南最。則皆此等人也。每縣十餘元。或米穀數百石而已。此僅可謂之勸墾。而不得謂之屯田也。至關隴則地多平衍。人民死亡過半。回產既無人耕種。漢產亦多荒蕪。向時稻米二十餘文一斤者。今貴至一錢內外。且無從購取。若不開屯。則立虞饑潰。人之糧糗。馬之芻豆。舉待給於數百里千餘里之外。戰何以戰。守何以守。自古邊塞用兵。無不以興屯爲守務者此也。趙壯侯屯田三秦。尤爲中肯。前此弟在浙閩。適蒙朝廷垂詢及之。遂以軍營屯田兩事對答朝議。於軍營尙以爲然。屯田則置不論。茲乃悟其必

如是而後西事始有入手處。亦緣疆臣號饑之章。層見叠出。無以應之故耳。否則鮮不以爲迂矣。自奉西征之天命。自限四十日料理閩事。而後卸篆。發摺三十餘件。片四十餘件。心力爲瘁。癸姪爲吾寫摺。亦無輟筆之時。已倩人錄副稿歸。兄取視之。當不嗤其妄也。近得閩中家信。得兩女孫。弟歸本擬臘月回湘。弟屬以俟明正乃行。蓋冬盡水涸灘高。艱阻萬狀也。乃閩中士民。則盼其重來而。昨日途中奉到寄賜。則亦謂俟甘事底定。則朝廷不難令左某來閩。然則夙緣仍未盡耶。自章門登舟行三十里。風雪大作。今晚初晴。若順風。三兩日由吳城換船過湖。臘杪常抵漢口耳。

致筠心（四月二十日樊城書）

筠心夫人覽者。得四月初六日書。具悉家中近事平安。甚慰客懷。屯愾口德安。均無戰事。所到官民。均恃以爲固。四月初一日。擊賊隨州。僅小有斬獲。以賊見礮車卽走。不固拒也。初三日。淮軍到德安。我軍由隨州棗陽趨襄陽。初八日。抵樊城。趕雇車馱。今十二日矣。所雇購者不及一半。適捻賊敗楊鼎勳之淮軍。復由漢黃及安陸。意在乘虛渡漢。渡漢不得則由襄棗以竄豫也。我軍又須回戈擊之。今夜月明時。潛師夜起。結營峪山八條岡。擬仍合長圍困之。

幸秦捻爲劉提督松山黃道鼎所敗。勢已大蹙。隴回亦多乞撫。我援入秦隴。亦無害也。鄂中大旱。秧田枯拆。首種不入。民間日夜避兵。嗚呼滿道。深可傷憫。我之遲回於此。亦欲爲中原銷此巨患耳。試館已動工。凡工師工費賞犒之需。少從寬裕。俾樂於從事。孝威主之。不必問之二伯。家下事。一以謹厚樸儉爲主。秋收後。還是移居柳莊。耕田讀書。可遠囂雜。十數年前風景。想堪尋味也。

致孝威（六月十三日行營）

孝威知悉。樊城一月至靈寶。酷熱不可當。前月十七八。本月初四。大雨連朝。又爲泥濘所苦。師行之艱。至此而極。師進潼關。克帥進武關。高果臣飭由蜀河口進引駕回。三路並進。聲威頗壯。狡賊本欲東竄豫州。防大軍且至。恐扼殺於函峪關。隻輪不返。則竄同郡。圖河竄晉。又爲劉壽卿所敗。現復西竄。奉朝命兼制晉防。擬於潼關小憩數日。察其動靜圖之。我與克翁果臣分三路。地勢尙合。入秦以後。穩紮穩打。或望得手也。回患斷非剿撫兼施。而又能攻其心不可。所出之示。錄寄一閱。手此告爾等。毋我念。

雙

銜示。

大軍西征。由秦趨隴。殺賊安民。良善毋恐。擒寇縱橫。害吾赤子。剿絕其命。良非得已。多殺非仁。輕怒非勇。誅止元惡。鉏必非種。凡厥平民。被賊裹脅。歸誠免死。禁止剽劫。漢回讎殺。事起細微。漢禍旣慘。回亦無歸。帝曰漢回。皆吾民也。匪人必誅。宥其良者。使者用兵。仁義節制。用剿用撫。何威何惠。我諭吾民。俾曉吾意。勿比匪人。以死爲戲。大軍所至。如雷如霆。迅掃郊甸。遠征不庭。

致孝威（戊辰正月二十五日獲鹿行營）

孝威知之。已作書由驛寄來。計已先到。今因艾生回湘。復作此寄上。時事殆不可支。自入關以來。無一事順手。已知其必有異矣。幸山東諸捻。已將剿盡。或可暫救目前。然淮勇本卽捻逆。其剽悍斷不能改。陝甘土匪潰卒回匪。到處皆是。川楚哥老亦然。督撫多用庸才。亂何由定。此行不但欲清河北賊。亦欲於軍事之暇。請於陛見一詳陳之。然非戰勝。則言不足重也。霖兒兄弟。總是讀書家居爲是。不可令作官。致自尋苦惱。屢飭爾家居奉母課弟。毋急求仕進。何竟忘之。昨接爾伯父書。言爾母臘初脚氣大發。初八日後。病勢增劇。至十七八等日。險症層出。醫言脈絕不可爲矣。爾伯父乃遣人追之折回。至二十二十三日連進葭茸大劑。漸

有轉機。爾伯又諭爾今安心會試。勿須回也。我前接爾北上之信。卽馳書王若農。請其極力阻止折回。其時未知爾母病狀。并怪爾母任爾妄動。致違我教。想爾途間接到此信。必已折轉。又恐爾或來到京。故作此請夏芝荅與爾閱。爾如尙在京。斷不准會試。卽暫住。候我信到。再動身南歸。初六日。行抵望都。接爾前月二十八來信。知爾竟抵都中。安頓會試矣。不意爾竟敢違我訓飭如此。前因摺弁來京。曾寄一信與爾。料亦及爾。伯父及王若農追討折回之信。或未接得。故姑作一函。交夏三兄與爾閱。想湖南家信。亦必續到。此時亦無可諭知者。惟盼爾母能康復如常。俾爾免爲罪人耳。我因捻逆渡河。憂憤欲死。故恩遽率五千步隊前來。當啓行時。疏已陳入直。亦料逆賊過晉豫後。必將入犯畿甸。晉豫無足當之。直隸亦然。不忍不來。不敢不速也。此行必前驅殺賊。以求心之所安。利鈍舉非所計。爾斷不准入闈。赴試。天下有父履危地母在牀。而其子猶從容就試者乎。汝安能爲之矣。初六日。望都行營諭。不會試。亦不必來營。來營徒添我累。又囑。

致孝威（四月十八日吳橋行次）

孝威覽之。今日吳橋營次。有平江朱孝廉（基）遣人來尋向朱副將（德樹）借銀。不知朱

副將在陝。未來也。詢知湖南會榜中十四人。不知其姓名。爾所錄寄該稿。首作尙可。次三不佳。詩有稚句。不中爲宜。斷不可發下第牢騷。惹人訕笑。反求諸己可也。况爾已蒙恩官。更不當與寒士爭進取。孝寬三月中旬書來。言爾母服葺補劑。漸望復元。惟足腫未愈。家中大小均吉。可無罣念。爾可不急出京。以沿途游勇惡團。到處皆是。無法無天。行旅時有戒心。如已出都。則暫於保定客店住歇旬日。見張廉訪（號正軒）向其詢軍行進止。作信請其發遞。以便營中遣人來接。軍行無定。不得不如此。（已信致張廉訪。并得其回信照辦。）切勿躁急。爲貽我憂。賊由津折竄而南。已入山東境。我軍緊追。十一、十二、十三、連獲勝仗。我亦卽率師南趨武定東昌之間。東阻大海。南濱大河。西阻連河。見值黃連交漲。積潦縱橫。北則各軍兜勦。劉張宋馬隊總之。機局湊拍。或可於此間了卻。李丁英均防黃連。我軍主勦。不敢稍有諉避也。

致孝威（四月十九日連鎮大營）

孝威覽之前。由宛平遞寄一書。計已得達。昨接爾由宛平遞來一緘。知爾近未出都。甚爲欣慰。未接爾信之前。已數夕展轉牀褥。不能合眼也。直隸之大順廣一帶。與山東河南接壤。各

處民團。兇悍異常。專與兵勇爲仇。見則必殺。殺則必毒。殺機已開。將成浩劫。近更波及行旅。似此光景。成何世界。論者尙謂民氣可用。兵勇擾害。激成事端。將誰欺乎。據見在情形。軍勢而論。非嚴禁遊勇。嚴行軍令。不足以杜百姓之口。非嚴治痞棍。嚴辦團總。不足以服將士之心。若務爲姑息。以苟安目前。則苗宋之禍不遠矣。淮軍穴雜殊甚。其驕佚習氣。實冠諸軍。皖軍多收捻餘。戰不足恃。且恐爲賊添夥黨。東軍在弱不任戰。僅我軍士馬一萬九千。尙未至大壞耳。奉朝命專顧直運。近又兼顧畿防。故遂趨駐連鎮。而分布劉郭於東光以北。喜桂亭馬軍。於連鎮以北。互相聯絡。摩厲以須。又遵恩旨。分防滅河。西接連河十餘里。以大兵十數萬。盡注東省。而直隸僅滅河有不能戰之楊鼎勳一軍。此外別無大枝勁旅。而運防乃滅河交界之處。百六十七里。處處空虛。水勢逐日消退。徒恃囂凌雜湊之團。斷不可恃也。賊不得逞於南。爲北竄自在意中。我軍不日當有戰事。能猛打數大仗。此賊乃可殲除。否則一踰運西。大局更難支矣。劉郭極和。喜亦極思振作。戰有濟乎。下第公車。多苦寒之士。又值道途不靖。車馬難雇。思之惻然。吾當三次不第時。策蹇歸來。尙值清平無事之際。而飢渴窘迫勞頓疲乏之狀。至今每一憶及。如在目前。兒體我意。分送五百餘金。可見兒之志趣。異於尋常。執

褲。惟聞車價每輛七十八金。寒士何從措此巨款。或暫時留京。俟事定再作歸計。亦無不可。其或歸思孔亟。萬難久待。兒可代爲籌劃。酌加餽贈。我雖一分不苟。然廉俸尙優。以千金交兒。以五百金爲孝寬領照。以百金爲族中節婦請恩旌。以百金爲爾母買高麗蔴。以百金寄謝凌伯。祝爽亭。堽已省親暫回衛郡。未在軍中。百金寄周荇農。以百金爲兒行賞。了此私事。再以千金交兒。分贈同鄉寒士。爲歸途川費。或搭輪船。或俟秋間車馬價賤再作歸計。均聽其便。今作一信寄胡雪巖爲券。請其號友匯兌（庫平二千二百兩）從洋款項下劃還歸款。爾可持此信到阜康。取庫平銀二千兩。俟銀取到。再將諸事逐件料理。卽雇車到天津。與夏筱濤同住。請由官封寄一信來。再候我信赴營可耳。王師處再致百金爲家用。綿師處亦致百金。合已挪阜康之八百兩。則三千矣。

致孝威（己巳二月初四日咸陽行營）

字諭孝威知悉。接爾等來信。如家中一切粗安。至慰遠想。惟入關以後。餉事兵事。一手經理。日少暇晷。亦不及分心家事。屢欲作家信。提筆輒止。爾等如知陝西無恙。卽爾父無恙也。司農之直樞垣者。有意與我爲難。去臘已直疏其奸。語雖痛切。比奉到諭旨猶速。議不認過。而

窺聖意已覺其支飾。見具疏請別立西征餉名。以免侵占陝餉攫取甘餉之疑。未知能深蒙
鑒諒否也。兵事甚順。檄前劉壽卿部全軍由山西永寧過河赴綏德州。相機進剿。旬有餘日。
縱橫掃蕩。延綏一帶肅清。歸綏無警。足以慰聖意。而同逆屢經剿敗。仍一面乞撫。一面肆掠。
克菴中丞。頗以將就了事爲意。將來後患。殆不可思議。我已會銜入告主剿。一面提兵前進。
初二日抵咸陽。晤商克菴。定策後即進乾州。分營赴雲台之百里鎮。再進邠州。身當前敵。兵
事常有幾分把握。惟西北用兵。糧與運較餉尤難。與東南迥異。一切極費周章。不能作一爽
快之舉。我內無奧援。外多宿怨。顛越卽在意中。惟各行其實。不恤其它。上可對君父。可對祖
先。畢竟勝常人一籌。爾等須加意謹慎。時時存一覆巢之想。存一籍沒之想。庶受禍不至太
酷耳。爾母病體漸愈。須好服侍。孝寬性分太低。急宜自安鈍樸。勿存非分之想。勸同須發憤
讀書。勿存染世俗習氣。吾願足矣。餘無他言。敬庵宗樹名條。已交若農代捐矣。

致孝威（四月廿四日乾州行營）

孝威知悉。三月廿六日書到。具知一切。四姊命運蹇薄。早已慮之。今竟如此。殊爲悲切。元伯
出繼之子。如能讀書。可望成立。亦足慰懷。慶生上年卽有癩癩之疾。是否以此畢命。來緘未

詳。何也。佑生夭折。亦在意中。（有無子嗣。）爾外家家運不好。我會與爾母言之。爾舅父母輩均本分人。惟義理不甚明曉。家運不濟。亦由於此。吾願爾兄弟讀書做人。宜常守我訓。兄弟天親。本無間隔。家人之離。起於婦子。外面和好。中無實意。吾觀世俗人家。多由此而衰替也。我一介寒儒。忝竊方鎮。功名事業。兼而有之。豈不能增置田產以爲子孫之計。然子弟欲其成人。總要從寒苦艱難中做起。多蘊釀一代。多延久一代也。西事艱阻萬分。人人望而卻步。我獨一力承當。亦是欲受盡苦楚。留點福澤與兒孫。留點榜樣在人世耳。爾爲家督。須率諸弟婦加意刻省。菲衣薄食。早作夜思。各勸職業。樽節有餘。除奉母外。潤贍宗鄰。再有餘則濟窮乏。孤苦。其自奉也至薄。其待人也必厚。兄弟之間。情文交至。妯娌承風。毫無乖異。庶幾能支門戶矣。時時存一傾覆之想。或可保全。時時存一敗裂之想。或免顛越。斷不可恃。乃父乃父亦無可恃也。陝回就撫。而仍包藏禍心。其頭目皆市獍賤種。其黨夥皆悍鷲凶人。方議撫時。竟敢糾黨四出。掠我定邊。擾我延川。延長。南及秦州。吾知其不可撫也。則決計剿之。董志原回巢。即古彭原。地介居環慶涇原邠寧之間。爲秦隴要齊。匪自五年竊踞以來。陝西邊方。日盡多事。至此乃能復之。其時高軍變於宜君之楊店。劉軍變於綏德州。正當追剿喫緊。

之時。肘腋變生。未能橫衝側擊。夷其種類。此則耿耿於懷。未能自釋者。幸果軍之變。五日旋定。陣斬千餘。訊決者百數人。元凶均誅。磔剝心祭果臣。綏德之變。十日旋定。壽卿平日威信甚著。叛軍聞其東來。自縛匪徒詣營歸款。是皆出於意計之外。若非朝廷威福之盛。何以臻此。此數十日中。辦哥老會匪。辦叛卒。辦回逆。撫漢民。籌耕墾。興屯政。刻不暇給。又值餉事艱阻之會。搶攘跋扈。大概可知。俟糧運轉齊。乃進駐涇州耳。辦回之法。已盡於前年。分別剿撫告示中。大抵回民入居中土。自三代以來。卽有之。傳記中疆以戎索及驪戎陸渾之戎徐戎皆是也。欲舉其種而滅之。無此理。亦無此事。前年四字告示中。有帝曰漢回。皆吾民也。兩句。回逆讀之。亦爲感泣。可見人心之同。且令中外回民。均曉然於官司。並無專剿回民之意。亦知覆載甚宏。必不協以謀我。將來鋤其桀黠。策其善良。便可百年無事。若專逞兵威。則迫逐陝回而之甘。迫逐甘回而之口外。迫逐口外而之土耳其等祖國。究竟止戈何時。無論平慶涇涼一帶。縱橫數千里。黃沙白骨。路絕人蹤。無可裹之糧。無可因之餉。萬難偏師直入也。而剿之一法。徒主用奇。足以取威。不足以示信。武卿之討孟獲。清納攻心之策。七擒而七縱之。非不知一刀兩斷之爲爽快者。故吾於諸回求撫之稟。直揭其詐。而明告以用兵之不容已。

並未略涉含糊。於是回民知前之撫本出至誠。後之剿乃其自取。而其終仍歸於撫局。現又有來求撫者。仍不可信。我乃察其誠僞而分別撫之可耳。軍興既久。哥老會匪。東南各省。遍地皆然。吾於金盤嶺練軍時。卽嚴定立斬之條。蓋慮其必有今日。自閩浙轉戰而來。舊勇物故。假歸者多。時須換補。而匪徒卽伏匿其間。比上年轉戰直東。各省游勇麇聚。連鎮吳橋之間。潛相勾煽。而此風轉熾。凱旋後駐軍西關。察親兵一營。卽有數百人會者。密諭巡捕稽察。得其姓名。忽一日傳齊。勒令首悔。新阻撓者一人。兩日半。繳出匪憑二百餘起。其先自私燬者無數。吾於次日祭旗誓師。令首悔者均飲血酒。未入會者亦同飲。事畢。各歸原伍。許以不死。帳之前後侍立者如故。守更者如故。夜間被酒酣臥。若無事者。衆心大安。今且助拏哥會。不復有所顧忌。簡紹雍到時。吾與之午飯。笑言此來哥匪不少。囑其察出訓誡。以吾法治之。其夜拿一大頭目同簡來。未入伍。吳三友。廣東補用參將。湖廣指拿之匪首。訊畢斬之。人皆驚服。後又獲數犯。斬者釋者。各如其情。漸有假歸復來弁勇。自請改悔者。仍取保結收伍。看來吾軍無虞。各軍做行。皆能如法。惟果臣於哥匪頭丁玉龍。鄖宏勝。有欲殺之意。而猶豫不決。遂罹其害。所謂當斷不斷。反受其亂也。上年初返陝西時。察出丁太洋。短勇丁一百四

十餘名。卽應奏請正法。其時尙未接爾信。簡紹雍云云也。軍情日久懈生。非振作不可。然必能得其平。人心帖服。適然不驚。否則必激成異變。斬一卒而一營無代。訴其冤者。斬一營官而各官營弁勇無代。稱其冤者。則殺不爲濫。否則必有隱患。亦干陰譴。吾平生不肯作快心之事。以人命爲兒戲。因爾信來。屢問及軍事。故略示一二。俾爾有所知。魏銘老實無用。既好作語言。則尤不可容。接到爾二弟所錄寄艾生信稿。下札摧其速歸。伊到鄂必又造謠。已致若農勿理會矣。伊已託病告假出居乾州。又赴省城就醫。我已於其長支二百餘兩外。囑局借給醫藥之資。囑其治好回營。蓋不料其託病等艾生回信也。用心至此。亦殊奇特。古云小人難防。正以其愚而詐。良然。曾滌生爲人。艾生信中頗詳。才尙可用。尙須歷練。克庵竟入人言。當司道大加申斥。則過矣。手此諭知。可送與二伯看。忙中不多寄家信也。

致孝威（臘月十六日平涼大營）

孝威兄弟同覽。連接爾等來信。知眷集平安。爾母病體尙能如常。甚慰。我意新添兩孫。大者命曰念恂。小者命曰念恕。豐孫卽易曰念謙。可也。恂呼毅孫。以八月師進靈武。大申馬逆之討。除隱匿。決大疑。卒能動天鑿也。恕呼恩孫。以十一月駐節平涼。洗冤澤物。宣揚我朝廷仁

澤民以爲恩也。此吾詒之穀也。豐出模本。字甚秀勁可愛。聞其喜讀書。天性亦厚。尤爲歡慰。但年齡尙小。每日工課。斷不可多。能唸兩百字。只令唸一百字。能寫百字。只令寫五十字。起坐聽其自由。不可太加拘束。飲食宜淡泊。衣冠宜樸潔。久久自然成一讀書子弟。便是過望。吾家積世寒素。吾驟致大名。美已盡矣。須常時蘊釀元氣。再重之積累。庶可多延時日也。先生品既端。卽是難得。助同性分本不高。難於開曉。不能怪先生不善教誘也。最怕是輕儇刻薄之流。一經延致。便令子弟不成好樣也。慎之。大舅廣東有信來否。光景何如。爾民在江西。專想做官。三姐有信來。有典盡押絕之說。吾以四百兩匯寄。尙未接其回信。將來看外孫能成人否。四姐苦命。在家有二姐同住。尙不寂寞。爾曹可敬事之如兄。今歲湖南水災過重。災異疊見。吾捐廉萬兩助賑。并不入奏。回思道光二十八年。柳莊散米散藥。情景如昨。彼時吾以世生爲此。人以爲義可也。至今時位至總督。握掌欽符。養廉歲得二萬兩。區區之賑。爲德於鄉。亦何足云。有道及此者。謹謝之。慎勿如世俗求鉞。至要至要。吾嘗言士人居鄉里。能救一命。卽一功德。以其無活人之權也。若居然高官厚祿。則所託命者奚止數萬百萬。縱能時存活人之心。時作活人之事。尙未知所活幾何。其求活未能。欲救不得者。皆罪過也。况敢

以之爲功乎。自入關隴以來。首以賑撫爲急。總不欲令吾目中見一餓斃之人。吾耳中聞一餓斃之事。隴之苦况。與浙江嚴州光景相似。而荒瘠過之。人民百不存一矣。狼最多。至於匪盜之害吾民者。必捕獲盡法懲處。行吾心之所安。求不爲兒孫造孽而已。爾曹試以此存之心胸間。縱常居鄉里。亦足稱善人也。禁種罌粟。爲此間第一義。長髮捻回之劫。皆此毒釀成。今付四字諭一本與爾曹閱。爾言延哥光景艱難。欲爲其買田作久遠計。於義甚當。吾非忘之也。特以延哥和哥性質。均非可處樂之人。愚而多財。將益其過。故每恠之。冀其從艱苦長些志氣耳。茲竟無望矣。延和有子。近并不知其光景何似。擬各予千金之產。（和爲我甥。豈可歧視。）俾有飯喫。有衣穿。以完吾素願。此項可從吾養廉項下劃給。當致書若農觀察。撥交爾曹。今年未寄銀歸。不知家中光景何如。二伯處每年二百兩。必應致送。以爲甘旨之奉。可向若農處請之。此等瑣屑事。我實無閒工夫著想也。戰事均順。惟十一月初九日。簡紹雍以深入至敗。紹雍中礮陣亡。營官姚連升譚正明同殉。以致機局忽滯。諸軍正偏金積堡。後路轉運復梗。見正力圖疏通道路。所幸諸軍尙能穩紮。後路援賊又經打敗。或無他虞耳。甘肅吏事兵事。均不可問。整理最難。以前署督庸妄太甚。而樞廷袒之也。近見我推心置腹。凡

諸顧全。始感服。而樞廷之意始轉。金積堡逆馬化澹。以新教煽惑回民。西寧河州口外各回民。均依皈之。潛謀雄長回都。諸回部奉爲宗主。馬化澹夜郎自大。封授僞官。自稱大總戎。稱兵爲敵人。頻年陝甘各回。擾攘不寧。均此逆爲祟也。穆將軍三年前辦此不了。遂以撫局羈縻之。并劾主剿之都將軍以誤邦國。其實中外。無不知馬化澹之終爲異患也。該逆所居之金積堡。當靈州秦漢兩渠間。（卽唐之靈武。）地險城堅。貿易通西北及北五省。蒙古各部。落。擅茶馬鹽之利。富可敵國。而廟堂以兵事方殷。以度外置之。阿拉善親王因受其毒害。訴於天朝。并言穆用其銀數萬求恩賞還。穆又自陳每年得馬化澹糧數千石。實其納賄亦不少。阿拉善王上書於我。痛罵穆將軍。穆會奏馬化澹實是良回。隱以我爲激變也。此公人亦老實。特爲其謀主所弄。遂爾顛倒錯亂如此。與族員開口舌。是吃虧事。與前任爭是非。非厚道事。然事關乎君國。兼涉中外。不能將就了局。且索性幹去而已。我近來腹瀉仍如常。每日或一二次。三次四次。五六七八次不等。脾陽虛極。腎氣耗竭。心血用盡。面目尙如舊。而健忘特甚。只盼隴事早了。當急求退休。斷不能肩此重任。本擬接督篆卽繳納欽符。有言若無欽符。餉事更難應手。不得已仍擁此虛器。非我志也。

致孝威（三月十二日平涼大營）

威寬助同知悉。二月二十五日信到。爾等長爲無母之人矣。以爾母賢明慈淑。不及中壽而殞。由寒士妻。榮至一品。不爲不幸。然終身不知安閒享受之樂。常履憂患。福命不薄。鬱悴偏多。此可哀也。執筆爲墓銘。不獨過實。然心滋傷矣。爾等遲出。於母德未能詳知。近年稍有知識。於爾母言行儀範。當略有所窺。暇時盍錄爲行述。傳示後世。俾吾家子孫有所取法。亦樅柝遺澤之思也。誌銘寫就。遣巡捕粟游擊龍山齋歸。明日成行。須四月中旬後。乃到。先錄一通。付兒等閱之。葬地既不能猝得。城外寺院又不可停。暫奄家堂亦可。如爲日稍久。或於屋後疏圃中有爲窆室亦可。以地空曠無意外之虞也。二伯意欲存金剛院。亦省城喪事常例。旣難民雜處。不免囂雜汗穢。卽可不必議及。况爾每於外祖母沒時。曾有不忍遽死其親之說。則暫時奄柩中堂。尤所宜也。古不擇地而葬。而大夫三月士踰月。已垂之訓典。儻亦有不忍其親之意歟。史坡爲吾父母葬魄之所。初擬與二伯兩房序葬其西。二伯旣以今年三煞在此。未可啓土爲塚。自當別卜吉壤。柳莊土薄水淺。在處皆蟻。人家棟柱。無數年不易者。卽見在住屋亦然。爾母生時。常謂柳莊田園皆適意。惟鄉莊無聞人。多白蟻。未可長子孫。他年

須別尋樂土。余亦以爲然。從前謀買山避亂。每往來東大山一帶。見其山勢透迤磅礴。指縣東北六七十里。若柳莊左段。則縣東西三四十別是一枝山也。自平江連雲山來。白水洞梓木洞山脈。均自此來。枝脚分起。大有佳處。惜未能從容尋玩。若於此數十里間。覓一安妥之地。較爲得之。水至同涵口始合流歸湖。卽泪水也。將來營葬時。卽爲我作一生壙。以慰同穴之意可也。此意亦曾爲爾母說過。彼時爾兄弟甫生。姊姊亦小。不知大二姊尙能記憶否耳。葬期亦必選擇。不可有衝犯。但取無凶煞者用之。如不能決。則卜諸母靈亦可。陰陽家言。亦不能盡謂其無。但不必過於拘泥。軍中不可持私服。吾此時尚未能成服。須待他時補之。計則斷不發。卽家中散計。亦宜斟酌。蓋親友應弔者。不待計。其待計而弔者。亦可不散也。曾見人家有先不散計。俟平時同謝帖散者。如須散計。卽可照此辦理。喪事之用鼓吹。蓋爲祭奠設也。亦散達於幽陰之義。俗例以此爲鬧熱。殊爲非禮。有爲設而不作之說者。亦祇合而生者居喪之禮。無於享薦亡者之意未合。吾以爲臨葬時。先日啓攢。次日家奠。次日祖餞。均有鼓吹。但不以之送迎賓客。非祭奠不用樂。似爲得之。俗例喪事以題主爲重。實則以顯者臨之。加殊主上。最爲失禮。且賤其親也。可不遵行。古人書主。卽擇子弟能書者。對靈書之。以見

在事理言之。丁叟姪。少雲壻。皆善書者。請其書主爲宜。成主之禮宜行。賀主則不必也。出殯儀仗護從。可照品級。非第榮其親。禮不可廢。會典當考究。有不能備者。亦不必拘。喪禮謹嚴。古人以此爲專門之學。世衰禮廢。全不講習。禮曰。居喪未葬。讀喪禮。爾等宜於苦白有加意講求。庶免留遺憾。免爲罪人。切問齋文鈔。經世文編。望溪先生喪禮。或問。均可於禮經外讀之。數種皆家中所有也。作塚以三合土和斫極熟爲好。可避蟻患樹根之患。棺外兩旁兩頭均宜築之。惟棺底不宜用三合。以其含水也。棺上亦不宜。以其絕天氣也。唐以後。喪事多飯僧。雖士大夫亦不知其非。吾家以積世寒儒。故從無飯僧作佛事者。惟古人飯僧以資冥福。亦非無理。爾母生平仁厚好施予。此意尤當體之。吾意省城難民尙多。或於出殯之日。散給錢文。亦勝飯僧十倍。聞有名冊在官。尤易預算。屆時當請李仲雲商量辦法。不必令其到門。亦不必先使聞知。至城中乞丐。亦當布施及之。但以錢不以飯菜。庶期簡便均勻。省無益之費用。俵給窮民。亦資爾母冥福。此事約須數百千。不必惜也。二伯年高。近復多病。所有諸事。與壬丁商之。即可得主意。如有疑難決。再請二伯訓示。不必以瑣事絮聒爲要。地師難覓高者。爾言長沙王君與爾舊識。吾不能知。旣請其看地。尤不求上吉風水。自可易得。惟吾意旣

在東大山。自須覓彼間土著人帶其同往。一也。須派人挑火食。打竹兜。帶盤纏。在彼盤桓相度。方期有所獲。二也。不可迫促從事。既以大事相託。當時加體念。至要。至要。爾言山場要寬大。又要就近買少許墓田。恐難湊巧。吾意總以卜吉得地爲主。山場寬狹。有無墓田可買。均不必打算。惟立契時。須將公私分際。前後交涉各要件仔細檢點。乃可成交。免日後唇舌。又買地須彼此情願。斷不可稍涉勉強。稍用勢力欺壓。此事亦有定數。非人力所能強致。若須用心機。稍近欺壓。便非好事。亦斷非好地也。孝子不儉其親。喪事典禮攸關。自不可過於省約。然用費亦宜計算。不可鋪張門面。忘却義理。人言家中光景如此。不能放作寒乞相。此等話。亦當留心。理所當用。稍多無疑。所不當用。卽一文亦不可用。專講體面。不講道理。吾所恥也。二伯信來云。孝威當母病亟時。曾割臂肉。求以療母。此等處。亦見爾天性真摯。但老父力疾督師於外。哀而至毀。獨不慮傷厥考心耶。助同天分均不高。威寬宜教督學好。喪葬最重。威寬宜慎襄大事。庶足慰母。亦令我稍釋憂懷。至囑。先此諭知。

致孝威（七月初二日平涼大營）

孝威等閱悉。得家信。知爾母已於四月底暫厝史坡。（墓誌已另寫交黃副將席珍帶歸。計

到在此信之後。較之後圃自妥。將來卜葬玉池一帶。可免繞道。吾心亦慰。玉池一帶數十里山脈。均來自平江。在湘陰縣東數十里。逆湘水而上。此一帶山勢稍厚。枝脚亦多。得地較易。但得平穩夷曠之區。可避五患。卽佳壤也。不必深求。（愈求佳愈致誤。必然之理。倒是葬墳要緊。）將來亦不必豐碑大塚。致遭異患。吾前過北邙。僅見白楊數樹。碑碣俱無。渡渭而北。見陵墓尤多。陪葬大塚。亦復壘壘在目。然皆禾黍高抵牛羊踐履而已。千百年陵谷變遷。聖賢仙佛。均不可復問。幾見體魄之長存乎。劉懷清自閩回。聞尙在家。渠於玉池一帶地。址尙熟。可能訪地嚮導。買地卽買墓田數畝。作一墓廬。以備歲時登墓休息。地亦可。可否俟之異日。墓誌刻本。可於長沙照式刻。卽以寄親友。前囑爾等記爾母言行。以作家範。非爲爾母表彰計。蓋以爾母言動有法度。治家有條理。教兒女慈而能嚴。待僕媪明而有恩。頗非流俗所及。意欲吾家守此弗替也。盍試爲之。喪禮祭禮。當於此時講明切究。（堪輿書講巒頭者亦須理會。惟講理氣者太謬。不宜看。）以世衰禮廢。喪祭尤要。能判數年學禮。亦免馬牛襟裙之誚。卽此是孝。亦卽此是學也。得湘中書。似年景尙可望熟。在爾信之後。或暢晴後氣象不同耶。旣時族中信。年饑較二十八年爲甚。借穀四百石俵給之。爾意甚善。但不知吾前

所積之備荒穀。見復如何。仁風團亦有積穀。數年不加聞問。殊爲念之。下次信來。可詳以告我。少雲是否決計北行。大姊回小淹否。三姊有信來否。四姊無子早夭。爾大舅欲爲立繼聽之。如不立繼。亦可也。二姊極有爾母遺風。家事均須稟之而行。諸婦善事二姊。不可令二姊煩惱。至要。至要。西事尙好。我自當盡心力所能到者辦之。已詳致二伯信中。未封口。看畢卽呈覽。謝孝酬勞。均禮意所不廢。各衙門可於大門外稽顙申謝。投素柬號房爲是。中丞方伯至府縣各官。我當函謝。但軍中少書啓朋友。須自爲之。不能速耳。若農觀察信來。寄銀已不少矣。用去若干。存餘若干。盍詳以告我。吾恐家中已有官氣矣。爾母墓誌及太常師神道刻本。均付一本與閱。營屯甚好。軍士以南農法行之。此間甚有效。以此悟地氣之厚。古法之可行也。

致孝威（臘月十三夜）

孝威孝寬等閱悉。爾母大葬之期。想未改擇。土色何如。以爾母之淑慎慈儉。必可得一平善之地。以安體魄。且吾他年遷神之所也。急欲聞其大略。以慰遠念。墓銘刻手甚佳。可多拓數百本送人。此間索者甚多。須便時寄百本爲要。序銘俱稱心。而言字亦合法。惟蓋篆頗欠蒼

勁耳。傅君當厚酬之。湯子惠吾亦識之。其人貧而介，亦可厚贈。老友戴正心近况何如。二伯處每年二百，不可缺。明年七十大壽，亦須送百金也。數項約須四百金。可向王若農處取。由廉項撥。金積於十一月十六日已復。辦法詳正摺及密片中。如經理得宜。西陲百年無事也。非頻年縱橫血戰。何以得此。此舉最難最險。患不在賊而在時局。事後思之。且悻且憤。吾遂督關隴。有代爲憂者。有快心者。有料其必了此事者。有怪其遲久無功者。吾概不以介意。天下事總要人幹。國家不可無陝甘。陝甘不可無總督。一介書生。數年任兼圻。豈可避難就易哉。爾母深知我心。從不以世俗語相聒。惜其不及見也。可爲文告之。河州賊早有就撫之意。西寧賊已識兵威。崔禹等逆亦決計乞撫。聞索逆亦然。此皆不煩招致者。然撫難於剿。吾且以分別剿撫處之。一兩年必可結局。惟吾衰已甚。未免日暮途長之感。明春當力辭重任。爾舅母姨母處光景何如。恐不可無點綴。爾等當酌致之。左段貧苦之家。總當分潤。仍是由親及疎爲是。大姊光景何如。爾民江西有信來否。下次信可詳告我。

致孝威（五月十二夜安定大營）

孝威覽鄂台寄到三月十七日信。知已安抵鄂中。計月底可抵家矣。途間因受風寒。復患腰

痛咳嗽甚爲挂念。外感無甚緊要。然頻患感冒。究由體質不佳。且多服表劑。亦耗元氣。到家後可安息調養。務令元氣漸充。榮衛漸實。不爲客感所侵。以慰我念。曾侯之喪。吾甚悲之。不但時局可慮。且交游情誼。亦難怗然也。已致賻四百金。輓聯云。知人之明。謀國之忠。自愧不如元輔。同心若金。攻錯若石。相期無負平生。蓋亦道實語。見何小宋代懇乞恩卹一疏。於悔心事頗道得著。闡發不遺餘力。知劫剛亦能言父實際。可謂無忝矣。君臣朋友之間。居心宜直。用情宜厚。從前彼此爭論。每拜疏後。卽錄稿咨送。可謂鉏去陵谷。絕無城府。至茲感傷不暇之時。乃復負氣耶。知人之明。謀國之忠。兩語。亦久見章奏。非始毀今譽。兒當知吾心也。喪過湘干時。爾宜赴弔。以敬父執。牲醴肴饌。自不可少。更能作誄哀之。中吾不盡之意。尤其是道理。明楊武陵與黃石齋先生不協。石齋先生劾其奪情。本持正論。後謫戍黔中。行過杜渚。懼其家報復。微服而行。武陵之子長蒼（山松）聞之。亟往起居。怡然致敬。呈詩云。乃者吾翁眞拜賜。異時夫子直非沾。爽猶有意疑公旦。奚卻由來舉解狐。（後兩韻不復記憶。沉湘者舊集中可取視之。）此可謂知敬其父以及父之執者。吾與侯所爭者。皆國事兵略。非爭權競勢比。同時纖儒。妄生揣擬之詞。何直一哂耶。丁叟之事。家運不幸。吾悲其堪成大器。遽早

夭折。非僅平常骨肉憂戚之比。暇或爲文存之耳。輪船覆奏已鈔寄。想已得覽。可見任事之難。少雲一信寄去。四月十四日。威寬助同知之。得威書。知四月朔已抵家。慰甚。腰痛咳嗽已全愈否。格外保慎。勿貽吾憂也。二伯病狀。前得寬書。已知大概。恐心疾不可愈矣。中年哀樂多端。足損懷抱。况老年多病。何以堪此。爾輩但常省視。凡可博老人歡者。極力爲之。或有時漸忘憂戚。亦未可知耳。家中土木之工。計已完竣。寬書來。極知謬誤。吾亦不深責。爾輩須時以老父爲念。勿以庸妄攪父怒。讀書行己。刻求精進。兄弟相爲師友。勿比匪人。吾之願也。爾母三年終矣。此三年中。家中一切。能如爾母在時否。庶母已老。家事一切。不必操勞。兒婦諸宜照管。勤儉忠厚四字。時常在意。家門其有望乎。此間雨水應節。禾苗大好。可期豐稔。而民氣漸蘇。賊情無變。七月可進蘭垣。吾腹泄如常。幸尙耐苦。活一日。辦一日事。盡一日心而已。

致孝威寬助同（六月十四日安定大營）

孝威寬助同知悉。五月十二日書至。二伯竟至不起。哀痛何言。老年多病。又適值了弟之變。積憂迫灼。遂至於此。鄂渚一別六年。畢生無復見面之目。同氣之緣盡矣。癸兄尙權定海否。既有計去。歸期必速。惟官場交代。例有轆轤。不審遂能脫然否。當致書中承。懇其早與放歸。

也。癸兄未歸之先。所有一切事宜。爾等自應妥爲料理。二伯在日。曾言他年陪葬史坡。將來自當遷神於此。丁弟爲二伯所愛。亦可耐葬。惟不知有隙地可容否。弔葬各期。自須俟癸兄到家酌定。墓誌我當任之。喪禮近已廢缺。爾曹當將期喪禮制悉心考究。擇其宜今。而不戾於古者行之。不可隨俗自便。外於名教。壬兄正當大事。可以此示之。此最要緊。至於世俗所謂儀節文物。務爲觀美而不可效者。尤當留意。爾等家奠文當自撰呈覽。吾此時晝夜治軍書。無暇執筆。又頻年衰病侵尋。怕聞傷心事。怕說傷心話。暫不能爲。或入居省署後。乃爲之。二伯遺集。曾自編次。旋以不甚愜意。停刊。爾曹可錄副寄來。但不可以原本遠寄。恐途中損失。翻成恨事也。曾文正之喪。已歸湘中。致賻不受。劫剛以遺命爲言禮也。家中工作。想已停止。戴敬翁前說。如何下落。老儒貧苦可憐。總當厚以待之。敬以出之。少雲大姊。均遷居福源巷。兩女婚期定否。得雋孫兄弟來書。并呈院試文稿。尙有通順語。而稟啓不如式。詞義亦粗疏。字畫欠佳。恐是見聞寡陋。志不向上之故。當飭其尊師取友。潛心讀書爲要。大舅遺櫬已回湘否。二舅之遷居縣城。光景可好。姨母光景何如。爾母族彫零日甚。使爾母在。牽罍如何。爾輩當時以爲念。叔慈家事可代謀否。季和尙未見來。夏結笙處有信到家否。婚事如何說。

芝岑能主婚否。周桂塢書來訴苦。已有函復之矣。河州事已大定。西寧尙須臨之以兵。肅城尙須濟師猛攻乃下。今歲大稔。土民均言數十年未有。殘黎大有生氣。五穗之麥。雙角之豆。祥徵疊出。國家之景運休明。於茲可見。我腹泄如常。幸勤服補劑。精神尙可支持耳。

致孝威寬勛同（小除夕蘭州節署）

威寬勛同覽。所寄稟函。均到。前侯名貴回湘。交一函。并尼山研。與豐孫。想已收到。豐孫讀書寫字。隨便而已。只要有恆。無須峻督也。西寧大致可冀肅清。肅州已加馬隊。二十前往助攻。並發後膛大砲。想可克矣。甘涼一帶。間有游匪零騎。自易料理。我昨上乞休疏內。原請仍留此間。以備諮訪。意蓋在此。屢有京信。說西事報捷後。當奉有恩命。吾意使相兩江。非我所堪。臨時辭遜也。未如願。不若先時自陳爲得也。數月後。必可一律澄清。關隴事。幸而後濟。亦非始願所到。器忌盈滿。功名亦忌太盛。不獨衰朽餘生。不堪負荷已也。關外無勁軍健將。（已嚴劾烏魯木齊提督成緣矣）又事權不一。爲時太久。必啓戎心。故有須預爲調度之說。然若不於乞休疏中陳及。又似攪事。如蒙上垂詢。當畢其愚耳。湖南諸老友。有楚軍紀事本末之議。意在表章。實則贅說。且令同時之人多議論。不如其已。南屏年伯。性情敦摯。又善爲古

文。有書復之。爾等須時常親敬。見父執當以所事諸父者事之。於心亦安也。二伯葬事。已定局否。童太守大呼。向無交情。惟聞其作官甚好。茲既散訃。當以祭幛伴函送去。江幼陶。以道員羈郡中。周荐農爲其作書。請爲保舉。幼陶亦兩書奉懇。我不敢應。此固非可請託者。也以四百金寄之。胡文忠堂弟葉翼。求假數百金。捐知府。則不應也。子弟不好讀書。只想作官。不明義理。只想富貴。可歎耳。族間建總祠修譜之議。如可行。亦宜圖之。實則支祠已建。譜修未久。暫緩興辦。亦未嘗不可。吾總以世澤之興隆。要多出勤耕苦讀子弟。家祚之昌盛。總在忠孝節義。他不足貴也。遇有相知世舊。可與其勉之。仲肅書來。欲以兩子來隴。此不相宜。此間非仕國。且我不久卽當離此。何必遠道相從。季和已奏補寧朔。或能安靜下去耳。二伯遺集。已囑楊慶伯校訂作序。此間刻手太劣。只好寄回開雕。腹泄之疾。飲河水少減。惟腰酸膝痛。健忘異常。此實衰老本病。曾服人蔘兩許。氣略旺耳。孝威書來。言咳嗽腰痛已全愈。季和言得家信。云并未會全愈。殊爲憂之。見尙服藥否。節飲食。簡思慮。讀書自樂。延年娛我足矣。適庵先生集。甫已由鄂台遞到。文詩根底深厚。非近代所有。徐當譔序。以廣其傳。惟原本用活字板。殊嫌拙陋。而雜取當時俗人敍記。尤不雅觀。將來必須出貲別爲校刊。乃堪行遠耳。

致勛同（丁丑五月初四夜肅州）

諭助同知之。前接孝寬稟。知孝助夫婦有赴浙祝壽之說。嗣接若農觀察來信。知已由鄂搭坐輪船赴寧。不久仍可同歸。殊爲懸系。數千里夫婦同行。途間許多不便。又搭坐輪船航海。無可信親丁護送。何能放心。汝輩安坐家中。但知輪船迅使。不知近日輪船失事之案。層見疊出。甚可耽心。祝壽非緊要典禮。不必夫婦同行。數千里航海寧親。尤非穩便。事前并不稟告老父。候示遵行。又與禮大有不合。助性柔闊。宜其不明道理。寬亦聽之。何也。此信到湘。計助已回家。嗣後不准任意妄行。并傳諭三媳婦知之。寬信云。三月底來肅。并言過鄂時再由鄂臺寄信。見已四十餘日。未接隻字。或三月底尙未動身耶。抑沿途阻滯耶。同在家潛心讀書爲要。今歲未延師訓課。尤宜檢束自勉。不可放肆廢學。吾老矣。軍事羈身。去家萬里。爾曹成敗。非能預知。亦實不暇管教。爾等成人與否。亦不在意。只好聽之。豐孫輩當漸有知曉。爾等能以身作则。庶耳濡目染。日有長進。不至流入執袴惡少一派。否則相習成風。不知所底矣。吾所望於兒孫者。耕田識字。無忝門風。不欲其俊達多能。亦不望其能文章取科第。小時聽慣好話。看慣好榜樣。長大或尙留得幾分寒素書生氣象。否則積代勤苦讀書。世澤日漸

銷亡。鮮克由禮。將由惡終矣。二舅信來。似光景甚窘。望吾寄贈。卻不言及多少。汝母骨肉之親。見只剩他一人。我必當盡情盡之。以副汝母之意。且俟寬兒到肅再說。此間戰事。極爲順利。惟餉源早涸。而懸師絕域。轉饋更難。思之寢食俱廢。摺稿飭鈔。寄爾等一閱。

致寬勳同（閏三月二十四日酒泉營次）

寬勳同知悉。三月下旬。接寬來稟。得悉一切。深慰。我本無心念家。惟人生須有結局。不能不早爲之所。覽寬稟。近事尙無不合。足釋身家之念。柳莊近處胡家壩大塘。衝田屋山場塘壩均好。合之現有田屋莊業。將來可安一家。惟糧餉甚重。須歲有津貼。始免偏枯。石湖板橋等處田屋塘壩均好。山場亦寬。可安兩家。糧餉較輕。無須津貼。板石坳所置之田。歲租共三十餘石。可作墓田。起茅屋數間於墓之左右。以住佃人。將來仍須蓋一饗堂。便上塚往來住宿。中嵌墓銘。積數年租息。當可了之。我將來藏蛻之所。如以嶽麓爲定。尙須於近塋處置一小莊爲饗堂。將來住石湖板橋二房子孫。（卽守塚人也。）爾兄葬處。是否無須改卜。爾嫂定須合葬。寬來稟并未說及。殊屬疏漏。如天鵝山合宜。亦須置墓田作饗堂。此外宜添置田屋。以安一家。並購爵田祭產。可陸續謀之。亦無須急急耳。大約山場均須廣栽樹竹。私塘均須

蓄養魚苗。擇勤樸佃農。俾其安心耕種。則出產常熟。歲租無減。可爲久遠計。目前所費。亦屬無多也。西園等歸時。告以合族建祠。置義塾。及爲中年未娶。世緒將絕者。謀娶妻延祀計。需費可與爾等謀之。大約總在數千金以內。如有成議。可寄信來。世延積欠之債。原諭爾等清理。其居鄉居城。亦聽其自酌。惟寄居岳家莊屋。於義無取耳。昨次置買石湖板橋之田。是否由其經手。寬來稟並未言其近狀。殊不可解。李甥杭州病故。此間已有所聞。寬稟代爲照料一切。已甚周妥。我心稍慰。惟和嫂素不曉事。其子雖望成立。終是不了之局。應傳我諭。令其回老師潭新居。自營生業。舅家不堪久累也。朱氏世德已衰。大姑母之澤。恐不能長保。其孫爾等欲留其一孫在家塾課讀。原是厚道。惟須察看其性質。向正與否。須防其引壞諸孫。切要切要。二伯母處。我可不理會。(例送甘旨。二伯逝後。卽應停止。寬過鄂時。與若農如何說。何無一字述及。)其李老姨命苦可憐。爾生母可時常照料。以慰其意。其滿女堵方。功渭楊同。昨石泉來肅。已給盤費銀五十兩。並託若農。匯廉銀二百兩畀之。功渭向於我處不通聞問。滿姑又故。所以待之者。祇合如此。功渭體弱多病。恐不永年。意欲在此覓差委。我不允也。功渭又言所遺一女。意欲與孝同之子訂姻。且云已與孝同說過。我意方家與我。向非素交。

此女幼卽失母。若卽訂爲孫婦。將來卽須代爲撫養。又是一累。如孝同未會應允。可罷此議。凡諸孫論婚。須先稟知。切勿逕許。吾意總以以寒素勤儉忠厚人家爲相宜。不屑攀附世宦也。舊僕中所亟宜憐恤者。周光照曾昆厚兩人。當極留意。光照近狀何此。須另擇住處。俾其耕種獲利。曾昆厚未與娶婦。已聞其腰脚受病。步履維艱。當急思所以卹之。俾得飽煖終身爲要。使中可詳以告我。李國賢屋改作前棟。所擬方向。以門朝西正廳朝南爲是。芝芥廉訪所擬圖式。應早寄閱。三合土改作甌牆。所費更省。但底用眠甌。實砌五六尺上。始灌斗砌。較堅固也。蘊齋復信已到。仲雲兄信。想仍由家中轉遞。此間尙未接得。西事正月初大捷。俄人更馴順踰常。伊犁收回之期。必不遠矣。崇星使總署。均有信來。若農信來。我二月十七日所發家信。及附寄一包信到。而外包未到。內有致楊性農書。想已併付浮沈矣。茲有另繕一通寄去。可取銀百兩。面送性翁。以慰其意。吾同年存者。祇剩此翁矣。初年意氣相得。中歲以後。彼此不甚融洽。音問亦疏。蓋志行難以盡同耳。兒輩見之。循子姪之分。執禮甚恭。固宜。惟不可發議論。不必請教益爲是。性翁來書。言在少雲處曾見過大姊數次。我意暫見父執。非女子事。而性翁與我。並非心交。察看大姊平日於母教頗少體會。母德可師法者甚多。伊不知

則傲而專尙其才。不思女範所重者德。世俗所重詩詞字畫。均無足言。所講者禮法。丰采言論。均非所尙。古云。無才便是德。有德便有福。爾等可將此信與之一閱。鈔信兩件。附一包。並發。

致孝同（六月初一哈密大營）

字諭孝同。肅孫之名。旣屬重出。新得孫女。更名律孫。紀出師之義可也。哈密炎熱異常。旬日已來。左脅左腿。風團復發。不癢而痛。周令診視。謂肝火甚旺。服涼劑不愈。繼以大黃數劑。仍不泄動。比加服元明粉。乃略下兩遍。所思乃覺輕減。現停元明粉。（亦止服過一錢。）尙服大黃一二帕。卽停止不服。當可復元耳。宗概從未出過遠門。不知行路之難。可傳我意。請其秋涼速歸。昭煦上年在肅。一病幾殆。容易調治痊愈。始得生還。此次復又來肅。意欲何爲。若云學習公事。試自問可學何事。大營又有何事可學。我年七十矣。從未得子姪之力。亦并不以此望諸子姪。乃子姪必欲累我。一累不已。且至於再。何耶。可以此信給昭煦看。令其速歸。勿許久留爲要。宗概家貧遠出。可給盤川銀五十兩。昭煦此來。准酌幫路費十六兩。七月以後。天氣漸涼。爾可奉生母挈眷回闈。細心讀書。專意務正。免貽我憂。楷字總少帖意。是臨摹。

欠工夫。亦由心胸中少書味耳。及時力學。尙不爲遲。來函內有。庶覺陰侵稍可避暑兩語。陰侵兩字。殊不妥。侵或是浸字之誤耶。語云。秀才不中舉。歸家做小題。蓋謂多做大題則思致庸鈍詞。意膚泛搖筆滿紙。盡是陳言。何有一語道著。宜其不能動人心知也。要作幾篇好八股。殊不容易。多讀書則義理不隔。肯用心則題蘊畢宣。而又於法脈兩字細細推尋。務求其合。乃可望有長進。若下筆構思。盡歸蹣跚一路。將終身無悟入處矣。茲選定四書詩題廿一道付爾。每月六課。自限一日完卷寄閱。



上海图书馆藏书



A541 212 0014 9270B

A.26279

~~1-26(27)~~